

EPIMELO YA MOTO

OYO ABONGI BE



Natondi yo, Ndeko Neville. Nkolo apambola yo.

Ezali malamumu kozala lisusu na losambo na ntongo oyo. “Mbote” mingi na bino nyonso. Pe nandimi ete ekozala mokolo moko monene mpo na biso nyonso, kozala li—Liboso na Nkolo na biso. Pe sikawa, nazali na malakisi na ntongo oyo. Nalingi koleka mbala moko na malakisi yango, mpo ezali. . . nakanisi ezali na motuya. Pe ezali. . . Pe mpo na kotungisa bato mingi te, boyebi, kotelema ntango molai, bato mingi batelemi. Nakokota mbala moko na malakisi.

² Pe sikawa, lelo na mpokwa, nalingi koteya likolo na : *Mokambi Ya Bomoi Na Ngai*. Pe nakosepela ete baoyo bakoki, baoyo nyonso bakokoka, bazala wana na mpokwa oyo. Ata bongo, soki ozali na losambo na yo, tozali. . . na solo, tolingi ózala na—na losambo na yo. Ezali lotomo na yo kozala kuna, esika na yo ya mosala, mpo na kongengisa pole na yo.

³ Sikawa, tozali kolikia ete, mbala nyonso bokoya lisusu, tokozala na bifandelo koleka oyo. Kasi tozali na kokoso na ntina na yango, oh, bipai nyonso. Likita ya bayangeli oyo bazali mpenza komeka na ndenge nyonso. Batindi yango esika moko, pe bandimi yango; na sima batindi yango esika mosusu, pe baboyi yango. Pe batindi yango lisusu, pe bandimi yango *awa*, pe ezongi. Oh, tolekisaki ntango moko makasi! Kasi, boyebi, Satana abundisaka ntango nyonso likambo ya sembo. Bobosana te, bozali ntango nyonso na elonga ya . . .

⁴ Nazalaki komituna soki ozalaki wapi, Anthony. Namoni okutanaki na tata na yo. Pe nazalaki kotala tala na liyangani. Alobaki ófandaki kuna. Tosepeli kozala na yo ná tata na yo awa elongo na biso, Ndeko Milano ya New York. Nazali na elikia, kosala mobembo mbala oyo, nakozala na mobembo mosusu, kolongwa New York, kobanda esika wana, soki Nkolo alingi.

⁵ Na bongo tozali na esengo mingi mpo na moko na moko na bino. Ezali—ezali malamumu mingi, ndenge boyebi awa.

⁶ Pe tolekisaki ntango malamumu mpenza lobi na mpokwa, ezali nde ngai. Nazalaki na . . . [Losambo balobi: “Amen.”—N.D.E.] “Yisaya kati na tempelo.” Na bongo bino. . .

⁷ Pe na ntongo ya lelo, tolingi kosolola likolo na, to kolakisa, koleka, soki tokokoka: “Kotonga Mongombo ya bomoi; kotonga mo—kotonga Mongombo ya bomoi, efandelo ya Nzambe na

bomoi, Moto abongi be; Mongombo ya bomoi ya Nzambe na bomoi, esika Ye afandaka.” Pe soki . . .

⁸ Nasosoli ete bazali na banzembo ya malamumu wana awa. Nazui libaku ya koyoka yango te. Pe na mpokwa, nakomeka koya awa. Mwasi na ngai alobelaki ngai mpo na Ndeko Ungren, nakanisi nkombo na ye yango wana, oyo auti na—na Tennessi. Bongo, azalaki awa lobi na mpokwa. Namoni ye na ntongo oyo te, kasi nakanisi azali esika moko awa. Pe nakosepela koyoka ye koyemba na mpokwa, soki nakokoka, ete, *Akitaki Uta Na Nkembo Na Ye, to Yo Ozali Monene*. Nakosepela koyoka yango. Bato boni bakosepela koyoka Ndeko Ungren koyemba? [Losambo balobi: “Amen.”—N.D.E.] Oh, na—nalingaka nzembo ya malamumu. Pe Meda alobaki ete ayembaka na baritó. Pe ezali kokanisela ngai Ndeko na biso Baxter; azali pe moyembi, ndenge biso nyonso toyebi. *Akitaki Uta Na Nkembo Na Ye, to Yo Ozali Mpenza Monene*. Nakanisi nayebi esika afandi sikawa, na . . . Ekozala malamumu, Ndeko Ungren, na mpokwa, soki olingi, soki okoki kozela? Okotikala, to okomeka kozela liyangani ya mpokwa? Ee, ngai—ngai . . . Ee, te . . . nalobi na yo, olobi nini, soki biso . . . Nalingi kotungisa moto moko te. Kasi, na bongo, mpo na nini te, kosala yango na ntango ya *Bilembo Nsambo*, ntango tokoteya yango, soki okoya. Nakosepela kotia yango na bande, bomoni, mpo nazala na yango: *Yo Ozali Mpenza Monene*, pe lisusu, *Akitaki Uta Na Nkembo Na Ye*, na ntango wana.

⁹ Oh, ezali malamumu kosalela Nkolo, boye te? [Losambo balobi: “Amen.”—N.D.E.] Nayebi te nini nalingaki kosala soki nazalaki Moklisto te! . . . ? . . . Ezali mpenza malamumu mingi kozala Moklisto. Nazali koyoka lokola nápumbwa pe náganga na mongongo na ngai nyonso. Kozala Moklisto, bokanisa naino, kokangama mobimba kati na Klisto!

¹⁰ Nayebi nátangaka nkombo ya mobali oyo ntango nyonso mabe. Ezali S.T. to T.S., to ndenge wana. Sumners, Ndeko Sumner. Ye . . . Nalingi kotondo ye, ná mwasi na ye molingami. Nakanisi alekisaki pene na, esalaki, pene na sanza motoba, mpo na kobeta na masini *Bileko Nsambo Ya Lingomba*. Pe sikawa tozali na yango awa mobimba, ebetami na masini, elengelami mpo batala yango malamumu, pe bakomisa yango buku: *Bileko Nsambo Ya Lingomba*. Ndeko mwasi Sumner, ata ozali wapi, koboya te mpo tofuta yo mpo na yango. Yango, ezalaki mpenza mosala mingi. Oh, ezali *mpenza monene*. Ekosengela na ngai pene na sanza motoba mpo na kotanga yango mobimba, kokoma yango uta na bande, kozongela yango, pe na sima kolongola kozongela maloba, pe kokomisa yango buku. Tokobongisa yango pe tokotinda yango mbala moko mpo babimisa ba-buku, mpamba te tokanisi ezali eloko bato basengeli kozala na yango sikawa, mpo bakoka koyekola yango. Billy pe alakisaki ngai, ntango nakotaki kuna na sima, kala mingi te, ete—ete—ete ezalaki—ebelemi sikawa mpo epesama na imprimeri. Bongo,

ndeko mwasi, losambo ekofuta yo mpo na yango. Nalingi te ete ósala yango ofelé. Pe—pe to nde biso. . . Soki tozui buku yango pe esengeli topesa ntalo na yango, to eloko moko, tokotia ntalo na lolenge ete ozua eloko moko ntango bakoteka yango, ezala ata boni. Yo solola bobele na likita, likita ya bayangeli, to na moko na bango, pe bakotala likambo yango mpo na yo. Nkolo apambola yo mingi mpenza.

¹¹ Mibangé oyo Ndeko mobali pe Ndeko mwasi Kidd oyo bafandi awa, bazali na mibu pene na monkama, etikali moke mpenza. Pe nakutanaki na ye kala mingi te, pe alobaki: “Ee, oyo ekoki kozala mbala na ngai ya suka komonana na yo, Ndeko Billy.” Alobaki: “Nakómi mobangé mingi.”

¹² Nalobaki: “Hólalá! Naboyi koyoka yo koloba bongo. Bozali bobele lokola bilenge mibangé mama pe papa.” Tolingaka Ndeko mobali ná Ndeko mwasi Kidd. Bisó, moko na moko na bisó. Pe ezali. . .

¹³ Esalaka ngai eloko moko ntango námonaka bango kokota na losambo, babalani ya kala ya boye. Pe bokanisa naino, babandaki koteya Nsango Malamú liboso ngai nabotama. Nazali mokolo. Kasi, bokanisa naino, babandaki koteya na ngai kobotama. Kasi ngai oyo sikawa, nakanisaka nakomi mpenza mobange. Nakanisaka nasengeli kotika mosala. Kasi ntango namonaka Ndeko mobali pe Ndeko mwasi Kidd kokota: “Nkembo na Nzambe! Aleluia!” Nalobaka: “Te, namiyokaka malamú.” Iyo, misie. Komona bango, lolenge bakoki, epesaka mpenza mpemela!

¹⁴ Bongo, bososola yango, pene na mbula na ngai, mbala mibale, pe bazali kokoba mosala. Bayaki na ntongo ya lelo kosenga babuku, soki bakoki kozua ba-buku pe koteka yango. Basengelaki na ba-bande, mpo bakende, kolonga milimo na nzela ya koyokisa babande yango, bazali na mbula pene na monkama. Sikawa, wapi ya bino “mapapu mibale” oyo tolobelaki lobi na mpokwa? Iyo. Nabandi kokanisa: “Oyo ya ngai ezali wapi?” ntango alobaki yango—yango lobi eleki. Ozali na mibu boni, Ndeko mwasi Kidd? [Ndeko mwasi Kidd alobi: “Ntuku mwambe na moko.”—N.D.E.] Ntuku mwambe na moko. Ozali na mbula boni, Ndeko Tom? [Ndeko Kidd alobi: “Ntuku mwambe na mibu boni.”] Mibu ntuku mwambe na moko pe ntuku mwambe na mibu boni, pe bazali kokoba kosalela mapapu na bango, na mosala, kokoba kosala.

¹⁵ Soki likambo ya mabe esalemi na Ohio, oyo Ndeko mwasi Kidd ayebi, telefone ekolela na ndako. Mokolo moko, atelefonaki, pe bebé moko, bebé moke ya mwasi, nakanisi, abotamaki, pe misopo na ye ezalaki libanda. [Ndeko mwasi Kidd alobi: “Vésicule.”—N.D.E.] Vésicule, ezalaki libanda ya bebé. Pe monganga ayebaki te asala nini, pe abangaki kosala lipasó. Tobondelaki. [“Basalaki lipasó, Ndeko Branham, pe bazongisaki

yango, mpo ete, balobaki: ‘Akobika te.’ Pe bazongisaki misopo na ye na kati.”] Bazongisaki misopo na kati, na nzela ya lipasó, pe bakanisaki akobika te. Kasi abikaki. [“Nzela moko te.”] Bongo nzela moko te mpo—mpo. . .uta na rectum, mpo bilei éleka. Pe Ndeko mwasi Kidd abengaki lisusu. Tobondelaki lisusu, pe sikawa nzela ezali polele. Pe ye oyo, lokola litatoli; na monganga pe. Bomoni? Ezali kotatola ete Nkolo Yesu, azali Mokeli monene! Bomoni likambo Satana alukaki kosala? Koboma bebé yango. Na bongo, bomoni, bongo nandimi ete mwasi yango amipesaki na Nkolo. [“Azongelaki Nkolo, wana na ndako na ngai.”] Azongelaki Nkolo. Ndeko mwasi Kidd azongisaki ye na Klisto, sima na likamwisi monene oyo esalamaki mpo na bebé na ye.

¹⁶ Babengaki ngai na Californie, lobi eleki, ndeko moko motei ya kuna, nazalaki na ye elongo ntango nakendeki mbala liboso na Californie, eleki mibu mingi. Nkoko na ye ya mobali abotamaki na—na valve minei. . . misato ekangámá na motema na ye. Pe nayebisaki ye likambo yango. Nalobaki: “Nzambe oyo akoki kokela eloko mosusu, pe kobongisa yango, akoki pe kobikisa nkoko na yo.” Loba na mwana na yo ázala bobele na mpiko.

¹⁷ Pe elenge yango azalaki na liyangani ntango nakendeki na Californie mbala liboso, eleki mibu zomi na mwambe sikawa, esili koleka mbula zomi na motoba. Pe nazalaki na Californie. Pe ye. . .Liyangani esimbaki motema ya elenge mobali yango mingi kino. . .Ntango bazuaki bebé yango, pe abotamaki, bamonaki ete eloko moko ezalaki malamau te, azalaki bulé, pe bamekaki kopesa ye oxijène, pe bongo na bongo. Pe emonanaki lokola akobika te, na bongo minganga batalaki ye, pe bamonaki ete ba-valve misato ekangamaki na motema na ye. Ata nzela moke ezalaki te, bomoni, kaka—kaka valve moko nde ezalaki kosala. Abengaki papa na ye, pe alobaki: “Papa, benga Ndeko Branham, mbala moko. Yebisa ye yango nyonso. . .’Asenga yango na Klisto. Ye akosala yango.” Ezali bongo. Hólalá! Kobendama wana, makambo bamonaka, bomoni, tolobelaki yango, lobi na mpokwa. Likambo elongobani na ntango elongobani.

¹⁸ Ee, soki tokobi koloba, tokokóma na liteya ata moke te, boye te? Ezali lokola londende na ntongo ya malili, ezalaka ya kogangama mpenza, boyebi, pe ekangamaka makasi mpenza. Tozali na esengo mingi kozala na bondekoko ya ndenge wana. Iyo, misie.

¹⁹ Bongo sikawa, tokitisa mitema, sikawa, pe toleka na liteya sikawa. Ntango mosusu nako. . .Nayebi te soki bozali komona yango to te, na tableau moindo. Ntango mosusu soki nabaloli yango *boye*, sima na ntango moke, ee, tokokoka, sikawa, bamosusu na bino, ya. . .[Ndeko Edgar “Doc” Branham alobi: “Olingi totia mwinda likolo na yango?”—N.D.E.] Olobi nini? [“Olingi totia mwinda likolo na yango?”] Te, nakanisi te, sikawa te, Doc. Mbala mosusu sima na ntango moke. [“Awa na nse,

nakoki kotia mwinda likolo na yango.”] Ee, to—tokosala yango ntango nakozua... Ozali na mwinda awa? Malamu. Tobalola yango na ngambo na yango. Kuna na suka, bokoki komona? Bokoki? Soki bokoki komona, botombola loboko, soki bokoki komona tableau moindo oyo, kotánga likolo na yango. Te. Malamu. Boya na mwinda. Sikawa, wana bazali komilengela mpo na yango. . .

²⁰ Nazali kobanda, sima na ntango moke, na ntongo ya lelo; to, te, te, pene na miníti zomi na mitano liboso. Na bongo, tokozua ntango na biso sikawa, mpo tolingi kokende na lombangu te. Soki okei na lombangu, okobebisa makambo olingaki koloba. Bongo, nazalaki kolanda bande, mokolo mosusu, ndenge naye bisaki bino, pe namiyokelaki nsoni ngai moko; mpo na makambo nazalaki koloba te, kasi lolenge nazalaki koloba yango, na lombangu mingi, pe elobeli ya motema mokuse. Namoni lokola kozela. Yango. . .

²¹ Na—namonaki mokolo mosusu, esika balingaki kotonga zoo ya monene, awa na katikati ya Louisville. Pe Misie Brown, nakanisi ezalaki ye, kuna, apesaki milió moko ya dollar mpo na zoo yango. Ee, soki nazalaki na yango, nalingaki mpenza kopesa bango yango mpo bátika banyama yango nsomi. Ngai—ngai nandimaka makambo ya kokanga banyama kati na bandako mike ndenge wana te. Ngai mpenza. . . Nakendeke na zoo, pe namonaka banyama wana, ba-ngombolo, ba-nkosi, ná banyama mosusu, kotambola epai na epai, kati na bolóko bomoi mobimba, bomoni. Ekosala yo mpasi. Sima na nyonso, bakangami na nzela ya mayele ya moto oyo aleki bango mayele. Bomoni? Bazali kokanga bango pe kotia bango na boloko.

²² Pe nakanisi ndenge moyini asalaka yango. Azuaka bato ya motuya oyo basengelaki kotambola na bonsomi na bisika minene ya Nzambe, na bitando, pe—pe na bisika ya ndenge wana, pe atii bango na bolóko ya ebongiseli moko, to endimeli, to eloko mosusu, pe akangi bango kati na yango. Oyo nde likambo ya nsomo.

²³ Ngai nalingaka ba-zoo te. Kasi namiyokaka lokola moko na banyama yango, ntango okangami mpenza pe ozali koluka komikangola, boyebi, mpo—mpo na kobima pe kosala eloko moko.

²⁴ Sikawa, liboso tobelema na Liloba, tobelema na Mokolo ya Liloba, wana togumbi motó sikawa mpo na kobondela.

²⁵ Tata na biso ya boboto, na Likolo, tosangani na ntongo oyo lisusu na Nkombo ya Nkolo Yesu, Mwana na Yo ya motuya. Nzambe, oyo alati nzoto, ayaki na mokili, mpo na kolongola masumu na biso, pe akufaki, Ye Moyengebeni; mpo biso, na boyengebeni na Ye, lokola tozangi boyengebeni, tokoka kobonga be kati na Ye. Toyei koyambola ete tobongi te, Nkolo. Eloko moko ya malamumu ezali kati na biso te. Pe biso nyonso tozali kati na

bolóko monene. Ata totelemi na ngambo nini, tozali biso nyonso se na bolóko. Moko te akoki kosunga moninga. Kasi, Nzambe, kati na mawa na Ye ezangi suka, akitaki pe afungolaki bikuke ya bolóko, mpo na kokángola biso. Sikawa, tozali lisusu bakangami te. Tozali kati na zoo ya mokili te, kasi sikawa tozali bonsomi. Tozali libanda.

²⁶ Oh, tolingi Ye mingi pe tosanjoli Ye! Tokoki mpenza kotambola na bitando minene ya bilaka na Ye, pe komona yango komonisama liboso na biso! Na miso na biso moko, tomoni Nzambe monene ya Seko na Seko, Komizipola liboso na biso, pe Komikomisa solo, ndenge Asalaki na basakoli ya kala. Toyebi likambo moko, bazali kopema na elikia, ete mokolo moko tokozongisama lisusu, sima na bomoi oyo kosila, na lisekwa, mpo na Bomoi ya Seko oyo ekoleka te. Ba-nzoto na biso ekonuna te. Pe tokokufa lisusu te. Pe tokoyoka lisusu nzala te. Pe tokozala lisusu na bosenga te. Kasi tokotambola elongo na Ye. Tolingi koyoka Ye koloba: “Kota na bisengo ya Nkolo, oyo ebongisamaki mpo na yo liboso na kozalisama ya mokili.” Kalakala, liboso lisumu ekota, Abongisaki makambo yango, lokola mpo na Adama ná Ewa, ete bazala na bokono to kokoso te. Pe sikawa, Abongisaki yango mpo na biso, pe Ayebaki liboso ete tokoya. Lisumu ezalaki epekiseli monene, kasi sikawa, lisumu elongolami, na Makila na Yesu. Sikawa, tozali kokende na Mboka na elaka, na nzela ya elaka ya Nzambe, oyo ezali Seko.

²⁷ Pambola biso sikawa, Tata, ezali biso koyekola Liloba na Yo. Tolingi koyeba lolenge nini ya bato tosengeli kozala, mpo na kozala Kuna. Sunga biso lelo na eteyelo oyo, mpo tokoka kozala na Nkolo Molakisi monene elongo na biso, Molimo Mosantu, pe Akita komimonisa na biso, na nzela ya Liloba na Ye. Mpo tosengi yango na Nkombo na Ye pe mpo na nkembo na Ye. Amen.

²⁸ Sikawa, liboso, nalingi bokamata elongo na ngai Petelo ya Mibale, mokapo ya 1. Nalingi kotanga eteni ya Likomi oyo, Petelo ya Mibale, mokapo ya 1. Sikawa mpo na bino bozali na bikomeli ná lokasa . . .

²⁹ Pe nakanisi bayebisaki ngai na ntongo oyo ete—ete mbala mosusu, ntango nabalolaka motó, bande eyokanaka malamumu te. Nasalaka yango na nko te. Nakanisi ete mokolo moko, tokoluka kosomba mikró oyo—oyo esalaka na ngambo nyonso, pe tokotia yango na plafond awa. Na bongo, ata ozali wapi, ekosala malamumu. Ekozala malamumu mpenza, zongazonga na yango, kaka mikró moko na plafond.

³⁰ Pe sikawa, wana nazali koloba, pe soki bino, bozali na mposa na yango, sima na liyangani, bokoki kokoma dessin oyo. Ngai pe nabetisaki yango na masini awa. Nakozua nsete ya moke pe nakobaka yango liboso awa, soki bokolinga kosala yango na ntango moko. Boya na ntango malamumu sima na nzánga ya lelo, mpo na kososola yango.

³¹ Sikawa, tozali kobelema na *Bilembo Nsambo*. Touti kosilisa *Bileko Nsambo Ya Lingomba*. Liteya oyo ezali Malakisi, oyo ezali kokangisa moto, oyo akosikolama na Makila na Nkolo Yesu, pe akozuama na eleko ya Lingomba yango, eleko ya Lingomba ya Seko, na suka ya Bilembo. Sikawa toyebi tozali na Kelelo Nsambo, Malozi Nsambo, Mbeki, pe bongo na bongo, oyo tokolobela, ntango tokokoma wana. Kasi tozali sikawa kozela kozua bisika mingi ya kofanda mpo na bato.

³² Pe nakanisaki ekolandana mpenza na oyo nazalaki kotalela. Nazalaki kolikia te koyema dessin oyo, kasi mokolo mosusu, nazalaki na baninga na ngai balingami, libota Cox, kuna na Kentucky. Nakendeiki kuna, na likanisi ya kozua, ntango mosusu, mokolo moko lisusu mpo na bokila biséndé, liboso eleko yango esila. Pe nazalaki kuna na zamba elongo na moninga na ngai Charlie, oyo azali awa, ná Rodney, ndeko na ye. Namonaki ata eséndé moko te. Nakanisi nabangisaki bango nyonso, ntango nabandaki koganga, kuna na zamba. Tala likambo ekomelaki ngai, bandeko, ná—ná Ndeko mwasi Nellie ná Margie, ntango nalobelaki bino nakoyebisa bino mokolo ya lomingo, ntango nakolobela yango. Yango nde ekomelaki ngai, mpo na liteya oyo nalingaki koteya. Pe nyonso wana ekangani na yango malamú! Pe, oh, nalingaka bongo. Nazalaki na—mpenza na—na molimo mpenza ya koganga, kuna na zamba.

³³ Bongo sikawa, tótanga sikawa, Petelo ya Liboso, to . . . Petelo ya Mibale nde, mokapo ya liboso, eteni na Yango.

Ngai Simona Petelo, moombo pe ntoma na Yesu Klisto, nazali kokomela bango basili kozua likabo lolenge moko na biso kati na boyengebeni na Nzambe na biso pe Mobikisi Yesu Klisto.

³⁴ Nalingaka ndenge elobami wana, mpo liteya na ngai mobimba ya ntongo oyo etongami likolo na kondima. Bomoni? Botika nátanga yango lisusu. Boyoka na bokebi.

Ngai Simona Petelo, moombo pe ntoma na Yesu Klisto, nazali kokomela bango basili bazui—kozua likabo lolenge moko . . . kati na boyengebeni na Nzambe na biso . . . Mobikisi pe Yesu Klisto.

³⁵ Botala, azali koloba, ete: “Nasili kozua kondima oyo, pe nazali kokomela bango basili kozua kondima ya motuya moko.” Nalingi . . . Ezali mpo na bato ya libanda te. Oyo ezali mpo na Lingomba, bomoni, baoyo bazali kati na Klisto.

Ngolu ezala na bino pe kimia eyikana kati na boyebi na Nzambe, pe (kati) na Yesu Klisto Nkolo na biso.

Nguya na ye Nzambe esili kopesa biso biloko nyonso . . . nguya na ye Nzambe esili kopesa biso sikawa biloko nyonso bikoki na bomoi . . . kosambela Nzambe,

mpo na boyebi na oyo abiangi biso na nkembo pe na malamumu na ye mpenza.

Na yango pe asili kotiela biso . . . asili kotiela biso bilaka minene pe na motuya mingi, na ntina ete (na bilaka yango) bozua likabo na bino kati na lolenge na Nzambe, . . .

36 Sikawa, botika yango ekota na bozindo mpenza. Na ntongo oyo, nazali koteya te; tozali bobele kolakisa liteya oyo. “Lolenge na Nzambe.” Botika nátanga lisusu nzela ya 4 sikawa, mpo bozanga yango te. “Na yango pe asili kotiela biso . . .”

Na yango pe asili kotiela biso bilaka minene pe na motuya mingi, na ntina ete (na bilaka yango) tozua likabo kati na lolenge na Nzambe, pe tokima libebi lizali kati na mokili mpo na mposa mabe.

37 Bomoni, “mokili,” tokimi yango sikawa. Azali kokoma yango mpo na Lingomba. Yango nde ntina tosangani awa na ntongo oyo, ezali mpo tóyeba nzela, pe bosenga ya Nzambe ezali nini. Moto moko te azali awa, oyo alingi Nzambe, bongo ázanga kozala—kozala na mposa makasi ya kokóma lokola Klisto. Sikawa, etalisami awa. Moklisto nyonso! Ngai naúmeli na mosala oyo. Botala Ndeko mobali pe Ndeko mwasi Kidd, awa, bazali na ntembe te baoyo baleki na mibu na esika oyo. Kasi soki natuni bango: “Mposa ya mitema na bino ezali nini?” Ekozala: “Tobelema pene na Nzambe koleka.” Ntango ózali koyeba Klisto, ezali na eloko moko ya bolingo mingi na ntina na Ye, okoluka kokota mpenza kati na Ye.

38 Bolimbisa ngai mpo na maloba oyo. Nayebisaki mwasi na ngai, awa kala mingi te, ye . . . biso mibale tozali kokóma mibangé, pe nalobaki na ye, nalobaki: “Olingaka ngai lokola na ebandeli?”

Alobaki: “Na solo mpenza.”

39 Pe nalobaki: “Oyebi, nalingaka yo mingi koleka kino nakosepela kozua yo pe kokotisa yo kati na ngai, mpo tózala, mpenza, tókóma moto moko koleka.”

40 Sikawa, yango, yikanisa yango na milió monkama, bongo okoyeba lolenge mondimi, oyo alingaka mpenza Klisto, azalaka na mposa ya kokota kati na Ye, mpo ezali bolingo. Pe awa, Azali kolakisa biso lolenge nini, na nzela ya bilaka oyo, tokoki kosangana na Bonzambe ya Klisto. Na nzoto oyo ya kufa, lolenge tokoki kosanga elongo.

41 Nakoki koloba likambo moko awa. Ntina ngai nandimaka . . . Sikawa, moto moko asósolaki ngai mabe awa, kala mingi te. Nazuaki mokanda kouta na lisanga ya batei, elobami ete ngai nandimaka likambo ya . . . “Tobalanaka na molimo-moko. Pe tosengeli kokabwana na balongani na biso,

soki tozali na molimo-moko te, mpo tobala mosusu oyo tozali na ye molimo-moko.” Hólalá!

⁴² Nalobaki: “Lipengwa ya boye, ngai nakwei na yango te.” Natelemelaka yango ntango nyonso. Ngai—ngai nandimaka yango te. Ata moke te. Nandimaka ete Nzambe nde apesaka biso molongani. Ya solo. Na bongo, tokómaka moko eteni ya mosusu. Ya solo. Pe liboso moto ábala, asengeli kokanisa makambo yango malamú, koyekola yango.

⁴³ Elenge mobali moko atunaki ngai mokolo mosusu, alobaki: “Ndeko Branham, okanisi ete nakoki, nasengeli kobala elenge mwasi *songolo*?”

Nalobaki: “Okanisaka boni mpo na ye?”

Alobaki: “Hólalá, nalingaka ye mingi.”

Nalobaki: “Ee, soki okoki kobika te kozanga ye, ekozala malamú óbala ye. Kasi soki okoki kobika kozanga ye, malamú otika. Kasi, soki yango ekoki koboma yo, malamú—malamú bókende liboso pe bóbalana,” nalobaki bongo. Bongo, eloko nazalaki koluka kososolisa ye, ezali, soki olingi ye mpenza mingi!

⁴⁴ Bongo, sikawa, liboso bóbalana, makambo nyonso ezalaka malamú pe kitoko. Kasi sima na bino kobalana, bampasi pe mimekano ya bomoi ekobanda. Na ntango wana nde bosengeli kolingana makasi, na lolenge ete bokoyikana mpiko. Ntango mwasi akosala yo mabe, to okosala ye mabe, bokokoba koyikana mpiko.

⁴⁵ Ezali pe bongo na Klisto. Bomoni? Tosengeli kolinga Ye mingi, na lolenge ete soki tosengi Ye eloko moko, pe Apesi biso yango te, ekotungisa biso ata moke te. Bomoni? Bomoni? Mpo na nini? Pe lolenge bobele moko okoki kosala yango, ezali kosangana na lolenge na Ye ya Bonzambe, na ntango wana okosolisa ntina oyo Akoki kopesa yo yango te. “Kosangana na lolenge na Ye ya Bonzambe.”

⁴⁶ Pe botala awa: “Kokima libebi lizali kati na mokili mpo na mposa mabe.” Tokimi yango! Bomoni banani likambo yango etali? Ezali mpo na Lingomba, baoyo bazali kati na Klisto, basili kotombolama likolo na makambo oyo. Ezali te ye oyo amitomboli, kasi ye oyo Klisto atomboli.

⁴⁷ Mpo na bandeko na ngai mibali pe basi ya moindo oyo bazali awa na ntongo oyo, nazali koloba likambo oyo mpo na kotungisa te. Kasi, nazalaki na liyangani moko eleki ntango moke, pe nayebe te soki nasila koloba yango na losambo. Nalobela yango na bisika mingi. Ndeko mwasi moko ya moindo azalaki wana, alobaki: “Nakoki kopesa litatoli, to kotatola?”

“Malamú, ndeko mwasi, tátola.”

⁴⁸ Alobaki: “Nalingi kopesa litatoli oyo mpo na nkembo na Nzambe.” Alobaki: “Boyebi, na—nazali te oyo nasengelaki

kozala,” pe alobaki, “na—nazali te oyo nalingi kozala, kasi,” alobaki, “likambo ya solo ezali ete, nazali lisusu te oyo nazaláká.” Bomoni? Autaki esika moko. Atombolamaki.

⁴⁹ Na lolenge wana nde toyebaka ete tolongwi na kufa pe tokoti na Bomoi. Tozali kotala na sima, na libulu tobimi na yango. Bomoni? Tozali te oyo tolingi kozala; tozali naino te oyo tosengeli kozala; kasi tozongisi matondi mpo na likambo moko: tozali lisusu te oyo tozaláká. Ya solo. Tozali kokoba na nzela.

⁵⁰ “Pe tokimi libebi lizali kati na mokili.” Bokimi yango, mposa mabe pe libebi ya mokili, bozali likolo na yango. Sikawa ezali—sikawa ezali lolenge ya moto oyo Azali kolobela, moto oyo akimi makambo oyo, bomoni, libebi ya mokili.

Na ntina oyo mpenza, na kosaláká molende nyonso ya makasi lokola eyano na likambo yango, bobakisa na kondima na bino ezaleli malamumu, na na ezaleli malamumu na bino boyebi,

Na boyebi na bino komipekisa, . . . komipekisa na bino motema molai, . . . motema molai na bino bosantu,

Na bosantu boboto na bandeko, na boboto na bandeko bolingo.

⁵¹ Sikawa, Apesi biso awa molongo na makambo tosengeli kosala, pe koyeba lolenge ya kosala yango. Sikawa, ndenge nalobaki, biso nyonso tozali komeka kobeleva na Nzambe. Yango ntina naponaki Liteya oyo na ntongo ya lelo, mpo na lingomba, mpo nayebi ete bato bakosala mobembo. Mpamba te, lobi na mpokwa, nalobaki: “Bato boni bazali awa, bauti bipai mosusu?” Pene na bato ntuku libwa na mwambe likolo na mokama, bauti bisika mosusu. “Bato boni bazali awa bauti na ntaka ya kilometele koleka nkama na ntuku mitano?” Ee, nakanisi elekaki ntuku mwambe likolo na mokama. “Bato boni bazali awa bauti na kilometele koleka nkama nsambo?” Pene na—na koleka moko likolo na misato ya bato bazalaki awa bauti na kilometele koleka nkama na ntuku motoba, nkama mwambe. Bokanisa naino, bato oyo bazali kosala mobembo. Ee, bato yango bayaka na losambo te bobele mpo bamona bango. Ezali na . . . eloko ya kitoko te oyo bato ya libanda bakoki komona na esika oyo. Bazali bato lokola bato nyonso, babóla, balataka lokola bato nyonso. Ezali te na banzembo kitoko oyo eyembamaka na ba-korale bamibengaka ba-Anjelu, ná ba-orgue ya bibende, na maninisa kitoko ya talatala. Bomonaka mpasi mpo na kozua esika ya kofanda, pe koteleva pembeni na etutu. Bayaka mpo na makambo wana te. Kasi bayaka mpo kati na bango, ezali na eloko moko, oyo emonaka kitoko oyo liso ya bomoto emonaka te. Liso ya molimo nde emonaka kitoko ya Klisto. Yango wana nde ntina bayelaka.

⁵² Bongo, mikolo mingi liboso tosala liyangani, nabondelaka ntango nyonso. Nakendeke na zamba, natiaka na libenga na

ngai. . . Nakoyebisa mwasi na ngai: “Nakokende bokila ya biséndé na ntongo ya lelo.” Pe nakotia ekomeli pe lokasa ya moke na libenga na ngai. Ntango ntongo etani pe nakoki komona, ngai wana nayekami na nzete esika moko, natomboli maboko, koloba: “Nkolo, násala nini lelo? Eloko nini Okopesa ngai mpo na bana Yo?”

⁵³ Bongo, soki eloko moko ebeti na motema lokola kopela moto, eyaka na lolenge oyo. Ntango Bozali na Ye ekómi pene, nakobanda koyoka eloko moko lokola na mosika, eloko moko ya boye. “Mibale mbala mibale epesi minei.” Pene koleka, “Mibale mbala mibale epesi minei. Mibale mbala mibale epesi minei. Mibale mbala mibale epesi minei.” [Ndeko Branham azongeli koloba maloba oyo noki noki mpenza—N.D.E.] Bongo na bongo na bongo, ndenge wana. Bozali na Ye ezali kobeleva.

⁵⁴ Okomitika, pe sima na ntango moke, okokabwana na yo moko. Na bongo emononeli ekoya: “Kende esika *boye na boye*, pe sála likambo *boye na boye*.” Bomoni? Ebandaka, na kotia makanisi na yo likolo na Nzambe, libanda na mokili, mosika na mokili, kuna na biliki, bobele yo moko.

⁵⁵ Pe Ekobanda koya: “Moko, moko. . .” Nalobi, ata motango nini, to eloko nini, ekobanda moke moke, malembe malembe. Na sima, ekokóma noki noki. Yo ofandi wana pe otomboli maboko, koloba eloko te, otomboli bobele maboko likolo. Na mbala moko, omemami na mobimba na yo. Na sima, obandi komona makambo Alingi yo oyeba, kolakisa yo makambo makosalema.

⁵⁶ Ntango mosusu ekomaka esika moko, esika moko boye, pe na sima eteleli. Yango ekómaka emononeli te. Bongo Makomi ekobanda kosangisama. [Ndeko Branham alelisi misapi na ye—N.D.E.] Nakokamata ekomeli na ngai, mpo nábosana yango te, pe nakokoma yango, nakokoma yango.

⁵⁷ Pe soki nazongi na ndako, nakobanda kotanga yango, pe koyekola yango. Pe ntango mosusu, nayebaka ata ntina na yango te, ntango nazali kotanga yango. Bongo, sima na ntango moke, yango oyo! Ekoyela ngai, pe ekokende lisusu. Bongo, nakokamata lokasa ya moke *boye*, pe nakobanda kokoma yango, na lombangu nyonso, makambo Akoyebisa ngai. Nakokanisa: “Nkolo, nakokende losambo, pe nakolobela bango. Ngai. . . ‘Boya.’ Nazali na eloko moko mpo na bango.” Ee, eyaka nde bongo. Ya solo. Soki naino Apesi ngai yango te, nakoki koteya yango te.

⁵⁸ Na boye, ezali makomi mike mike bozali komona ngai kotala. Pe, oyo, liboso, nabandaki, nazalaki na eteni oyo te, nazui yango eleki mokolo moko to mibale, kuna na zamba.

⁵⁹ Sikawa, bato oyo bazali—bazali. . . Petelo azali koloba, awa, lolenge tosengeli kosangana na lolenge na Ye ya Bonzambe. Boye, moko na moko na biso, tozali koluka kokola kino na epimelo ya Nzambe.

⁶⁰ Sikawa, ntango tokosilisa komona Bilembo Nsambo, bongo, ntango Elembo ya Nsambo ekoyokisa mongongo na yango, to ekofungwama. . . Na ntembe te, toyebi eloko nini elembo ezali, ezali kofungola mosala, kofungola Bilembo Nsambo. Pe tokomona yango kati na liyemi. Ezali kofungola Nsango moko, eloko oyo ekangámáki.

⁶¹ Lomingo eleki na mpokwa, nateyaki likolo ya: “Fungola.” Pe fungola ezali kondima. Kondima esimbi fungola, pe fungola ezali Makomi. Pe Klisto azali Ekuke. Bomoni? Bongo, kondima ezuaka makambo mike-mike ya Makomi pe efungolaka nkembo pe bolamu na Nzambe, epai na bato na Ye. Bomoni? Bongo, ezali, kondima nde esimbaka fungola oyo ezali kofungola Klisto epai na bato; efungolaka yango, emonisaka yango.

⁶² Bongo, lelo, tokomeka kozua fungola yango moko, mpo na kofungola nzela ya kokóma Moklisto malamumu na epimelo ya Nzambe, mpo na kozala Mongombo ya bomoi mpo Nzambe na bomoi afanda na kati.

⁶³ Bobosana te, Nzambe Amimonisi Ye moko na lolenge misato. Mbala ya liboso, Amimonisaki na Likonzi na Móto, babengaki yango Botata. Na sima Nzambe yango moko, amimonisaki kati na Yesu Klisto, Ye amitongelaki nzoto, Amisalelaki nzoto yango. Ya misato, na nzela ya liwa ya nzoto yango, Abulisaki Lingomba mpo Afanda kati na yango. Ezalaki Nzambe likolo na biso; Nzambe elongo na biso; Nzambe kati na biso; Nzambe yango moko.

⁶⁴ Yango ntina abengamaki Tata, Mwana, Molimo Mosantu. Banzambe misato te; misala misato ya Nzambe moko. Soki bakanisaki yango bongo na Likita ya Nicée, tolingaki kozua mobulu nyonso oyo te, boye te? Ya solo. Banzambe misato te. Bato bakokaki kososola te ndenge Yesu azalaki kosolola na Tata, pe Ye na Tata bazala Moto moko. Ee, makambo nyonso ezali wana. Ya solo, emonisami polele. Ya solo. Bomoni? Ezali Banzambe misato te. Misala misato! Misato komo- . . .

⁶⁵ Ezali nini? Nzambe amikitisaki kino na bozalisi na Ye. Nzambe alingaka basambela Ye. Liloba oyo *Nzambe* elingi koloba “eloko ya kosambela.” Ezali Nzambe, azali komeka kobongisa bato na Ye, mpo na kozua uta na bango ntina Akelaki bango. Asalaki yo mpo ozala eloko mosusu te, bobele mwana na Nzambe, mobali to mwasi. Soki ozangi yango, kozala mwana na Nzambe mobali to mwasi, ozangi elonga.

⁶⁶ Bongo “kozanga,” liloba oyo *l-i-s-u-m-u* elingi koloba “kozanga elonga”, kozanga elonga. Na bongo, soki nabeti lisasi, na métele ntuku mitano, pe nabeti; nazui mondóki na ngai pe nabeti, kasi lisasi ekei pembeni, na satimétele zomi to zomi na misato, eloko nini esalemi? Basengeli kobongisa mondóki na ngai. Mbeba ezali. Pe soki nazangi kondima na Nzambe, soki nazangi kozala Moklisto. . . Nzambe atiaki yo awa mpo

ózala Moklisto. Soki okei pembeni na ngámbo moko, zonga mpo obongisama. Pe eloko ekoki kobongisa yo ezali bobele moko, ezali Makomi. Molimo Mosantu kati na Makomi, akobongisa yo, akozongisa yo alima esika elongobami. Ya solo.

⁶⁷ Sikawa tokoyekola Liloba na Ye. Etiene alobaki, na Misala 7, pe lisusu na . . . Tótanga yango naino. (Ezali kolobela, sikawa, tozali kolobela Mongombo ya Nzambe.) Bongo, Etiene alobaki . . . (Lokola, ekozala Mongombo ya bomoi ya Nzambe na bomoi.) Etiene alobaki, na Misala mokapo ya 7, pe nandimi ete biso . . . Na Misala 7, kobanda na nzela ya 44.

Batata na biso bazalaki na hema na litatoli na lisobe, oyo etongamaki pelamoko na motindo Mose amonaki, ye oyo asololaki na ye alobelaki ye kosala yango bongo.

Pe na sima, batata na biso bazalaki, batata na biso bayaki, bamemi yango . . . na Yesu na mokili na mabota oyo Nzambe abengani liboso na batata na biso, ezalaki bongo kino na mokolo na Dawidi.

Ye azuaki bolamu na miso na Nzambe pe asengaki nzela ya kotongela Nzambe na Yakobo esika ya kofanda.

Nzoka nde, Salomo moto atongelaki ye ndako.

Kasi Oyo-Aleki-Likolo afandaka na bandako etongamá na bato te, ndenge mosakoli alobaki:

Nkolo alobi: Likolo ezali kiti na ngai ya bokonzi, pe mabelé ezali esika na ngai ya kotia makolo. Ndako ndenge nini bokotongela ngai? Esika nini ekozala epemelo na ngai?

⁶⁸ Sikawa, kati na . . . Sikawa, “mongombo,” na ntembe te, ezali esika tokendeke kopema, to, kozua mopepe, pe bongo na bongo, lokola kopema na mpongi, to nyonso wana. Sikawa, Baebele 10, na nzela ya 5, Polo akotisi likambo yango.

Na bongo, ntango ayaki na mokili, alobaki ete, Mbeka . . . (Ezali Klisto.) . . . Mbeka na kotumba pe makabo olingaki yango te, kasi osili kobongisela ngai nzoto.

⁶⁹ Sikawa, Mongombo ezali nini? Nzoto, Nzambe kati na mongombo ya Nzoto.

⁷⁰ Kalakala, Nzambe, uta na likolo, ntango Akitaki na ngomba, soki ngombe mo—mobali to mwasi asimbacki ngomba yango, asengelaki kokufa. Nzambe azali bulee.

⁷¹ Lobi na mpokwa, ntango Banje oyo bazipaki bilongi na Bango. Baselafa ya bulee ná bilongi ya bulee, bayebi ata lisumu te, kasi Basengeli kozipa bilongi na Bango, Liboso na Nzambe; kozipa makolo na Bango, na komikitisa.

⁷² Bongo, Nzambe na bulee akokaki kosepela na lisumu te, yango wana eloko moko te ekokaki kobelema na ngomba wapi Nzambe azalaki.

⁷³ Na sima Nzambe akómaki mosuni pe afandaki elongo na biso, na lolenge ya Yesu Klisto, Mwana na Ye, Bokeli na Ye. Na sima, Mwana yango apesaki bomoi na Ye, pe momboto ya Makila ya Nzambe epasukaki, mpo Bomoi ebima uta na Makila yango, mpo na biso.

⁷⁴ Na nzela ya Makila yango biso topetolami. Pe sikawa makila na biso, bomoi na biso, oyo eyaki na nzela ya mposa na nzoto, ememaki bomoi na biso na mokili. Makila na Yesu Klisto epetoli biso, ebongoli lolenge na biso, etindeli biso Molimo Mosantu; na bongo, tokotisami na lolenge na Bonzambe ya Nzambe, boye, tokómi efandelo mpo na Nzambe. Yesu alobaki: “Na mokolo yango bokoyeba ete Ngai nazali kati na Tata, pe Tata kati na Ngai; Ngai kati na bino, pe bino kati na Ngai.” Bomoni?

⁷⁵ Boyeba lolenge nini Nzambe azali kati na Lingomba na Ye. Lingomba esengeli sikawa kozua esika ya Klisto, mpo na kokoba mosala na Ye. “Ye oyo akondima ngai, misala mizali Ngai kosala, akosala yango pe lokola. Sima na ntango moke, bamokili bakomona Ngai lisusu te, nde bino bokomona Ngai, mpo ete Nakozala elongo na bino, ata kati na bino, kino na suka na mokili.” Bomoni? Yango wana, kokoba mosala na Ye.

⁷⁶ Sikawa, Nzambe, to Biblia elobi yango, awa. Etiene alobaki na ntina ya tempelo Solomo atongaki: “Oyo-Aleki-Likolo afandaka na ba-tempelo etongámá na bato te. ‘Mpo ete Lola ezali Kiti na Ngai ya bokonzi, pe mabelé ezali esika na Ngai ya kotia makolo. Esika nini ekozala epemelo na Ngai?’ ‘Kasi Osili kobongisela Ngai Nzoto.’” Amen. Ezali yango mpenza.

⁷⁷ “Osili kobongisela Ngai Nzoto.” Nzambe afandaka na epimelo ya moto, komitalisa Ye moko kati na Ekelamu yango. Kosambela ebongi be! Nzambe kati na biso, tozali Mongombo na Ye, Nzambe azali komimonisa. Oh, tokoki koumela likolo na yango, kino bokozanga mpenza mpéma, awa, mpo na molunge. Botala, yango, Nzambe ntango nyonso, na eleko nyonso, Amitalisaka kati na moto.

⁷⁸ Ezalaki Nzambe kati na Mose. Botala ye, abotamaki mokambi; Klisto. Ntango abotamaki, bazalaki konyokola bana, bazalaki koluka ye; ndenge moko pe na Klisto. Pe ye—ye abotamaki na eleko wana; ndenge moko na Klisto. Azalaki mopesi-mibeko; ndenge moko na Klisto. Mose amataki, mikolo ntuku minei, azuaki mibeko, pe akitaki. Klisto akendeki na biliki, mikolo ntuku minei, pe azongaki, alobaki: “Bosili koyoka bato ya kala koloba ete, ‘Sala ekobo te.’ Nde Ngai nalobi na bino, ye nani akotala mwasi na mposa mabe, asili kosala na ye ekobo.” Bomoni? Makambo nyonso ya lolenge wana, oyo, Nzambe Amitalisaka Ye moko.

⁷⁹ Botala Yosefe, abotamaki muana na molimo kati na—na bandeko ebele. Bango nyonso bazalaki bato malamumu, bango nyonso bankoko. Kasi, ntango Yosefe ayaki, azalaki ndenge mosusu. Akokaki komona bimononeli, kolimbola ba-ndoto, pe bandeko na ye bayinaki ye mpo na yango. Bobele mpo na mosala Nzambe atindaki ye kosala na mokili, bandeko na ye bayinaki ye mpo na yango. Bomoni? Pe nyonso wana ezalaki kotalisa ekululu. Pe, botala, atekamaki na palata pene na ntuku misato, na bandeko na ye. Abwakamaki na libulu, mpo akufa, na bandeko na ye. Abimisamaki na libulu yango, pe akendeki kofanda na loboko ya mobali ya Falo. Pe moto moko te akokaki kokoma liboso na Falo, oyo azalaki kokonza mokili na eleko yango, moto moko te akokaki kokoma liboso na Falo, bobele na nzela ya Yosefe. Moto moko te akoki kokoma liboso na Nzambe, bobele na nzela ya Klisto. Pe ntango Yosefe azalaki kobima na ndako ya bokonzi, liboso na ye kobima, kelelo ezalaki kobeta, pe bapoti mbangu bazalaki kokende liboso na ye, kogangaka: “Bofukama! Yosefe azali koya!” Ata ozalaki wapi, to ozalaki kosala nini, boni mosala na yo ezalaki na motuya; osengelaki kofukama kino Yosefe akokoma wana.

⁸⁰ Pe ntango Kelelo ekobeta, moko na mikolo oyo, mabolongo nyonso ekofukama pe minoko nyonso ekotatola. Ntango Klisto, Yosefe na biso, akotika Nkembo pe akoya, mosala na yo ekozala lisusu na ntina te. Mabolongo nyonso ekofukama pe bakotatola ete Azali Mwana na Nzambe. Ya solo.

⁸¹ Oh, tozali komona Ye kati na Dawidi! Ye Dawidi, mokonzi oyo aboyamaki, alongolamaki na ngwende na ye moko, na bandeko na ye moko, mwana na ye moko, afandaki likolo na Ngomba na Bilaya, ezalaki ye komata, na nsongé ya Ngomba ya Bilaya, abwakaki miso na sima, kotala Yelusaleme pe alelaki; mpo ete, kuna, bato na ye moko oyo asalelaki pe alakisaki bango makambo na Nzambe, baboyaki ye pe babambaki biloko likolo na ye, babwakelaki ye nsoi pe batiolaki ye, ezalaki ye komata ngomba, pe aboyamaki. Oh, ezali kotalisa mpenza Mwana na Nzambe, mibu nkama mwambe na sima; Mokonzi oyo aboyami, kati na libota na Ye Moko, afandaki likolo na ngomba pe alelaki mpo na Yelusaleme, lokola Mokonzi oyo aboyami.

⁸² Ezalaki nini? Nzambe azalaki komitalisa kati na basakoli yango, kotalisa Klisto.

⁸³ Na sima, Moko ayaki oyo azalaki kobonga be ya Nzambe. Ezalaki Nzambe elongo na biso.

⁸⁴ Pe kobanda ntango wana, Amitalisaki Ye moko kati na Lingomba na Ye, na ngambo oyo ya Kálvari. Bongo, bomoni, biso nyonso tozali komeka kokoma na efandelo yango, Mongombo ya Nzambe na bomoi. Sikawa, bato mosusu bazali . . .

⁸⁵ Tomoni awa, alobaki: “Ya liboso, tozali na kondima, ezaleli malamumu, boyebi, komipekisa, motema molai, boboto to bosantu,

pe bolingo na bandeko.” Malamu. Boboto na bandeko, na sima bobakisa bolingo. Botika nátanga yango, nyonso, lisusu, mpo bososola yango, sikawa. Sikawa, tokobanda na nzela ya 5.

Na ntina oyo mpenza, na kosaláká molende nyonso ya makasi lokola eyano na likambo yango, bobakisa na kondima na bino ezaleli malamumu, na ezaleli malamumu na bino boyebi,

Na boyebi na bino komipekisa, na komipekisa na bino motema molai, na motema molai na bino bosantu,

Na bosantu boboto epai na bandeko, na boboto epai na bandeko bolingo, yango nde bolingo.

. . . soko makambo oyo mazali kati na bino pe mazali koyikana, makobatela bino ete bozala mpamba te to bozanga kobota mbuma te, mpo na boyebi na Nkolo na biso Yesu Klisto.

⁸⁶ Bongo, Petelo azali kotalisa biso eloko moko awa, lolengee ya kokóma wana.

⁸⁷ Sikawa, nalingi koloba boye, ete, bato mosusu bazali na eteni ya ezaleli malamumu oyo, boyebi, bwanya, motema molai, pe bongo na bongo, oyo bamibengaka ata Baklisto te. Sikawa, biso. . . tozali kolakisa eteyelo ya lomingo. Pe ezali solo. Bato mosusu bazali na eteni na yango, bazali ata komibenga Baklisto te. Kasi yango. . . Ekosimba te. Ezali lokola ndeke ya moindo oyo azali komeka kotia nsala ya ndeke ya pembe na mapapu na ye, mpo ákóma ndeke ya pembe. Azali bobele komiyokisa nsoni. Malamumu na ye kotikala ndeke ya moindo. Bomoni? Ntango azali komeka kosala makambo oyo kozanga kozala Moklisto, azali mobimba mpenza libanda na esika na ye.

⁸⁸ Ezali lokola nzete ya sinapi ezali komeka kobimisa ba-pomme. Ekokoka te, bomoni, ata ezali nzete. Kasi ekoki kobimisa ba-pomme te.

⁸⁹ Ezali lokola mpunda moke azali komeka kobimisa leni ya mpate, komeka kokóma mpate, ntango ye a—azali mpunda moke. Bomoni, akoki kobimisa leni ya mpate te. Akokoka te. Leni ezali likabo mpo na mpate, mpo na mpunda moke te. Akoki komeka kosala makambo lokola mpate, kasi azali kaka mpunda moke. Bomoni? Bongo, akoki koloba: “Ee, nakoki kolia lokola mpate. Nakoki kosala likambo *boye* lokola mpate.” Ata okoki kosala nini, osengeli kozala mpate mpo na kozala na leni.

⁹⁰ Nátelema naino awa miniti moke. Mpate amisalelaka leni te. Azalaka na leni mpo azali mpate. Bato mingi bamekaka koloba: “Ee, nakomeka kosala malamumu. Nakomeka kosala *boye*.” Bomisalela eloko moko te. Te, bokokoka te. Mpate amisalelaka te, basengaka ye te, batalelaka ye te mpo ámisalela leni. Akobota leni, pe ekosalama bongo mpo azali mpate.

⁹¹ Pe soki ozali Moklisto, okobota mbuma na Molimo. Oko—okomisalela yango te. Okomeka kosala yango te. Okomeka. . . Komikómisa te oyo yo ozali te. Okokóma bobele oyo osengeli kozala, na sima, ekobonga yango moko. Bosila koyoka bato koloba: “Ee, nalobi na bino. Ngai. . . Nakótá na lingomba. Na—nasengeli mpenza kotika lokuta”? Ozali lisusu komeka komisalela eloko moko, sikawa. Okokoka kosala yango te, na bongo, komeka na yo yango te, ndenge moko na—na mpu—mpunda moke oyo akoki komisalela leni ya mpate te. Akokoka te.

⁹² To, engondó oyo azali koluka kolia esika moko na ebenga, engondó azali koluka—engondó azali koluka kokóma ebenga. Okoki kokanisa nzéngó moko kuna, koloba: “Oyebi, ngai nazali ebenga,” pe amitieli ba-nsala, alobi: “Omoni, nakómi lokola. . .” Bomoni? Ekosimba na yango ata moke te. Ezali nde mo—moto oyo atatoli ete azali eloko moko, ntango oyo azali yango te. Bomoni, okoka kosala yango te.

⁹³ Okoki koloba te: “Tala, nasengeli kozala na ezaleli malamumu, boye nakozala na ezaleli malamumu. Nasengeli kobika bomoi mosantu, boye nakozala pe bongo.” Ee, ozali bobele komitiela ba-nsala. Ata ezali pene na yo, kasi okoki kotia ba-nsala na ndeke mosusu te. Bomoni? Ekosimba te. Yango ekotalisa bobele ete ndeke yango azali mokosi. Bomoni? Bokoki kokanisa ndeke nzéngó oyo azali koluka kozua ba-nsala mibale to misato ya ebenga, koloba: “Botala awa, bomoni, nazali ebenga”? Omoni? Ee, biso nyonso toyebi ete azali nzéngó. Omoni? Omoni? Esili. Tokoki koloba ete azali nzéngó.

⁹⁴ Ee, ezali pe bongo, ntango ba—bazali komeka komisalela Boklisto. Bokoki kosala yango te. Likambo ya liboso bosengeli kosala, ezali kobotama mbala na mibale. Bosengeli kobongwana. Bomoni? Pe soki obongwani, okomi ekelamu ya sika. Na bongo, obandi malamumu sikawa. Bomoni? Bongo, okomitungisa lissusu mpo na ba-nsala te, ekobonga yango moko, ntango—ntango obotami mbala na mibale. Iyo, misie.

⁹⁵ Ndenge nalobaka ntango nyonso. Soki okamati ngu—ngulu, oniki ye malamumu pe olatisi ye kazaka esonama, to kazaka ya smoking, nde, pe otiki ye kokende; akokende komibwaka mbala moko na lidusu ya potopoto. Mpamba te, bomoni, ekosala ye bolamu moko te. Azali ngulu. Ezali lolenge na ye. Komibwaka na bosoto ezali lolenge na ye. Osengeli kobongola lolenge na ye, pe (ye) oyo etikali ekobonga yango moko.

⁹⁶ Sikawa, botala malamumu. Bosengeli kobotama mbala na mibale, elingi koloba, kobongwana. Esengeli mbongwana ezala.

⁹⁷ Okoloba: “Ee, Ndeko Branham, nayebi mwasi moko, awa, ee, asálá naino likambo ya mabe te. Azali mwasi malamumu. To, mobali *songolo pakala*, azali mobali moko malamumu. Asalaka eloko moko te. Oyebi ete asalaka na ye moto mabe te.” Oyo wana

ezali na ntina moko te. Akoki kozala mozalani malamau, kasi azali Moklisto te, soki naino abotami mbala mibale te.

⁹⁸ Yesu alobaki: “Soko moto akobotama mbala na mibale te,” Yoane 3, ete, “akoki ata komona Bokonzi te.” Sikawa, elingi koloba, *komona*, elingi koloba “kososola.”

⁹⁹ Soki otali likambo moko, pe olobi: “Namoni yango te.” Olingi koloba ete ososoli yango te.

¹⁰⁰ Moto akoki kososola te mpo na nini bato bagangaka. Moto akoki kososola te mpo na nini lokóta ya moto ekoki kobongwana pe alobi monoko na sika. Moto ya mokili akoki komona te ndenge nini nkembo na Nzambe ekoki kokita na miso ya moto, amoni emononeli pe ayebisi bato makambo, pe nini basengeli kosala; koyebisa bango makambo oyo elingi kosalema, pekotalisa makambo ekosalema, ndenge Nkolo asalaki mpo na biso awa, ata, lobi na mpokwa. Bomoni? Bomoni? Mo—molimo ya mokili ekoluka kososola. “Ee, asalaki nini? To, azali kosalela lokuta ya ndenge nini? Mayele mabe nini azali na yango?” Komona moto koloba minoko ya sika, bakoloba . . . pe moto mosusu kolimbola pe koyebisa mpenza na enama moko ya Nzoto likambo oyo basalaki, pe oyo basengelaki kosala te. Bomoni? Bomoni? Bakanisaka ezali na mwa lokuta. “Ezali na likambo moko bayokani kati na bango.”

¹⁰¹ Bakoki kososola yango te, kino moto yango akobotama mbala ya mibale. Bongo, soki abotami mbala ya mibale, na ntango wana azali na nzela ya boyokani, mpo akómi ekelamu ya sika. Ezaleli ya kala ya mabe pe ya ntembe azalaki na yango, ekufi. Sikawa, akómi ekelamu ya sika. Na bongo, bomoni, azali na ntina ya komibakisela eloko te, sikawa, mpo ekobakisama yango moko.

¹⁰² Botala, osengeli kobotama mbala ya mibale. Pe soki obotami mbala ya mibale, okoki kobotama mbala ya mibale te kozanga kozala na kondima. Ya solo. Bongo, bomoni, na liyemi na ngai oyo, nazali na mobóko mpenza, kondima ezali mobóko ya nyonso wana. “Soko na kondima te, ekoki na kosepelisa Nzambe te. Moto oyo azali kobeleva na Nzambe asengeli kondima ete Ye azali pe ete azongisaka libonza epai na bango bakolukaka Ye.” Bomoni? Asengeli bongo. Pe, soki ozalaka na ntembe na Biblia, soki ozalaka na ntembe ete Liloba ezali solo, ekozala malamau kotikala na sima kino okondima yango liboso.

¹⁰³ Lisumu ezali nini? Kozanga kondima. Ezali bobele na makambo mibale oyo ekambaka moto. Ezali ntembe to kondima, moko to mosusu. Yo okambami na oyo ezali kokonza bomoi na yo. Ezali kotala bobele monene ya kondima na yo, na mosanda nini okoki komata.

¹⁰⁴ Kasi, liboso, esengeli kozala kondima. Botika ngai kolobela mobóko yango mwa moke. Sikawa, kondima ezali eloko osengeli kondima. Kondima ezali eloko . . . “Kondima ezali elendiseli ya

makambo tozali kolikia.” Ezali, osili kozua yango soki ozali na kondima, mpo emonisami kati na kondima. “Kondima ezali elendiseli ya makambo tozali kolikia,” Baebele 11, bomoni, “elimbweli.” Ezali nini? Elimbweli ya ndenge nini? Elimbweli ya bulee.

¹⁰⁵ Yango wana, ntango olobi: “Ndeko Branham, nandimi ete Nzambe abikisaka bokono.” Ee, soki ondimi yango, pe na sima oyambi Ye lokola mobikisi na yo, pe okosi te, kasi ondimi na solo mpenza ete obikisami na mapipi na Ye, eloko moko te ekotangola yo na yango. Likambo yango esili nye. Sikawa, okoki kozala na elikia, kopumbwa likolo na *oyo*, pe kopumbwa likolo na *oyo kuna*. Kasi soki ozali na kondima, oyebi yango, mpo ezali elimbweli. Osili kozua yango. Nazalaki . . .

¹⁰⁶ Bato boni, banani, balandaki Oral Roberts na ntongo oyo, ntango azalaki koteya na ntongo oyo, Oral Roberts? Na—nayokaki ye koloba likambo moko to mosusu, ete ezali na kondima moko, oyo ya kokangola, kobondela libondeli ya kondima, ya kokangola. Alobaki: “Kota na boyokani na kosimba radio, kota na boyokani na kosimba eloko moko, mpo na . . .” Ye nde azalaki kosala bongo, mpo na kopesa bato eloko bakoki kosimba. Eloko moko, okoloba: “Nazui yango sikawa, mpo ayebisaki ngai nasimba radio na ngai. Nazui yango.” Bomoni? Sikawa, ezali malamu. Kasi, sikawa, kondima ya solo mpenza esengeli na kosimba eloko moko te. Sikawa, nazali kokweisa Ndeko Oral te, ata moke te. Azali kosala mosala monene, pe azali moto na—nzambe, pe na—nasepelaka mingi na Oral Roberts. Mawa mingi mpo tozali na bato mingi lokola ye te.

¹⁰⁷ Kasi likambo nazali komeka koloba, ezali ete—ete, kondima ezali na ntina ya eloko moko te. Bomoni? Kondima endimaka Liloba na Nzambe. Mpo ‘te kondima eutaka nde na “kosimba”? Te. “Kondima eutaka na koyoka, pe koyoka Liloba na Nzambe.” Yango esimbaka yango makasi. Ezali wana. Bomoni? Pe kondima, ndenge elobamaki, eyebi te makambo ya mosika. Kondima ezali sikasikawa. Kondima ezali awa. Ee, ndakisa soki moto moko azali . . .

¹⁰⁸ Bébé moke wana, mokolo mosusu. Mama oyo Ndeko mwasi Kidd ná bandeko mosusu balobelaki, oyo azalaki na bébé oyo misopo na ye ezalaki libanda, nzela ezalaki te na rectum mpo na kolekisa bilei. Bongo, mwasi yango, ntango ayokaki Ndeko mwasi Kidd ná bandeko mosusu kotatola, andimaki, ete, soki akoki kokutana na ngai, mpo nabondela mpo na bébé yango. Sikawa, bomoni, Nzambe apesaka biso bato . . .

¹⁰⁹ Bamosusu kati na biso babikeli makambo na Nzambe mpenza, na—na lolenge ete Nzambe akómi koya awa, lokola, kokende kosolola na Ndeko Neville to na moto oyo boyebani. Pe ntango mosusu, tosengaka na bato yango kobondela mpo na biso. Yango nde tosengeli kosala. Bongo, soki tozali na kondima

ete mobali to mwasi yango, moto nyonso azali kobondela mpo na biso, azali kosolola na Nzambe, na ntango wana kondima na biso epikami. Etelemi ngwi. Etongami.

¹¹⁰ Botala. Moto ya Roma wana akendeke kokutana na Yesu. Pe alobaki: “Na—nabongi te ete Okota na ndako na ngai. Nakoki te. Na—nakoki te. Pe na—nazalaki te. . . na—namimonaka bongo te. Kasi,” alobaki, “mwana na ngai azali kobela makasi. Yo loba bobele Liloba, bomoni, pe mwana na ngai akobika.”

¹¹¹ Ezalaki nini? Mosika ebongolaki eloko moko te. Bomoni? Mpo, Nzambe azali bisika nyonso. Nzambe azali na nguya nyonso. Pe bisika nyonso Nzambe azali, nguya nyonso ezali wana. Pe Nzambe, azalaka bisika nyonso, yango esalaka ete Nzambe ázala bipai nyonso, bisika nyonso. Bomoni? Nzambe azali monene ndenge moko na Allemagne, na Suisse, pe kuna na Afrika, na miníti oyo kaka, ndenge Azali esika oyo. Oh! Ezali yango mpenza.

¹¹² Bongo ye alobaki: “Nabongi te ete Okota na ndako na ngai. Loba bobele Liloba.” Ezalaki nini? Ezalaki kondima ya moto ya Roma wana. Andimaki yango.

Pe Yesu alobaki: “Zonga na yo. Mwana na yo azali na bomoi.”

¹¹³ Pe akendeke, atambolaki mikolo mibale. Pe mokolo elandaki, liboso na ye kokoma na ndako, akutanaki na basali na ye mosusu na nzela. Pe balobaki: “Mwana na yo azali na bomoi.”

¹¹⁴ Pe moto ya Roma yango asepelaki mingi, kino alobaki: “Abandaki koyoka malamumu na ngonga nini ya mokolo? Na ntango nini?”

Alobaki: “Pene na ngonga ya zomi na moko, abandaki komiyoka malamumu.”

¹¹⁵ Pe moto ya Roma yango ayebaki ete ezalaki mpenza na ngonga yango nde Yesu alobaki: “Mwana na yo azali na bomoi,” pe andimaki. Amen.

¹¹⁶ Oyo-na-nguya nyonso, azali bisika nyonso, ayebi nyonso, azangi suka, ezali nde Nzambe. Bongo, ntango babengaka na telefone pe balobaka: “Bondela!” Boyokani wana! Pe kondima na yo ebendaka Nzambe. Yango nde ememaka elongo libondeli ná Nzambe, kati na mosala. Libondeli! Kondima ebongolaka likambo *awa* pe ekei *kuna*. Esangisaka yango.

¹¹⁷ “Loba Liloba. Nyonso nalingi Yo kosala ezali koloba Liloba, pe nyonso ekozala malamumu.” Bomoni, Asengelaki kozala wana te. “Loba bobele Liloba.” Mpo na nini? Nzambe azali bisika nyonso. Azali na nguya nyonso. Azali na nguya ndenge moko na nse ya mokili ndenge Azali likolo ya mokili, to ngambo na ngambo. Azali Nzambe. “Eloko kaka moko Osengeli kosala ezali bobele koloba Liloba,” alobaki bongo.

118 Na bongo, sikawa, kondima esalaka oyo etikali. Kondima esalaka oyo etikali. Bongo osengeli kozala na kondima lokola mobóko. Boklisto mobimba, nyonso oyo ozali, nyonso oyo okozala, etongami likolo na kondima kati na Liloba. Yango wana ngai nandimaka Liloba. Bomoni?

119 Nakoki kotia kondima na ngai likolo na eloko mosusu te. Soki nasengeli kotia yango likolo na lingomba, nakotia yango likolo na lingomba nini: Katoliko, Luterien, Metodiste, Batiste, Pantekotiste? Nakotia yango wapi? Nayebi te. Bango nyonso bakoti na mobulu pe makambo ndenge na ndenge, balingami na basinga, pe makambo ndenge na ndenge.

120 Kasi soki natii kondima na ngai na Liloba na Ye, yango etelemi ngwi. Moto moko te alimbolaka Yango. Ezali Nde bongo, YANGO ELOBI NKOLO. Bongo nandimi Yango. Yango wana nde Mobóko.

121 Monganga moko malamau awa na engumba, moninga na ngai, Monganga Sam Adair. Tozalaki bilenge mibali elongo. Bino nyonso boyebi Sam. Pe ayebisaki ngai, alobaki: “Bill. . .” Sima ya emononeli wana, oyo elobelaki ye epai akotonga esika na ye, lolenge nini ekozala. Sikawa, bokende kuna, botuna ye naino soki ezali solo te. Mibu mibale to misato liboso ekokisama, eyebisaki ye esika ekozala. Nalobaki: “Okozua pene na mapango wana nyonso.” Pe bobele eloko moko nde ekaboli ye na yango, ezali esika bazali kobongisa. Monganga Adair azui oyo etikali, na moto ya pharmacie. Esili. Monganga Adair akokisaki yango mpenza, emononeli yango. Epai, esika oyo elobamaki: “Bakoki ata kosimba yango te na mibu ntuku mibale na mitano. Kokokana na mibeko ya mboka.”

122 Nalobaki: “Monganga, Nkolo apesi yo yango, mpo na komikitisa na yo.”

Alobaki: “Nazali na bolamu te.”

123 Nalobaki: “Yo ozali kóbá. Ozali na poso libanda, poso oyo baninga na yo bamonaka na libanda, kasi na kati, ozali moto malamau mpenza. Bima na poso wana.” Nalobaki: “Nzambe nde apesi yo yango.”

124 Alobaki: “Natielaka yo ntembe te, Billy, kasi nasengeli kotia ntembe na yango.”

Nalobaki: “Kende na esika na yo ya mosala.” Pe akendeki.

125 Na ntongo elandaki, abengaki ngai, alobaki: “Nazali kokufa na malili.”

126 Nalobaki: “Likambo nini?” Ezalaki pene na sanza ya nsambo. Nalobaki: “Likambo nini, Doc?”

127 Alobaki: “Nasili kosomba esika yango, Billy. Bayanganaki lobi na mpokwa na Boston, pe nasili kosomba esika yango na ntongo ya lelo.”

Nalobaki: “Nayebisaki yo.”

¹²⁸ Nazalaki kuna mokolo mosusu, nazalaki kosolola na ye, ntango mondóki epanzanaki na elongi na ngai. Alobaki: “Nakanisi nasili kolobela yango na bato nkoto oyo bayaka awa, ndenge wana.” Ezali nini? Sikawa, soki Nzambe alobi likambo, esengeli kokokisama.

¹²⁹ Lobi eleki na mpokwa, baninga mosusu bayaki. Bayokaki nsango ya emononeli ya caribou oyo azalaki na maséké ya metele moko pe ngombolo ya mwa mpembe kongenga. Nayebi te bato boni basili koleka na ndako, oyo balingi komona yango. Nalobaki: “Métele yango oyo. Bomeka maséké yango.” Ayokaki nsango na yango liboso ekokisama. Bomoni? Mpo na nini? Soki Nzambe alobi likambo, esengeli kokosama. Yango nde ntina, ezali moboko.

¹³⁰ Sikawa, mwango ya lobiko yango *oyo*. Na bongo, soki emononeli na Ye ekokisami malamú mpenza, ndenge yango mpenza elobamaki ekosalema, pe losambo oyo bayebi ete ezali solo, bongo ekozala boni mpo na Liloba na Ye. Bomoni? Yango ezali solo koleka emononeli. Soki emononeli elobi kokokana na Liloba te, boye emononeli yango ezali lokuta. Kasi Liloba ezali, liboso, mpo Liloba ezali Nzambe. Bomoni? Bongo, Azali bisika nyonso. Alobaki yango awa, pe Akokisi yango na Canada. Amen. Bomoni, Azali bisika nyonso. Malamú.

¹³¹ Ya liboso, osengeli kobotama mbala ya mibale. Na sima, ntango obotami mbala ya mibale, ozali na kondima; ondimi Liloba. Soki obotami mbala ya mibale te, okotelemela Yango. Soki ozali na mposa moke ya kosambela, pe—pe ozali na—na—na mayele moke ya bomoto, ete osengeli kosala bolamu, okokoka koyokana na Liloba na Nzambe ata moke te. Okokoka yango ata moke te. Osengeli kobotama mbala ya mibale. Pe, kobotama mbala ya mibale, epesaka kondima. Malamú. Na sima, soki ozui kondima, oyo *awa*, k-o-n-d-i-m-a, kondima, na ntango wana obelemi mpenza mpo na kokola.

¹³² Bongo, bato mingi bayaka na etumbelo, babondelaka pe balobaka: “Nkolo, limbisa ngai.” Pe kobikela kitoko ya kobulisama ekokomela bango, pe nyonso wana. Bongo, bokobikela ntango kitoko, kotelema na etumbelo, pe koganga. Bokozonga koloba: “Nzambe apambolama, nazui yango.” Te, osili kobelema na esika oyo okoki kokola. Osali naino eloko moko te. Omoni? Eloko bobele moko osili kosala ezali kotia mobóko.

¹³³ Sikawa nde okotonga ndako, pe soki otii mobóko pe olobi: “Oh, moninga, nazui yango.” Omoni? Otii nde mobóko mpo na kobanda kotonga ndako. Sikawa nde osengeli kotonga ndako.

¹³⁴ Bongo, wana nde esika likambo ekobanda, na ntongo oyo, tokolobela na ntina na yango sikawa. Malamú. Ndako ebandaka na mobóko. Mobóko ya Boklisto ezali nini? Kondima kati na Liloba na Nzambe. Yango nde mobóko na yo. Na sima,

okobanda kokola. Bongo okobanda, okobanda kobakisa likolo na mobóko yango.

¹³⁵ Sikawa, mpo na kotonga ndako, okotia makonzi pe nyonso mosusu. Ndeko Woods, ná bato ya mabaya pe batongi oyo bazali awa, bakoki koyebisa biso ndenge batongaka ndako. Bomoni? Kasi ngai nakoyebisa bino ndenge batongaka ndako ya molimo, esika Nzambe akoki kofanda. Alingi kofanda kati na yo. Alingi kokómisa yo lokola Ye moko. Alingi ete yo otalisama, to, otalisa Bozali na Ye.

¹³⁶ Boyebi, kalakala, ntango bazalaki kopetola wólo, liboso bazua ba-masíni ya kopetola yango na móto, bazalaki kobeta wólo yango, mpo na kolongola bosoto, bibende, motáko pe nyonso wana, bazalaki kokoba kobeta, kobalola yango, pe kobeta lisusu. Ba-Indien basalaka bongo kino lelo, babetaka wólo, pe babetaka yango. Boyebi ndenge bakokaki koyeba ete bibende nyonso, ná bosoto pe mbindo nyonso elongwaki? Ntango mobeti wólo akokaki komimona kati na yango, lokola na talatala. Ekómaki peto pe kitoko mpenza kino mobeti akokaki komimona.

¹³⁷ Yango nde lolenge Nzambe asalaka. Akamataka wólo oyo Azui na mabele, pe Abeti-beti yango, na nzela ya Molimo Mosantu, abaloli-baloli-baloli yango, pe abeti-beti yango kino (Akozua) Akomona etaliseli na Ye. [Ndeko Branham abeti maboko mbala mingi ntango alobi maloba oyo—N.D.E.]

¹³⁸ Pe yango nde tosengeli kosala, kotalisa Mwana na Nzambe. Pe sikawa, tosengeli kosala mosala na Ye. Alobaki: “Ye oyo akondimaka Ngai. . .” Yoane 14:7: “Ye oyo akondimaka Ngai, misala mizali Ngai kosala, akosala yango pe lokola.” Obandi kotalisa misala ya Klisto.

¹³⁹ Kasi bato mingi kati na biso tomekaka kosala misala ya Klisto, liboso etaliseli ya Klisto ézala kati na biso. Kokoso ezali nde wana. Tozali komona makambo yango kosalema. Boyebi yango. Nayebi yango. Tomonaka yango, mabaku mingi na banzela. Tomonaka ebele na batei, na Baklisto, batiami pembeni na banzela, ezali mpo babandaki malamute.

¹⁴⁰ Pe yango wana nazali awa na ntongo oyo, ezali mpo nameka kolakisa na lingomba moke oyo, ná ngai moko, lolenge tokoki kokóma efandelo ya Nzambe na bomoi. Bato boni balingi kokóma yango? [Losambo balobi: “Amen.”—N.D.E.] Efandelo ya Nzambe na bomoi!

¹⁴¹ Sikawa, botala likambo tosalaká. Likambo ya liboso ezali nini? Kozala na kondima, pe kobotama mbala na mibale. Yango nde kotia mobóko.

¹⁴² Bongo, sima na kotia mobóko, ya mibale, obakisa na mobóko na yo. “Bakisa na kondima na yo,” ndenge Petelo alobaki awa. Bakisa na. . .Liboso, ozali na kondima, sima obakisi ezaleli

malamu na kondima na yo. Yango nde likonzi oyo elandi. Liboso, tia mobóko na yo, kondima. Sima, na kondima na yo, bakisa ezaleli malamumu.

¹⁴³ Bongo, awa nde esika mingi kati na biso tokweáka. Iyo, misie. Iyo. “Bakisa ezaleli malamumu na kondima na yo.” Yango elingi bobele koloba te kobika bomoi ya mongondo, boyebi, lokola mwasi to mobali, pe bongo na bongo. Yango etali likambo wana te.

¹⁴⁴ Biblia elobi, totangi awa, na Buku ya Luka, epai wapi Elobami: “Nguya ebimaki kati na Ye.” Ezali bongo? [Losambo balobi: “Amen.”—N.D.E.] Soki tolingi kozala lokola Ye, na bongo, tosengeli kozala na ezaleli malamumu. Tosengeli kozala na yango, mpo na kozala lokola Ye. Yango loyembo ya liboso nalingaka ka—kati na banzembo, moko na oyo eleki malamumu, ezalaki, *Kozala Lokola Yesu*. Ee, soki nalingi kozala lokola Yesu, nasengeli kozala na ezaleli malamumu, pe na nzela oyo ekoki koleka longwa na ngai kino na bato. Mpo ete, “Nguya ebimaki na Ye, pe ekendeki na bato.” Ezaleli malamumu! Bongo, mpo ekoka kobima na yo, osengeli liboso kozala na yango. Soki ozali na yango te, ekobima pe te. Eloko ya kobima kati na yo ezali te.

¹⁴⁵ Bongo soki moto ameki kobimisa nguya kati na biso, pe chèque ezongisami “mbongo ekoki te”? Bomoni? Te, te, eloko ya kozua wana ezali te, baboi chèque yango. Moto atali yo lokola Moklisto, pe lobi amoni yo libanda kobika lokola mosumuki, akoki kozua ezaleli malamumu moko te kati na yango. Bomoni? Ya solo.

¹⁴⁶ Ezaleli malamumu esengeli kozala kati na biso. Soki tozui naino ezaleli malamumu te. . . Bongo soki tozui ezaleli malamumu ya solo, tokoki kobakisa yango likolo na kondima na biso. Yango nde etutu ya mobóko oyo elandi. Bongo, bosengeli liboso kozala na kondima. Kondima yango moko ekokoka te. Bosengeli. . . Petelo alobaki: “Bongo, bobakisa ezaleli malamumu na kondima na bino.” Bosengeli kozala na ezaleli malamumu, mpo na kobakisa yango na kondima na bino.

¹⁴⁷ Na bongo, sikawa, ekoki kozala ete, ntina bozali kozanga yango, ezali mpo mangomba mingi ya lelo bateyaka ete bosengeli na bino kozala na yango te, to mikolo na yango esili koleka. “Basengeli na bango kozala na yango te. Likambo bobele moko bosengeli kosala ezali kokota na lingomba. Iyo, mikolo yango esili koleka.”

¹⁴⁸ Ezaleli malamumu, moto nyonso ayebi, nini ezaleli malamumu elingi koloba, bomoni, pe tosengeli kozala na yango. Soki nguya ebimaki kati na Ye, mpo na kobikisa mwasi oyo azalaki kobela, Alingi pe komona ezaleli malamumu yango moko kati na Lingomba na Ye, mpo Azalaki ndakisa na biso. Pe soki Ye azalaki na nguya ya kopesa na bato, Alingi pe biso tozala na ezaleli malamumu ya

kopesa na bato. Bongo ezaleli malamumu ezali nini? Ezaleli malamumu ezali makasi, nguya.

149 Bato mosusu bandimaka ata nguya na Nzambe te. Balobaka: “Oyo—oyo—oyo wana esilá koleka. Eloko bobele moko bosengeli kosala, ezali kokomisa nkombo na yo na buku, pe komwangisama mai, to kosopelama mai, to kobabatisama, to likambo mosusu nini. Yango nde nyonso bosengeli kosala.”

150 Kasi Petelo alobaki awa: “Bakisa ezaleli malamumu.” Bongo, Petelo azali kolobela nde kotonga Ndako na Nzambe, bomoni, Tempelo na Nzambe, kotia yango na esika. Pe sima na bino kozala na ezaleli malamumu, bosengeli kozala na . . . Sima na bino kozala na kondima, bosengeli kobakisa ezaleli malamumu. Ya solo. Bozala na ezaleli mamalu mpo na mokili mobimba.

151 Nateyáká liteya moko, nakanisi, eleki pene na mibu ntuku mibale likolo na Misie Motei Lísi. Lísi, mokengeli. Nazuaki makomi yango esika Yesu alobaki: “Botala felele lísi, esalaka te, etongaka pe te. Kasi Nalobi na bino, Salomo, na nkembo na ye nyonso, alataki lokola moko na yango te.”

152 Botala felele lísi. Eutaka mosika, na nse ya potopoto. Pe miniti moko na moko na mokolo, esengeli komibimisa longwa na mabele. Bomoni? Bongo esalaka nini na nguya oyo ebendaka? Ekabolaka yango. Etalisaka kitoko na yango mpo na kosepelisa motali. Emifungolaka mpo na mafuta ya nzoi, mpo nzoi aya kozua eteni na ye. Emilelaka te. Ezali na yango mpo na kokabola. Ekozala boni soki nzoi ayei wana; mbongo ekoki te, mafuta na nzoi ezali te? Nzoi yango akomikwanza motó pe akoloba: “Oyo felele lísi ya ndenge nini boye?”

153 Ekozala boni soki moto moko ayei koluka lobiko, pe akei na lingomba oyo endimaka ete ntango na bikamwa esili koleka?

154 Ndenge Jack Coe alobaki mokolo moko. Akotaki na esika ya kolia moko, pe bakomaki na lokasa bazali na bilei mingi; abandaki kotanga yango, Mosuni ya ngombe pe bilei mosusu. Alobaki: “Nakolia Mosuni ya ngombe.”

“Ee, ezalaki mpo na lobi eleki. Tozali na yango te.”

155 Ekokaki kozala malamumu kotika lokasa yango pe kobima, bomoni, ya solo, mpo bazali na bango na biloko ya kolia te. Boye ekozala malamumu mpo na bino kokende na esika ya kolia oyo bazali na biloko ya kolia.

156 Pe moto na molimo, oyo azali kokola, azali na bosenga ya bilei. Ezali Liloba na Nzambe. Nandimaka Liloba moko na moko na Yango.

Nzambe abongisi mesa mpo basantu ya
Nzambe balia,
Azali kobenga baponami na Ye: “Boya kolia.”

Azali koleisa biso mana na Ye, Azali kokokisa
 mposa na biso nyonso,
 Oh, ezali malamau kolia elongo na Yesu ntango
 nyonso.

¹⁵⁷ Ya solo. Iyo, misie. Azali na Yango. Lingomba ezali na Yango, Lingomba ya Nzambe na bomoi, oyo etongami kati na moto abongi be, na boyebi ya Klisto. Bongo, sikawa osengeli kozala na ezaleli malamau.

¹⁵⁸ Bongo nalobaki, na ntango yango, bato basepelaka koyoka nsolo malamau. Ezali moyími te. Ezali na nsolo malamau. Liboso ekoka kobimisa nsolo malamau, esengeli kozala na yango. Liboso ekoka kobimisa mafuta ya nzoi, esengeli kozala na yango. Liboso ekoka kotalisa kitoko na yango, esengeli kozala na yango.

¹⁵⁹ Liboso na yo kokabola ezaeleli malamau, osengeli kozala na yango. Bongo, bakisa ezaleli malamau na kondima na yo. Amen. Bosoli? Tokoki kouvemela mingi likolo na yango, kasi ntango na biso ekosila noki. Kobakisa ezaleli malamau na kondima na yo. Boye, ya liboso ezali kondima, na sima ezaleli malamau.

¹⁶⁰ Na sima, ya misato, bobakisa boyebi. Boyebi, awa, elingi koloba te boyebi ya mokili, mpo yango ezali bolema mpo na Nzambe; kasi boyebi mpo na kososola, kososola (nini?) malamau na mabe. Na bongo, bokososola yango ndenge nini, soki bozali na boyebi ya Boklisto, ná ezaleli malamau pe kondima na yo? Bokososola soki Liloba ezali solo to lokuta. Pe soki bokoki kotia pembeni bindimeli na bino nyonso, ná kozanga kondima na bino nyonso, makambo nyonso bolobaka ete bosilá kosála, boye bozali na boyebi mpo na kondima ete Nzambe akoki kokosa te. “Tika maloba na moto nyonso ezala lokuta, kasi oyo ya Ngai ézala solo.” Bomoni? Sikawa, bozali kozua boyebi. Ezali boyebi oyo eleki likolo. Esengeli na bino te kozua ba-diplôme ya biteyelo, to makambo ya ndenge wana, mpo na kozua yango, mpo ba-nguya nyonso oyo ekopesamela bino na Nzambe, mpo na kotia yango likolo na mobóko ya kondima na bino, mpo bokoka kokóma na epimelo mobimba ya moto na Nzambe ya solo pe ya bomoi. Iyo, misie.

¹⁶¹ Bobakisa, bobakisa boyebi, ezali, boyebi ya Liloba na Ye. Bosengeli kondima yango bongo. Ndakisa, bosengeli kondima lelo ete. . . pe koyamba yango, ete ntango ya bikamwa eleki naino te. Boyebi ete makambo Nzambe alobaki, Nzambe akoki kokokisa yango.

¹⁶² Abalayama andimaki yango. Pe ntango azalaki na mibu mokama, abetaki ntembe te na kozanga kondima elaka na Nzambe. Botala ndenge batiolaki Liloba yango. Botala mobali oyo, ya mibu mokama, azali kozela bebé moko abotama na libota na ye, na mwasi ya mibu ntuku libwa. Bomoni? Elekaki pene na mibu ntuku mitano oyo abikaki elongo na ye ntango azalaki e—elenge mwasi, to moseka. Pe botala ye wana, mokongo na ye

esili kokufa. Pe libumu ya Sala esili kokufa. Pe elikia nyonso esilaki, mpo na oyo etali elikia. Kasi ata bongo, kozanga elikia, ye andimaki na elikia, mpo azalaki na boyebi ete Nzambe akoki kokokisa nyonso Alakaki.

¹⁶³ Sikawa, ntango bozali na yango ndenge wana, bobakisa yango likolo na kondima na bino. Ntango bozali na ezaleli malamumu ya solo, bobakisa yango na kondima na bino. Ntango bozali kotambola na balabala, bobika lokola Moklisto, bosala makambo lokola Moklisto, bozala Moklisto, bobakisa yango na kondima na bino. Ntango bozali na boyebi . . .

¹⁶⁴ Bokoloba: “Ee, sikawa, nayebi te soki Likomi *oyo* ezali mpenza solo. Sikawa, Misala 2:38 yango oyo, nayebi te ndenge ya kokokanisa yango na Misala 28:19. Nayebi te.” Malamumu. Ko—bobakisa eloko moko te, mpo bozui Yango naino te. Bomoni? Bokosala nini? Mpo, boyebi naino Nzambe malamumu te, ete Biblia Emitemelaka te. Botika yango pembeni. Bolobela yango lisusu te. Bomoni? Botika yango pembeni.

¹⁶⁵ Kasi, soki bokoki komona ete Makomi emitemelaka te, ete bokoki koloba bongo; pe bokomi komona, na nzela ya emoniseli ya Nzambe, ete Liloba mobimba ekomami na mabombami, pe bobele boyebi ya Nzambe nde ekoki komonisa Yango; na bongo, ntango bosololi pe bolobi, bondimi “amen” na Liloba moko na moko ya Nzambe, na bongo bobakisa yango na kondima na bino.

¹⁶⁶ Oh, obandi sikawa kokóma moto ya malamumu koleka. Bomoni? Ozali komata, omoni. Na nini? Na kondima, sima na ezaleli malamumu, na sima boyebi. Bomoni ndenge ezali kotonga moto yango? Bokoki komona ete nze—nzela ya kokima yango ezali te. Oyo nde nzela ya kokóma na epimelo mobimba ya Klisto. Iyo, misie.

¹⁶⁷ Mpo na kososola, kososola malamumu. Kososola soki ezali solo to lokuta, kondima Liloba na Nzambe. Kososola soki ezali solo to lokuta, soki nasengeli kosalela endimeli to kosalela Nzambe. Kososola soki ezali solo to lokuta, esengeli na ngai kobotama mbala na mibale to kokota na lingomba. Na ntango wana obandi. Kososola sembo, ntango motei alobi: “Ntango ya bikamwa esilá koleka.” Biblia elobi: “Yesu Klisto motindo moko, lobi, lelo pe libela.” Sikawa, okondima nani?

¹⁶⁸ Soki bolobi: “Nakopona Nzambe.” Sikawa, boloba yango kaka mpo na koloba te: “Ee, na—naponi yango,” éuta mpenza na motema na yo. Kasi, eloko moko kati na yo, kondima na yo ezali kopasola nzela. Yango wana mpenza. Kondima na yo ekoloba: “Nayebi Azali motindo moko. Amen. Nasili kotatola ete Azali motindo moko. Eloko moko te ekoki kotangola yango na ngai. Nayebi Azali solo.” Amen. Bongo, bakisa yango na kondima na yo. Fandisa yango likolo na mobóko. Ozali komata sikawa, ozali kokoba komata kino na Bokonzi. Okómi na esika yango sikawa. Malamumu.

¹⁶⁹ Sikawa, likambo elandi, motei akoyebisa yo, pe bato mingi baloba: “Ma . . . Makambo otangaka na Biblia, ezalaki mpo na eleko mosusu. Sikawa, nakoyebisa yo mpo na nini. Mpo ete lelo, tozali na bosenga ya makambo wana te. Tozali na bosenga na yango te. Bomoni? Esengeli na biso te. Tosengeli kosalela makambo wana te, kobikisama ya bo-Nzambe. Biso tosalelaka minoko na sika te, na lingomba, mpo—mpo na kobatela lingomba na biso alima. Pe tosalaka makambo *oyo* te.”

¹⁷⁰ Tokokóma na yango. Nakomaki Likomi moko awa na ntina na yango, bomoni, soki tosengeli lisusu kosala yango to te, sikawa.

¹⁷¹ Kasi awa alobaki: “Nayebi te. Tosengeli kosala yango te lelo. Likambo bobele moko nakanisi tosengeli kosala, tosengeli koyekola koloba malamumu liboso na bato. Tosengeli kokende kotalisa motó na biso epai ya monganga, mpo toyeba soki tokoki kotelema liboso na bato, soki tozali na mayele ekoki mpenza mpo na kosala yango, pe—pe bongo na bongo ndenge wana. Nakanisi . . . Pe tozali na ba-losambo oyo eleki minene. Totongi ebongiseli na biso.”

¹⁷² Tozali kotonga ebongiseli te. Nayei awa na ntongo oyo mpo na kotonga ebongiseli te. Klisto atíndá ngai ata moke te mpo na kotonga ebongiseli. Klisto atíndá ngai mpo na kotonga bato kino na epimelo ya Yesu Klisto, mpo bákoka kokóma kokabola nguya pe kozala efandelo ya Molimo, na nzela ya Liloba na Ye. Na nzela ya Liloba na Ye, bomoni, kotonga moto kino esika wana. Ezali te kotonga ebongiseli mpo ekoma lingomba monene koleka, kasi kotonga bato kino bákóma bana na Nzambe ya mibali pe ya basi. Yango wana nde likanisi. Bomoni? Bakisa na kondima na yo, ezaleli malamumu; na ezaleli malamumu na yo, bakisa boyebi. Ee, sikawa, okómi na esika moko.

¹⁷³ Sikawa soki babandi koloba: “Ee, tosengeli kondima yango lelo te.” Bosengeli mpenza na yango. Esengelami mpenza.

¹⁷⁴ Makomi ekoki kokosa te. “Pe ezali na ndimbola ya moto moko te,” Biblia elobaki. Bondima Yango ndenge Ekomami Wana. Bomoni? Bosengeli kozala na makambo oyo. Pe lolenge bobele moko bokokoka kozua yango, ezali kozala na boyebi ebotama-na-Lola. Pe boyebi ebotama-na-Lola ekotatola Liloba. Bomoni?

¹⁷⁵ Bosengeli kondima yango, kosala lokola-kondima te. Moko te kati na yango ezali lokola-kondima, bomoni, soki bomeki koloba: “Nazali na yango.” Kozala ndeke ya moindo te oyo azali komitiela nsala ya ndeke ya pembe, bomoni, mpo ekolongwa mbala moko. Yango ebimi na yango moko te. Babambi yango kobamba.

¹⁷⁶ Nakanisi esika Dawidi alobaki kuna, Nzembo 1: “Azali lokola nzete oyo ekonami pene na bitima na mai.” Boyebi, bokeseni ezali kati na kokónama pe kotiana, kobambama. Ezali

lokola nzete oyo ekóli, ekónamaki, misisa na yango ezindi pe epikami makasi. Nkoni ya kokauka oyo babambi wana, boyebi suka na yango te. Ezali na misisa te. Ezali na mobóko te. Bomoni?

¹⁷⁷ Ezali lokola bato oyo bautaka na likindo to esika moko, bomoni. Bazangi. . . “Ee, Docteur *Songolo* abulisaki ngai na mosala.” Yango ezali na ntina te koyeba ezalaki nani.

¹⁷⁸ Klisto aboti yo kati na yango, omoni, omoni, na nzela ya kondima na yo. Omoni? Obotami lisusu pe obotami kati na yango. Na bongo, sima na kobotama kati na yango, tala makambo Ye alingi yo kobakisa. Koba bobele kobakisa yango. Sikawa, toleka na oyo elandi.

¹⁷⁹ Sikawa, ezali na likambo mosusu tokoki kolobela likolo na boyebi oyo, boyebi ya bonzambe. Bomoni? “Na eleko oyo Biblia ebungisi ntina na Yango?” Bomoni, bango, bato mingi bayebisaka bino yango, ete Biblia elingi mpenza koloba bongo te. Soki Nzambe asenzelaka likolo na ngai, pe apamelaka ngai na masumu na ngai, pe soki nazali mwana na Nzambe, Asalaka yango. Asalaka bongo na bino, bana mibali pe [Eteni ezangi na bande—N.D.E.] bana basi. Soki osali mbeba, Akopamela yo. Bongo, soki Nzambe alandelaka yo boye, soki Asenzelaka likolo na yo pe Apamelaka yo, koleka boni Akosala bongo mpo na Liloba na Ye, oyo ezali ndakisa na yo, oyo ezali Ye moko!

Na ebandeli Liloba azalaki, pe Liloba azalaki mboka na Nzambe, pe Liloba azalaki Nzambe.

Pe . . . akómaki nzoto, pe afandaki kati na biso, . . .

¹⁸⁰ Liloba ezali emoniseli ya Yesu Klisto, Biblia elobi bongo, Klisto amimonisaka na Liloba na Ye. Pe soki Asenzelaki likolo na yo ntango obukaki mibeko oyo, Akweisaki yo mpo na yango, koleka boni Akosenzela na mobeko na Ye oyo ekweisaka yo! Amen.

¹⁸¹ Koba na yo, ndeko, koyebisa ngai makambo wana te!

¹⁸² Ngai nandimaka boyebi ya solosolo, ya Molimo Mosantu. Boyebi ya Molimo Mosantu ekondima “amen” na Liloba ntango nyonso. Soki ozui makambo oyo emonanaka lokola kotelemelana, kati na Biblia, fanda kimia pe yekola yango, kati na mabondeli ndenge wana. Pe na mbala moko, oyebi, Molimo Mosantu akobanda kokota na mosala. Sima na ntango moke, okomona yango kokokana, pe okososola yango. Bomoni? Yango nde boyebi.

¹⁸³ Bamosusu balobaka: “Ee, bongo, Biblia elobaki ete Azali motindo moko lobi, lelo pe libela.”

¹⁸⁴ Pe lingomba elobi: “Na lolenge moko, Azali motindo moko.” Aha! Aha! Osili kofungola nzela, bobele wana. Omoni? Iyo, misie. Te, misie. Azali motindo moko. Iyo, misie.

¹⁸⁵ “Yesu Klisto motindo moko lobi, lelo pe libela.” Bokeseni ezali te kati na Ye, ata moke te. Azali kobika kati na Lingomba na Ye, kosala makambo ndenge moko. “Sima na ntango moke,” ndenge nauti koloba yango, “sima na ntango moke, bamokili bakomona Ngai lisusu te, nde bino bokomona Ngai.” Mpo ete, Alobaki, “Nakozala elongo na bino, ata kati na bino, kino na suka ya mokili.” Alobaki lisusu: “Misala mizali Ngai kosala, bokosala yango pe lokola.” Alobaki lisusu: “Ngai nakozala Mowiti. Bino bokozala bitape.” Pe etape ebikaka bobele na Bomoi ya Mowiti. Nyonso oyo ezali kati na Mowiti emonanaka na nzela na etape. Nkembo! Boye, “Klisto motindo moko lobi, lelo pe libela.” Ekobota Bomoi ya Nkolo Yesu Klisto. Amen.

¹⁸⁶ Boyebi; ya mokili te (yango ebanzaka). Lolenge nyonso ya boyebi ya mokili ebanzaka. Bomoni? Kasi kondima ebanzaka te. Soki Nzambe akomonisa yo ete likambo *boye na boye* ekosalema, bato nyonso ya mayele na mokili bakoki koloba na yo: “Ezali bongo te. Ekoki kosalema te.” Yo okondima yango, ata bongo. Bomoni? Iyo, misie. Ebanzaka te. Biblia elobi: “Tobwakaka mabanzo.” Babanzaka na kondima te. Kondima ebanzaka te. Kondima eyebaka esika eteleme. Kondima emonisaka misala. Kondima etelemaka ngwi. Ekoki koningana te. Eloko moko te ekoki koningisa yango. Ata moto nani alobi *boye*, to *boye* na *boye*. Ekoningana ata moke te. Ekotelema bobele wana, kozela, kozela, kozela. Ekobongwana ata moke te. Ekotelema bobele wana.

¹⁸⁷ Nzambe ayebisaki Nowa ete makambo oyo ekosalema. Andimaki yango. Bomoni? Nzambe ayebisaki Mose ete makambo oyo ekosalema. Andimaki yango. Nzambe ayebisaki bayekoli ete makambo *boye na boye* ekosalema: “Bomata kuna, na Pentekote pe bozela.” Batikalaki bobele wana. Iyo, misie. Malamu.

¹⁸⁸ Sikawa, boyebi, bongo, boyebi ya mokili te, kasi ezali boyebi ya Lola. Pe boyebi ya Lola, ntango Nzambe azali liziba ya boyebi nyonso, pe Nzambe azali Liloba, na bongo, soki ozali na boyebi ya Lola, okondima Liloba, pe okobanza makambo nyonso na nzela ya Liloba.

¹⁸⁹ Bongo likambo ya mpako oyo ekomelaki lingomba, to ekomelaki ngai. Mokolo moko, ezalaki bango koyoka ngai, moko na bango alobelaki ngai. Alobaki ete nalobaki... “Bakokaki komona mbemba ata moko te.” Bongo, babandaki... .

¹⁹⁰ Nalobaki: “Ee, bongo, soki ezali na mbeba ata moko te, mpo na nini botiki ngai kimia te?” Bomoni? Bomoni? Pe nakobaki kolobela ye likolo na Makomi.

¹⁹¹ Alobaki, azalaki engambe mobali ya mbinga, na likaya na loboko, alobaki: “Misie Branham, ngai nazali moyekoli ya Biblia.”

Nalobaki: “Nasepeli koyoka yango.”

192 Alobaki: “Nalingi koyeba ntina ya bisalasala oyo, ozali kofutisa mbongo mpo na miswalé oyo otindaka bipai mosusu, bisalasala wana ya kobondela mpo na miswalé pe kotinda yango bipai mosusu, ‘bilamba oyo epakolami,’ ndenge obengaka yango, ‘bilamba.’” Alobaki: “Ozali kofutisa mbongo mpo na yango.”

Nalobaki: “Te, misie. Bafutaka mbongo mpo na yango te.”

Alobaki: “Ee, na ntina na bisalasala wana.”

193 Nalobaki: “Ozali kobenga yango bisalasala, misie. Outi koyebisa ngai kala mingi te ete ozali moyekoli ya Biblia.”

Alobaki: “Ezali bongo.”

194 Nalobaki: “Tangela ngai Misala 19:11.” Boyebi! Amikangaki ye moko na motambo, amekaki kobongola lisolo. Nalobaki: “Bongo, tangela ngai Yoane 5:14.” Akokaki kotanga yango te. Nalobaki: “Bongo, Yakobo 5:14.” Akokaki kosala yango te. Nalobaki: “Oyebi Yoane 3:16?” Bomoni? Boyebi, mayele ya mokili! Kasi ntango . . .

195 Alobaki: “Kasi, Misie Branham, ozali komeka kokata likambo yango na nzela ya Biblia. Tozali kokata yango na nzela ya mibeko ya mboka.”

196 Nalobaki: “Misie, ezali te été mibeko ya mboka oyo etongami likolo na Biblia? Boye, ezali bosembo.” Amen! Ya solo.

197 Boyebi; ya mokili te. Boyebi ya molimo, ya Liloba, koyeba eloko Nzambe alobaki, kosala eloko Nzambe alobaki, ezali solo. Bongo, soki ozali na yango pe okoki kondima makambo oyo nyonso, ete Azali motindo moko na makambo nyonso oyo Liloba elobi ete ezali solo, okondima “amen” na liloba moko na moko. Ezali mpenza solo. Bakisa yango na kondima na yo. Ezali mpenza solo. Iyo.

198 Soki moto moko ameki koloba na yo, ete: “Biblia ebungisa nguya na yango. Libatisi ya Molimo Mosantu ezalaka na yango te.” Ha-ha. Kobakisa yango te. Ekosimba te. Ekokweya. Ezali lokola kotia potopóto likolo na libanga, ekokangama te. Ekopanzana.

199 Bongo, bato bakoloba na yo: “Lelo oyo, tokoki kotiela Biblia motema te. Zala na bokebi sikawa. Komeka kondima yango te. Ekoki kozala solo te.” Boyokaka yango ntango nyonso. Elobeli wana: “Bokoki kotiela Biblia motema te.” Ee, soki—soki ozali na likambo yango na makanisi na yo, komeka—komeka kobakisa yango te, mpo ekosimba te. Ndako mobimba ekokweya mbala moko.

200 Esengeli kokangisama na Molimo Mosantu. Nalingi koloba kokangana, yango nde ekokangisa yango makasi. Pe eloko yango moko ekokangisa yango . . . Boyebi lolenge . . .

201 Chambre à air ya sufulu eumelaka ntango molai koleka eteni ya ndembo oyo babambí na yango. Soki eteni ya ndembo oyo

babambi kati ya piné ezui móto, ekosalema ete, ntango piné yango ekokoma na móto mpo etamboli mbango, bongo yango ekolongwa. Iyo, misie. Omoni?

²⁰² Yango nde esalemaka na bato mingi lelo. Bazali komeka kobamba boyebi na bango likolo na boyebi ya mokili, na kóle moke ya makambo ya nse, pe, ntango komekama eyei: “Ee, ntango mosusu namikosaki.” Omoni? Pe mopepe ekobima, pe sima na ntango moke ekosila mopepe. Koganga pe kopumbwaw-pumbwa na yo nyonso ekosunga yo ata moke te. Bato bazali komona yo bobele kati na bosoto moko wana. Omoni? Ezali solo.

²⁰³ Kasi soki otikali wana na móto oyo ekoki ya Molimo Mosantu, kino kokómisa yo ná ndembo yango eloko moko. Ezali nde yango. Yo ná ndembo bokomi eloko moko. Soki okotikala wana, pe yo ná elaka nyonso ya Nzambe bokomi eloko moko, na bongo bakisa yango na kondima na yo. Soki te, kobakisa yango pe te.

Okoloba: “Tokoki kotiela Liloba motema te.” Komeka kobakisa yango te.

²⁰⁴ Okoloba: “Bilaka oyo awa, ya libatizi ya Molimo Mosantu, ezalaki na ntina bobele mpo na bantoma zomi na mibale,” ndenge mangomba mosusu balobaka lelo, komeka kobakisa yango te. Wana nde esika mobóko na bango ezali, ekopanzána nyonso. Omoni? Lokola Uziya azalaki, lobi eleki na mpokwa, ntango amonaki mobóko ya moto ye atielaki motema, kopanzana nyonso, kobetama na bokono ya mbala, esungaki ye te. Bongo: “Kaka mpo na bantoma zomi na mibale, bobele bantoma zomi na mibale.”

²⁰⁵ Nazalaki epai ya Ndeko Wright...Nakanisi bazali kuna na sima, esika moko. Na mpokwa moko, ezalaki na motei moko kuna, nazalaki koloba, elongo na batei minei to mitano. Motei yango atelemaki pe alobaki: “Sikawa, balingami, nalingi koyebisa bino likambo moko. Oh, namoni bozali bato malamú.”

²⁰⁶ Nalobaki, nayebisaki moto moko, nalobaki: “Ezali—ezali ye oyo afandi kuna. Botala malamú.”

²⁰⁷ Bongo, Junior Jackson, kuna na sima, asilisaki koloba. Pe alobaki... azalaki koteya likolo na ngolu na Nzambe. Hólalá!

²⁰⁸ Azalaki kozela, na motema likolo. Atelemaki wana pe amekaki kososola. “Sikawa, nalingi koloba na bino ete Misie Branham oyo, azali motemeli ya Klisto.” Pe akobaki ndenge wana, mpokwa mobimba.

²⁰⁹ Batei mosusu babandaki...Nalobaki: “Bozela moke. Sikawa, boloba eloko moko te, bandeko. Ye azali bobele ye moko, kasi biso tozali mingi.” Nalobaki: “Botika ye sikawa. Asilisaki ngai mpenza lopo.” Nalingaki kotala likambo yango ngai moko, pe nayebaki te likambo ya kosala. Bomoni.

210 Bongo, alobaki: “Misie Branham azali motemeli ya Klisto,” pe akobaki koloba makambo nyonso oyo boyebi, mpo na yango. Alobaki: “Ye alobaki kuna: ‘Libatisi ya Molimo Mosantu.’” Alobaki: “Biblia elobi bobele bato zomi na mibale nde bazuaki Molimo Mosantu.” Mpo na kobikisama ya Bonzambe: “Bobele bantoma zomi na mibale nde bazalaki na kobikisama ya Bonzambe.” Alobaki: “Biso tolobaka esika Biblia elobi, pe tofandaka nye esika Biblia efandi nye.” Nazelaki pene na ndambo na ngonga kino akosilisa bilobáloba wana.

211 Nalobaki: “Zela moke. Nakomaki makambo mingi awa,” nalobaki, “tika ngai pe nayanola na misusu.” Pe ntango natelemaki, nalobaki: “Misie oyo, alobaki ete ‘alobaka esika Biblia elobi,’ lingomba na ye, ‘pe afandaka nye esika Yango efandi nye.’ Bino nyonso bozali batatoli. ‘Iyo.’” Nalobaki: “Ee, ye alobaki: ‘Bobele bato zomi na mibale nde bazuaki Molimo Mosantu.’ Biblia na ngai elobi ete bazalaki mokama na ntuku mibale, wana ya liboso.” Amen! Bobwaka lolenge ya boyebi wana libanda, bomoni, oyo azalaki koluka.

212 Nalobaki: “Bongo, nakanisi Polo azuaki Molimo Mosantu te, ntango ye alobaki azuaki yango.” Bomoni?

213 Nalobaki: “Kuna na...Ntango Filipino akendeki koteya Basamalia. Basilaki kobatisama na Nkombo na Yesu. Kasi, Molimo Mosantu akitaki naino likolo nabango te. Pe babengisaki Petelo ná Yoane, bayaki pe batielaki bango maboko, pe Molimo Mosantu akitaki likolo na bango. Nakanisi ezalaki bobele ba-zomi na mibale?”

214 Nalobaki: “Na Misala 10:49, ntango Petelo azalaki na ndako likolo, pe amonaki na emononeli ete bakokende na ndako ya Koloneli. Ezalaki Petelo koloba maloba oyo, Molimo Mosantu akitaki likolo na baoyo bazalaki koyoka Liloba.” Nalobaki: “Biblia ezali kokoba koloba. Lingomba na bino ezali wapi?” Ezali na baoyo bamibengaka. Ya solo. Bomoni?

215 Nalobaki: “Mpo na kobikisama ya Bonzambe, olobaki: ‘Bobele bantoma zomi na mibale nde bazalaki na kobikisama ya Bonzambe.’ Biblia elobi ete Etiene akendeki na Samalia, abenganaki milimo mabe pe abikisaki babéli, pe esengo monene ezalaki na engumba yango. Kasi azalaki moko na ba-zomi na mibale te. Azalaki ntoma te. Azalaki mosungi.” Amen. Amen.

216 Nalobaki: “Polo azalaki moko na ba-zomi na mibale te oyo bazalaki na ndako ya likolo, kasi azalaki na likabo ya kobikisa babéli.”

217 Nalobaki: “Botala naino makabo ya kobikisa babéli! Pe lisusu, mibu ntuku misato na sima, na Bakolinti, azalaki kokoba kotia na molongo likabo ya kobikisa babéli kati na Nzoto na Klisto.” Hólalá!

218 Bongo, lolenge wana ya boyebi, oyo boyekolaka na buku, ekozala malamú kobwaka yango na fúlu. Boya na boyebi oyo.

Ntango Nzambe alobi: “Azali motindo moko lobi, lelo pe libela,” boloba: “Amen.” Iyo, misie. Iyo, misie. Mpo na ba-zomi na mibale te; ezali mpo na moto nyonso. Ntango ozui ko—kondima ya ndenge wana, ntango kondima na yo ekomi koloba “amen,” na eteni moko na moko, na ntango wana okoloba: “Malamu,” bakisa yango likolo na yango.

²¹⁹ Ya minei. Tosengeli kosala noki, mpo ngai. . . Ezali kosala malamau mingi, kotelema awa, pe kolobela yango. Amen. [Ndeko moko alobi: “Tozali kosepela na yango.”—N.D.E.] Iyo. Ya minei. . . Natondi bino.

²²⁰ Bakisa “komipekisa.” Hólalá! Tokómi na komipekisa. Sikawa, bozuaki liboso kondima; bosengeli kozala na yango, mpo na kobanda. Na sima, bobakisa ezaleli malamau na kondima na bino, soki ezali lolenge malamau ya ezaleli malamau. Na sima bobakisa boyebi, soki ezali lolenge malamau ya boyebi. Sikawa, bokobakisa komipekisa.

²²¹ Awa, komipekisa elingi koloba te “kotika komela masanga,” to eloko mosusu. Te, te. Komipekisa ezali te lolenge ya kotika masanga, na likambo oyo te. Oyo ezali komipekisa ya Biblia, komipekisa ya Molimo Mosantu. Ezali moko na mposa mabe ya nzoto, kasi tozali kolobela komipekisa ya Molimo Mosantu. Elingi koloba, lolenge nini kokonza lolemo na yo, kozala moto ya bilobáloba te; lolenge nini kokonza ezaleli na yo, kozanga kotomboka ntango nyonso moto alobeli yo mabe. Hólalá!

²²² Botala, mingi kati na biso bakokwea liboso tobanda, boye te? Bomoni? Bongo, tozali komituna mpo na nini Nzambe azali kati na Lingomba na Ye te, kosala bikamwa pe makambo ezaláká kosalema. Iyo, misie. Bomoni?

²²³ Bobakisa makambo oyo. Likolo na yango bobakisa komipekisa. Oh, komipekisa, lolenge nini koyanola na boboto ntango balobeli yo na nkanda. Soki moto alobi: “Bino batúntuki oyo kuna!” Kowela kongumba maboko ya simisi na yo te. Bomoni? Yango te. Kasi loba na bolingo ya bonzambe, na komipekisa, na boboto. Bolingi kozala lolenge wana? [Losambo balobi: “Amen.”—N.D.E.] Soki bafingi yo, kozongisa te. Tika Ye azala ndakisa na yo.

²²⁴ Ntango balobaki: “Soki Ozali Mwana na Nzambe, bongola mabanga oyo ekóma mapa,” Akokaki kosala yango, pe kotalisa ete Azalaki Nzambe. Kasi Azalaki na komipekisa. Ntango babengaki Ye “Belezebula,” Alobaki: “Nakolimbisa bino mpo na yango.” Ezali bongo? Bapikolaki mandefu na Ye, pe babwakelaki Ye nsoi na elongi, pe balobaki: “Kita na ekulusu!”

²²⁵ Alobaki: “Tata, limbisa bango. Bayebi te nini bazali kosala.”

²²⁶ Bongo, Ye azalaki na likabo, Ayebaki makambo nyonso, mpo ‘te litondi na Bonzambe ezalaki kati na nzoto na Ye. Bamonaki Ye kosala bikamwa, koyebisa bato mabe na bango,

pe bongo na bongo, ndenge wana. Bazingaki Ye eteni ya elamba na motó ndenge wana, kozipa miso na Ye, pe babetaki Ye lingenda na motó, pe balobaki: “Sakola, yebisa biso nani abeti Yo. Tokondima Yo.” Bomoni? Azalaki na komipekisa.

²²⁷ Sikawa, soki ozali na yango ndenge wana, bakisa yango na kondima na yo. Soki ozali naino kotomboka pe kopesa biyano mabe, kosuana, kosilika, kobendana, ha-ha, ozali na yo na . . . Okoki kobakisa yango te, mpo ekobakisama te. Omoni? Ekosangana te. Okoki te kozua eteni ya ndembó, oyebi, pe ósangisi yango na eteni ya ebende. Ekosimba na yango te. Te, esengeli kozala pete-pete, lokola ndembó. Omoni? Soki kondima na yo pe komipekisa na yo ekómi lolenge moko na komipekisa ya Molimo Mosantu oyo Ye azalaki na yango, na bongo ekosangana na Ye. Obakisami na yango.

Soki ezaleli malamau na yo ekokani na ezaleli malamau na Ye, na bongo ekobakisama na yango.

²²⁸ Soki boyebi na yo ekokani na boyebi na Ye: “Nayei kosala mokano na Yo, e Nzambe.” Omoni? Ná Liloba ya Tata, Alongaki milimo mabe nyonso. Likolo pe nse ekoleka, kasi Liloba ekoleka te. Omoni? Soki ozali na boyebi ya lolenge wana, ekosangana na kondima na yo.

²²⁹ Soki ozali na lolenge malamau ya komipekisa, lokola Ye, ekosangana. Soki ozali na yango te, bobele kondima ya ndambo ya bomoto, to komipekisa ya lokuta: “Oh, esengelaki nabeta ye bibotu, kasi—kasi ntango mosusu ekozala malamau te, mpo bakoki kotia nkombo na ngai na zulunale mpo na yango.” Wana ezali lolenge ya komipekisa Azali kolobela te. Komeka kobakisa yango te. Ekosimba te. Kasi soki okoki mpenza, na bobolo ya motema, kolimbisa moto nyonso, kofanda na yo kimia, kobosana yango, omoni, na ntango wana ekosangana. Okoki kobakisa yango na kondima na yo. Fiuu!

²³⁰ Ezali kokamwa te ete lingomba ezala na bozangi ya boye. Ezali boye te? Kokamwa ezali te. Nakoki koloba: “Bobongola mitema pe bobatisama, ndenge Biblia elobi, na Nkombo na Yesu Klisto.” Pe mondimi mpenza ya Bonzambe misato akondima yango te, akoloba: “Tala motemeli ya Klisto oyo. Azali moto ya Nkombo na Yesu. Andimaka Yesu Ye moko.” Keba, ndeko, nakomituna soki komipekisa na yo ezali wapi sikawa. Omoni? Mpo na nini okoki koya te koloba: “Totala likambo oyo elongo, Ndeko Branham. Nakosepela koyoka ndimbola na Yango?” Omoni? Na sima, yaka pe yoka Yango. Na bongo, soki Yango etiami liboso na yo, na sima okei na yo; to—tokokoma na yango na ntango moke, na “bosantu,” omoni. Kasi soki o—soki otomboki, pe okomi kozua mikano na lombangu, ha-ha, ezali—ezali yango te. Omoni? Ozali na komipekisa ya Biblia te, ntango osali bongo; lolenge ya koyanola. Bongo, soki ozali na nyonso oyo, okoki kobakisa yango na kondima na yo.

²³¹ Bongo, sima na yango, ya minei, okobakisa motema molai na kondima na yo. Soki ozali na kondima “ekobota motema molai,” Biblia elobi yango. Omoni? Bongo, *oyo* ezali motema molai. Sikawa, yango nde likambo elandi mpo na kotonga epimelo oyo. Boyebi, Nzambe azali na bisalelo ya solosolo mpo na Ndako na Ye.

²³² Bomoni eloko tozali kozanga, ndeko mobali, ndeko mwasi? Bomoni? Bomoni ntina nini, esika tokómi? Iyo, misie. Bomoni? Tozali na nkembo, togangaka, ná makambo mosusu, mpo tozali na kondima. Kasi, soki tokómi na makambo *oyo*, Nzambe akoki kotonga biso te kino na epimelo wana. Bomoni? Akoki te. Akoki kokatisa biso kino na esika ya lolenge wana te. Tozali na makambo nyonso oyo mosusu. Tokweaka, toselimwaka na yango. Bomoni? Akoki kotonga Lingomba na Ye te.

²³³ Motema molai na nini? Motema molai ya ndenge nini? Ya liboso, esengeli kozala na motema molai na Nzambe. Soki ozali solo na kondima ya solosolo, okozala pe na motema molai ya solosolo, mpo kondima ebotaka motema molai. Soki Nzambe alobi likambo, ondimi yango. Esili. Ozali na motema molai.

²³⁴ Okoloba: “Ee, nasengaki lobi na mpokwa ete Abikisa ngai, kasi na ntongo oyo, nazali kokoba kobela.” Hólalá! Motema molai nini wana?

²³⁵ Nzambe alobaki na Abalayama, kasi sima na mibu ntuku mibale na mitano, ata elembo moko ezalaki te. Akobaki bobele kondima. Azalaki na motema molai na Nzambe. Ha-ha.

²³⁶ Botiaka Ye ntango nyonso liboso na bino. Botika Ye azala na likambo ekolanda. Bokoki koleka liboso na Ye te, na bongo botika Ye azala liboso na bino. “Alobaki yango, pe ekosalema.” Bomoni? Botika Ye azala liboso na bino. Ya solo.

²³⁷ Nowa azalaki na motema molai. Iyo. Nowa azalaki mpenza na motema molai ya bonzambe. Nzambe alobaki: “Nakoboma mokili oyo na mpela,” pe, na yango, Nowa ateyaki mibu nkama na ntuku mibale. Atondaki na motema molai. Ata mamwe moke ekitaki na Likolo te. Eloko moko te. Ezalaki bobele putulu lokola na ebandeli, mibu nkama na ntuku mibale, kasi azalaki na motema molai.

Boye nde, Nzambe amekaka motema molai na yo. Ya solo. Nzambe amekaka yango.

²³⁸ Sima na Ye kosolola na Nowa, bongo Alobaki: “Nowa, Nalingi okende kokota na masuwa. Ngai nakokamba banyama kuna na kati, pe Na—Nalingi okota. Omata na likolo mpenza, mpo otalaka libanda, na lininisa ya likolo. Sikawa, Nalingi okota kuna. Nalingi oyebisa bato oyo: ‘Lobi, likambo nazalaki koteya mibu nkama na ntuku mibale, ekokokisama.’ Malamu, kende koyebisa bango yango.”

239 Elembo ya liboso ezalaki nini? Nowa akotaki na masuwa. Mbula ezalaki te. Nowa amilengelaki, pe alataki elamba ya mbula, pe nyonso wana, mpo atalaka libanda, ntango na ntango. Amilengelaki. Kasi, mokolo elandaki . . .

240 Nakanisi ete akokaki koyebisa libota na ye, ná basi ya bana na ye pe bango nyonso, alobaki: “Hólalá! Lobi bokomona likambo moko oyo bomona naino te. Mpo ‘te, likolo mobimba ekoinda. Ekozala na nkake pe mikalikali. Mopanga monene ya Nzambe ekopasola likolo. Akopesa etumbu na basumuki wana, baoyo baboyaki biso, mibu nkama na ntuku mibale nyonso oyo. Bino botala, pe bokomona.” Bomoni?

241 Bandimi mosusu ya maloba, boyebi, balekaka na bango na nzela, kasi bakotaka awa te, boyebi. Bo—bozalaka na bango, boyebi. Na bongo ba—bayaki wana, balobaki: “Ee, ntango mosusu mobangé oyo akoki koloba solo, boye tokende kuna pe tozela mwa mikolo, to tozela ntango moke kino na ntongo, pe totala.”

242 Mokolo elandaki, esika ya mapata ya moindo, tala moi ebimaki lokola momesano. Nowa atalaki libanda. Alobaki: “Hé, ata lipata moko te.”

243 Moto oyo ayaki wana, alobaki: “Ah, nayebaki ete ozali moko na bango. Omoni, ozali kolekaleka awa.”

244 “Ee, limbisa ngai, misie. Ha-ha. Ntango mosusu na—na—na, oyebi, nazalaki na nsai na motema, oyebi. Ezali lokola, omoni. Ha-ha-ha.”

245 Kasi, Nowa, azalaki na motema molai. Alobaki: “Soki esalemi lelo te, ekosalema lobi.” Mpo na nini? Nzambe alobaki bongo.

“Ayebisaki yo yango ntango nini, Nowa?”

246 “Esili koleka mibu nkama na ntuku mibale. Nakomi kino awa, na bongo, sikawa, nazali se kozela awa.” Bomoni yango? Sima na ntango moke . . .

247 Tomoni, Nzambe akomi kino awa, azali pe kozela Lingomba, kasi Ekokóma wana. Bomitungisa te. Alakaki Yango.

248 Tozalaki kozela lisekwa ntango nyonso oyo. Ekosalema. Bomitungisa te. Nzambe alakaki yango. Bozela na motema molai. Bokozua mpongi, eko . . . Bokoki kozua mwa mpongi moke liboso ésalema, kasi bokolamuka na ntango yango. Alakaki yango, bomoni. Mwa mpongi, bomoni, tobengaka yango mwa mpongi ya liwa, boyebi. Tobengaka yango liwa, bobele mwa mpongi moke, to kolala kati na Klisto. Kokufa kati na Klisto ezalaka te. Bomoi na liwa ezalaka elongo te. Bomoni? Tozuaka bobele mwa mpongi, mwa mpongi oyo baninga na biso bakoki kolamusa biso na yango te. Bobele Ye nde akoki kolamusa biso. “Akobenga, pe ngai nakoyanola Ye,” ndenge Yobo alobaki. Yobo

azali kolala, esili koleka lelo mibu nkoto minei. Bomitungisa te. Ako—akolamuka. Bomitungisa te. Azali bobele kozela.

249 Nowa azelaki. Mokolo ya minei elekaki. Mbula te. Ezali malamumu. Ekosalema.

250 Nakoki koyoka Mama Nowa koya koloba: “Papa, ezali ko- . . . ?”

“Koloba bongo te.”

251 Azalaki na motema molai, mpo azalaki na kondima. Iyo, misie. Azalaki na ezaleli malamumu. Azalaki na boyebi ete Nzambe alobaki solo. Azalaki na komipekisa. Atombokaki te, koloba: “Ee, nayebi te ntina na makambo nyonso oyo. Nabungisi lokumu na ngai nyonso kuna.” Te, te. “Bato bazali kosolola na ngai lisusu te. Nakende kuna pe nazongela makambo yango lisusu.” Te, te. Azalaki na motema molai. Nzambe alakaki. Nzambe akosala yango. Nzambe akosala yango, mpo Nzambe alobaki bongo.

252 Pe nakoki komona mwana na ye koya koloba: “Papa, oyebi. . .” Azalaki kosimba-simba suki na ye ya milai ya mpembe, boyebi. Pe azalaki na mibu nkama na nkama, boyebi, afandaki wana. Alobaki: “Nayebi yo ozali nkoko ya kala. Na—nalingi yo, papa. Kasi, ekoki pe kosalema ete omikosaki mwa make?”

“Oh, te. Te.”

“Mpo na nini?”

“Nzambe alobaki bongo!”

253 “Ee, papa, esili koleka mikolo motoba oyo tofandi awa. Tofandi kati na masuwa monene oyo ya kala, ya kokauka, tofandi bobele awa. Pe epakolami na mpaka, na kati pe libanda. Pe tolekisi mibu nyonso oyo mpo na kotonga yango. Pe yo ozalaki wana koteya, kino suki na yo ekómi mpembe pe obimi libandi. Sikawa ya wana, ozali komeka koloba *boye na boye*. Pe bato bazali koseka, kobamba yango batomate ya kopola pe biloko ndenge na ndenge. Tala naino malamumu makambo ozali kosala. Ee, oyebi. . .”

“Zala motema molai, mwana.”

“Olobi solo mpenza?”

“Mbula ekobeta!”

Bokilo na ye alobaki: “Tata, oyebi. . .”

“Mbula ekobeta!”

254 “Kasi tozeli pe mingi, mibu nyonso oyo. Tozalaki komilengela. Pe eleki mposho moko, oyebisaki biso ete mbula ekobeta. Pe tozali awa na kati, bikuke nyonso ekangami, tozali kotambola-tambola awa na kati, pe moi ezali kongala bobele ndenge ezalaka.”

“Kasi mbula ekobeta!”

“Oyebi ndenge nini?”

“Nzambe alobaki bongo!”

²⁵⁵ Sikawa, soki okómi bongo, bakisa yango. Kasi soki okómi naino bongo te, komeka—komeka kobakisa yango te. Ekosimba te. Ekosimba te mpo na kobikisama. Ekosimba te mpo na eloko mosusu. Omoni? Esengeli kosangisana na eloko mosusu oyo ekoki kosangana na yango. Ya solo. Osengeli kobakisa yango. Motema molai ná elaka na Nzambe. Iyo, misie. Nowa andimaki yango. Pe azalaki na motema molai na Nzambe, mibu nkama na ntuku mibale.

²⁵⁶ Mose, azalaki na motema molai na Nzambe. Iyo, misie. “Mose, Nasili koyoka kolela ya bato na Ngai. Nasili komona monyoko na bango. Nakiti mpo na kosikola bango. Natindi yo kuna.”

²⁵⁷ Pe kobendana moke ezalaki kati na ye ná Nzambe, pe Nzambe alakisi ye nkembo na Ye. Alobaki: “Nakei.” Bobele ntango amonaki nkembo na Nzambe, bomoni, azuaki kondima.

Alobaki: “Eloko nini ezali na loboko na yo, Mose?”

Alobaki: “Lingenda.”

Alobaki: “Bwaka yango na nse.”

Ebongwanaki nyoka. Alobaki: “Hólalá!” Abandaki . . .

²⁵⁸ Alobaki: “Kamata yango, Mose. Soki Nazali na makoki ya kobongola yango nyoka, Nakoki kozongisa yango lisusu.”

²⁵⁹ Ah! [Ndeko Branham abeti maboko mbala misato—N.D.E.] Amen! Soki Nzambe akoki kopesa ngai bomoi ya mokili oyo, Akoki pe kopesa ngai Bomoi ya molimo! Soki Nzambe akoki kopesa ngai mbotama ya liboso, Akoki pe kopesa ngai Mbotama ya mibale! Amen! Soki Nzambe akoki kobikisa *songolo*, na kobikisama ya Bonzambe, Akoki pe kosekwisa ye mpo na nkembo na Ye, na mokolo ya suka. Ya solo.

²⁶⁰ “Nakoki kobwaka lingenda oyo na nse pe kobongola yango nyoka. Nakoki pe kozongisa yango lingenda. Kamata yango na mokondo.”

²⁶¹ Mose asembolaki loboko pe asimbacki yango. Yango wana, lingenda. Bongo, abandaki kobakisa boyebi. Bomoni?

“Sikawa, eloko nini ezali na loboko na yo, Mose?”

“Eloko te.”

“Tia yango na ntolo na yo.”

²⁶² “Malamu. Eloko nini . . .” Mpembe na malali ya mbala. “E Yawe, tala loboko na ngai!”

“Zongisa yango na ntolo na yo, Mose.”

²⁶³ Azongisaki yango *boye*, ezongaki lokola . . . Bongo, abandaki kobakisa yango *boye*, bomoni. Iyo, misie.

264 Akómaki kuna. Pe kobendana ya liboso. . . Akómaki kuna. Ayaki wana pe alobaki: “Yawe Nzambe alobi: ‘Tika bato na Ngai bakende.’ Falo, nalingi oyeba yango. Nayei lokola ntoma na Nzambe. Osengeli kotosa ngai.”

265 Falo alobaki: “Kotosa? Oyebi ngai nazali nani? Ngai nde Falo. Natosa yo, yo moombo?”

266 Alobaki: “Soki otosi ngai te, okokufa. Pona likambo yo olingi.” Mpo na nini? Ayebaki likambo azalaki koloba. Azalaki na etinda. Azalaki kuna na nse. Asololaki na Nzambe. Azalaki na kondima. Ayebaki esika atelemaki.

“Olingi ngai natosa yo? Longwa awa!”

“Nakolakisa yo.”

“Lakisa ngai elembo.”

Abwakaki lingenda na nse; ebongwanaki nyoka.

267 “Oh,” alobaki, “kisoloka ya pamba pamba boye! Boya naino awa. Boya awa, Yane, yo na Yambele, bobwaka mangenda na bino na nse.” Babwakaki yango na nse, pe ebongwanaki nyoka.

268 Alobaki: “Sikawa, yo moto mpamba oyo, oyei awa epai na ngai, Moezipito, falo ya Ezipito. Pe oyei awa na mwa kisoloka ya pamba pamba boye, na makambo ya pamba,” boyebi, lokola kotanga makanisi. Boyebi likambo nalingi koloba. Nakanisi bozali kososola yango. “Telepatí ya makanisi to eloko moko, bomoni, iyo, oyei awa ná eloko ya ndenge wana.” Alobaki: “Ee, biso pe tokoki kosala makambo yango moko.”

269 Mose asalaki nini? Alobaki te: “Oh, Misie Falo, li—limbisa ngai, misie. Nakozala moombo na yo.” Te, misie.

270 Afandaki kimia. Amen. Tikala bobele wana. Azalaki na ntembe ata moke te na motema na ye, Nzambe alobaki: “Fanda kimia. Nakolakisa yo eloko moko.” Soki osali mpenza likambo Alobelaki yo kosala, ata makambo ekoki komonana mabe; fanda kimia, zala na motema molai.

271 Mose alobaki: “Oyebi, ntango natiaki mobóko wana, motema molai etiamaki likolo na yango, bongo nakozela na ngai mpo na komona likambo Nzambe akosala.”

272 Na sima, banyoka wana, ebandaki konguluma, kofúla pe kobeta piólóló moko na mosusu. Mbala moko, nyoka ya Mose abandaki: “Kyu, kyu, kyu,” pe amelaki bango nyonso. Azalaki na motema molai.

Baoyo batalelaka Yawe, bakoza nguya ya sika,

Bakopumbwa likolo na mapapu lokola mpongo.

Ezali bongo [Losambo balobi: “Amen.”—N.D.E.] Bomoni? Iyo.

Bakopota mbangu pe bakolemba te,
bakotambola pe bakosenzwa te.

Bomoni, botalela bobele Yawe. Bozala na motema molai. Bomoni? Iyo, misie.

273 Bongo Yisalaele basengelaki kobima. Kobendama monene eyaki, pe Mose azelaki.

274 Na sima, akomaki na biliki. Ezali bobele mobembo ya mikolo misato to minei. Ezali bobele na ntaka ya kilometele ntuku motoba kolongwa esika ye akatisáká, kino esika bakatisaki lisusu. Kasi, Mose, kati na biliki, azelaki mibu ntuku minei. Motema molai. [Ndeko Branham aseki—N.D.E.] Amen. Ya solo. Azelaki mibu ntuku minei. Oh! Iyo, misie.

275 Bisu pe tosengeli kozala na motema molai moko na mosusu. Bomoni? Mbala moko. . . Tokómaka—tokómaka mpenza na motema mokuse bamoko na bamosusu. Tokanisa ete tosengeli kozala lokola Mose. Mose azalaki na motema molai na bato. Botala, yango nde esalaki ete bakatisa te. Bomoni? Soki ozali komeka kosala likambo moko. . .

276 Ndakisa, namekaki kondimisa Nsango oyo na losambo oyo, komona ete mondimi moko na moko ya losambo oyo akóma *Boye*. Ezali mpasi kosala yango. Namekaki kozala na motema molai; mbula ntuku misato na misato yango oyo. Bomoni? Kozala na motema molai. Basi bazali kokoba kokata suki na bango, kokoba ndenge moko. Kasi, esengeli kozala na motema molai. Bomoni? Esengeli kozala na motema molai. Kozela. Esengeli. Soki ozali na yango te, komeka kotonga likolo na *awa* te. Kozala na motema molai.

277 Ata na ntango moko, ntango batomboki yango bazangaki motema molai, basalisaki Mose kosala libunga moko. Kasi, ata bongo, na ntango ya kosukisa likambo, Nzambe alembaki makambo na bango. Alobaki: “Kabwana na bango, Mose. Nakoboma bango nyonso oyo, mpo na kobandela mosala.”

278 Amibwakaki na kati-kati, pe alobaki: “E Nzambe, kosala yango te.” Ezali nini? Motema molai epai na bato oyo batombokelaki ye.

279 Nazali komituna soki tokoki kosala yango? Soki okoki te, komeka kotonga *awa* te, mpo e—ebongwani te, omoni. Ezali lolenge yango nde ya liboso esanganaki na *oyo*, pe ezali lolenge yango nde nyonso mosusu esengeli kosanganisama. Soki te, okokóma na epimelo ya efandelo ya Nzambe na bomoi te, soki ozangi motema molai, motema molai, moko na mosusu. Malamu.

280 Bana na Baebele wana bazalaki na motema molai. Ya solo, bazalaki na yango. Nzambe alakaki bango, ayebisaki bango: “Bokokumbamela ekeko moko te.” Kasi bazalaki na motema molai. Balobaki: “Nzambe na biso azali na makoki. Kasi, ata bongo, tokokumbamela ekeko na bino te.” Motema molai,

bayebaki yango, ete Nzambe akosekwisa ye lisusu na mikolo na suka.

²⁸¹ Sima na manso, bomoi oyo ezali mpenza na ntina te. Bomoni? Nzambe akosekwisa yango na mikolo na suka. Kasi mpo na kokumbamela ekeko, tokosala yango te. Sikawa, tokopesa na Kaisala oyo ya Kaisala, kasi, soki Kaisala amikotisi na makambo ya Nzambe, Nzambe azali na esika ya liboso.

²⁸² “Nzambe alobaki: ‘Bokumbamela ekeko wana te.’ Pe nakosala yango te. Nzambe na biso azali na makoki ya kosikola biso. Soki Asali yango te, nakokumbamela ekeko yango te.”

Alobaki: “Malamu, litumbu na móto yango wana.”

²⁸³ “Ee,” alobaki, “oh, nakanisi, mbula makasi ekobeta na butu pe ekozimisa móto yango.” Kasi esalemaki te. Azalaki na motema molai.

²⁸⁴ Na ntongo elandaki, ntango bamemaki bango liboso na kosambisama, Nabukadanesala afandaki wana. Alobaki: “Malamu, baninga, bozali komikanisela ete ngai nazali mokonzi na bino?”

“Na ntembe te. E mokonzi, bika mpo na libela.”

“Sikawa, bokumbamela ekeko na ngai.”

“Oh, te.”

²⁸⁵ “Ee, bokozikisama na móto. Bozali bato na mayele. Bozali na bwanya. Bozalaki lisungi monene mpo na biso. Bozalaki lipamboli mpo na bokonzi na biso. Bokoki kososola te ete nalingi mpenza kosala yango te? Kasi napesaki mobeko awa, pe esengeli kotosama. Nalingi mpenza te kobwaka bino kuna na kati. Oh, mibali, likambo nini na bino?”

²⁸⁶ “Nayebi ete ezali komonana malamumu. Kasi, Nzambe na biso azali na makoki ya kosikola biso. Kasi ata bongo. . .” Bazalaki na motema molai.

²⁸⁷ Babandaki komata emateli. Bazalaki kotalana kati na bango. “Ezali malamumu. Malamumu.” Bazalaki na motema molai. Batiaki litambe moko, Nzambe azalaki wana te. Matambe mibale, Azalaki wana te. Matambe misato, matambe minei, matambe mitano, bakobaki kokende, Azalaki kaka wana te. Pe mbala moko akoti kati na litumbu ya móto. Bazalaki na motema molai. Kasi Azalaki wana. Bomoni? Bobele móto moke ezuaki bango, mpo na kozikisa ba-nsinga ekangaki maboko pe makolo na bango. Na sima, ntango akómaki na nse ya libulu, Azalaki wana. Bomoni? Bazalaki na motema molai.

²⁸⁸ Daniele ndenge moko. Daniele azalaki na motema molai. Ya solo. Alingaki kotika te. Te, misie. Asalaki nini? Ata ndenge nini, afungolaki maninisa pe abondelaki. Ezalaki likambo Nzambe asengaki. Azalaki na motema molai. Azalaki kotalela Nzambe, koyeba ete Nzambe azalaki na makoki ya kobatela Liloba na Ye.

Babwakaki ye na libulu ya ba-nkosi, balobaki: “Tokotika ba-nkosi balia yo.”

²⁸⁹ Alobaki: “Ezali malamumu.” Azalaki na motema molai. Mpo na nini? “Ee, nazalaki kotalela Nzambe, ntango nyonso oyo. Soki esengeli na ngai kozela lisusu mibu nkoto na nkoto, nakosekwa lisusu na mokolo ya suka. Boye, nazali na motema molai, nakozela.”

²⁹⁰ Polo azalaki na motema molai. Ya solo mpenza. Botala likambo Polo asengelaki kosala. Pe olobi ozali na motema molai!

²⁹¹ Toloba nini mpo na bato na Pentekote? Bobele na ntango oyo baawaki etinda: “Bozela kino,” bomoni, “bozela kino bokolatisama na Nguya.” Ntango boni? Bazalaki na mituna ya kotuna te, ekozala ntango boni? Eyano na bango ezalaki bobele: “Bozela kino.”

²⁹² Bamataki kuna pe balobaki: “Malamu, bandeko, ntango mosusu sima na miniti zomi na mitano, Molimo Mosantu akoya likolo na biso pe tokozua mosala na biso.” Miniti zomi na mitano eleki, moto moko te. Mokolo moko eleki, eloko te; mibale, misato, minei, mitano, motoba, nsambo.

²⁹³ Bamosusu kati na bango bakokaki koloba: “Hé, bomoni te ete tosili kozua Yango?”

“Te, te, te, te.” Ezali bongo. Te. Ya solo.

²⁹⁴ “Ekozala malamumu bobima libanda, bandeko.” Moyini alobaki: “Bo—bo—boyebi ete bosili kozua oyo bolingi mpenza. Bokende kobanda mosala na bino.”

²⁹⁵ “Te, te, te. Naino tozui Yango te. Mpo ete, Alobaki: ‘Ekosalema ete, likambo oyo ekokokisama na ntango na suka: Na bibebu na likukuma pe na minoko mosusu nde Nakoloba na bato oyo, yango Kopema oyo Nalobaki,’ bomoni, Yisaya 28:19.” Alobaki: “Ezali—ezali Yango, bo—bokozua Yango ntango. . . Ee, ntango Ekoya, tokoyeba. Ntango ekoya, tokoyeba. Tokoyeba yango: ‘Elaka ya Tata.’” Azalaki kuna mikolo libwa. Bongo na mokolo ya zomi: “Tozalaki wana.” Bazalaki na motema molai, kozela.

²⁹⁶ Sikawa, soki ozali na motema molai ya boye, sima na Nzambe kopesa yo elaka pe omoni yango na Biblia: “Ekómi ya ngai,” bongo, zela. Bongo, soki ozali na motema molai ya boye, bakisa yango likolo na kondima na yo. Omoni mosanda nini okómi sikawa? Sikawa, ozali komata kino *awa*. Malamumu. Likongá ya saa ezali pe kotambola, boye te? Malamumu. Malamumu. Bakisa yango na kondima na yo.

²⁹⁷ Botiaka Ye ntango nyonso liboso na bino, bobosanaka te, Ye nde apesaki elaka. Ngai napesaki elaka te. Mokengeli apesaki elaka te, to Ndeko Neville. Motei mosusu te apesaki elaka. Ezalaki sángo to pápa te. Ezalaki moto ya mokili oyo te. Nzambe nde apesaki elaka, pe Nzambe azali na makoki ya kokokisa

nyonso Ye alakaki. Malamu. Soki ozali na kondima ya boye, koyeba ete Nzambe alakaki yango! Okoloba: “Ndeko Branham, nazali kobela. Nazali na bosenga ya kobikisama.” Yamba yango. Ezali likabo epesameli yo, iyo, misie, soki okoki kondima. “Ee,” okoloba, “nandimi mpenza.” Boye, bosana yango. Esili. Esili na yango. Omoni?

²⁹⁸ Kozala na motema molai, soki bozali na motema molai. Soki te, bokokweisama na Ndako yango, bomoni. Ekokweisa nyonso oyo etikali, likambo moko wana. Esengeli kozala na yango. Kobakisa yango te, mpo, ekobuka ndako na yo soki ozangi motema molai, soki ozangi ezaleli malamau ya kobakisa likolo na kondima, oyo yo olobaka ozali na yango. Pe soki ozali na kondima te, pe omeki kobakisa ezaleli malamau likolo na yango, ekobuka kondima na yo. Omoni? Okoloba: “Ee, sikawa, zela miniti moke. Ntango mosusu, nyonso oyo ekoki kozala na yango libunga. Ntango mosusu Nzambe azali Nzambe te. Ntango mosusu Nzambe azalaka te.” Omoni, ekobuka yango na biteni mibale. Omoni?

²⁹⁹ Kasi soki ozali na kondima ya solosolo, bakisa ezaleli malamau ya solosolo na yango, na sima boyebi ya solosolo, na sima komipekisa ya solosolo, na sima motema molai ya solosolo. Omoni? Ozali bebele komata se komata. Malamu.

³⁰⁰ Ya mitano, bakisa bonzambe. Hólalá! Bonzambe esengeli kobakisama. Bonzambe elingi koloba nini? Natalaki na buku ya maloba minei to mitano, kasi namonaki ata ndimbola na yango te. Na suka, nazalaki epai ya Ndeko Jeffrie, tomonaki yango na—na buku ya maloba moko. *Bonzambe* elingi koloba, “kozala lokola Nzambe.” Hólalá! Sima na yo kozua kondima, ezaleli malamau, boyebi, komipekisa, motema molai, na bongo zala lokola Nzambe. Fiuu!

³⁰¹ Okoloba: “Nakoki kosala yango te, Ndeko Branham.” Oh, iyo, okoki.

³⁰² Nakotangela bino naino mwa Makomi awa, na miniti moke. Matai 5:48. Tokokamata oyo boye pe tokotala nini yango elingi koloba, Matai 5:48, mpo totala soki moto asengeli kozala lokola Nzambe. Boyebi ete Biblia elobi: “Bozali ba-nzambe.” Yesu nde alobaki bongo. Mpo na nini? Ezaleli malamau nyonso, makambo nyonso oyo ezali kati na Nzambe, ezali kati na bino. Matai 5:48: “Tika ete . . .” Yesu nde azali koloba, kati na mapamboli.

Tika ete bozala m-a-l-a-m-u b-e, (Ezali nini?) malamau be, lokola Tata na bino . . . na likolo azali malamau be.

³⁰³ Sikawa, okómi awa likolo, liboso esengama na yo kosala yango. Makambo nyonso oyo esengeli kobakisama liboso. Bongo, ntango okómi likolo awa, Asengi na yo sikawa kozala malamau be, bo-nzambe, bana na Nzambe, mibali pe basi. Ya solo. Nakokaki koloba makambo mingi mpenza mpo na yango!

304 Tokamata Baefese 4, mpo tomona yango awa, na Buku na Baefese, likambo elobami pe mpo na yango, lolenge nini tosengeli—lolenge nini tosengeli kosala. Efese, mokapo ya 4, pe tobanda na nzela ya 12. Baefese 4, pe tobanda na nzela ya 12. Malamu. Tobanda awa na nzela ya 11.

Apesi bamoko lokola bantoma, bamosusu basakoli, . . .

305 Bomikaniseli lobi na mpokwa? Koluka kozua esika ya mosala ya moto mosusu te. Bomoni?

. . .pe bamosusu bapalanganisi nsango malamumu, bamosusu babateli. . .pe bamosusu balakisi,

306 “Mpo na kobongisa Nzambe”? Ekomami ndenge wana? [Losambo balobi: “Te.”—N.D.E.] Kobongisa nini? [“Babulami.”] Babulami bazali banani? Baoyo babulisami. Amen. Baoyo babandaki na nse *awa*.

. . .kobongisa babulami, mpo na mosala na kosungaka (mosala ya Yesu Klisto), mpo na kolendisaka nzoto na Klisto (mpo na kolendisaka, kotonga Yango, kolendisaka): kino . . .

Kino ekokóma biso nyonso kati na bomoko ya kondima, pe . . .boyebi na Mwana na Nzambe, pe kino na mobali mobimba, kino na elikia (hólalá), na epimelo na lolenge na litondi ya Klisto,

307 “Kobonga be” esengi bo-nzambe. Bosengeli kobakisa bo-nzambe, na kondima na bino, bo-nzambe. Bomoni, bobandi na nse *awa*, na ezaleli malamumu. Na sima oleki na boyebi. Na sima oleki na komipekisa. Na sima oleki na motema molai. Sikawa okómi na bo-nzambe. Bo-nzambe! Hólalá! Ntango na biso ezali kosila. Totala naino. Kasi boyebi nini bo-nzambe elingi koloba. Boyembaka nzembo oyo:

Kozala lokola Yesu, kozala lokola Yesu,
Na mokili, nalingi mpenza kozala lokola Ye;
Na mobembo ya bomoi na mokili kino na
Nkembo
Nasengi bobele kozala lokola Ye.

308 Yango nde bo-nzambe. Ntango babetaki Ye na litama moko, Apesaki oyo mosusu. Ntango balobelaki Ye maloba makasi, Azongisaki maloba te. Afingaki te. Bomoni? Bo-nzambe, koluka ntango nyonso likambo bobele moko: “Nakosala ntango nyonso makambo ekosepelisa Tata.” Bomoni? Iyo, misie. Ntango nyonso. Yango nde bo-nzambe. Bomoni?

309 Ntango olongwe *awa*, kino *awa*, kino *awa*, kino *awa*, kino *awa*, kino *awa*, sikawa ozali kokóta na litondi ya epimelo ya mwana na Nzambe. Kasi osengeli kozala na *oyo*, kobakisa nyonso *oyo*, pe okoki na yo kobanda te kino okozua *oyo*.

310 Sikawa, bomikanisela ndeke ya moindo na nsala ya ndeke mosusu. Bobosana ye te. Bomoni? Bomeka kobakisa yango te,

kino bokobotama mpenza mbala mibale. Zambí, yo, ekosimba te, pe o—okoki kotambolisa yango te. Ekokóma kino *awa*, to *awa* boye, ekobukana esika moko.

³¹¹ Kasi, soki okomi *awa*, ebenga ya solosolo oyo abotami mbala mibale, na bongo okobakisa eloko moko te. Ekobakisamela yo, omoni, ekobanda komata, malamú, kino na kobonga be, sikawa. Malamú.

³¹² Bongo, ya motoba, tobakisa, Biblia elobaki awa, kobakisa bolingo na bandeko. . . boboto na bandeko. Sikawa, ezali likambo malamú, awa, oyo ya motoba, nsambo. Malamú. Kobakisa boboto na bandeko. Malamú. Soki tokómi na yango, boboto na bandeko, komitia na esika na ye, na likambo yango. Sikawa, okoloba. . .

³¹³ “Ndeko na ngai asaleli ngai mabe,” ndenge Petelo alobaki. “Nasengeli kolimbisa ye,” alobaki, “mbala sambo na mokolo?”

Alobaki: “Ntuku nsambo mbala nsambo.” Bomoni?

³¹⁴ Boboto na bandeko. Sikawa, bomoni, soki ndeko moko atomboki makasi, kozala na ye motema mokuse te. Omoni? Te. Omoni? Zala na boboto epai na ye. Kende na yo, ata bongo.

³¹⁵ Moto moko alobaki, eumeli te, alobaki: “Ndenge nini okoki kondima makambo oyo ndenge ondimaka, bongo ozali kokoba kokende epai na ba-Losambo ya Nzambe, na ba-Unitaire, pe bamosusu na bango?” Bongo, botia, bomoni, boboto na bandeko. Bomoni? Bomoni? Kolikia ete, mokolo moko, bomoni; motema molai epai na ye, bomoni; komipekisa, koyikela ye mpiko; boyebi, kososola oyo ye andimaka, bobosana te, ezali kati na motema na ye, ezali mpenza bongo; ezaleli malamú, kati na yo, kobimisa yango na boboto, na bopolo epai na ye; kozala na kondima ete mokolo moko Nzambe akokotisa ye. Bomoni?

³¹⁶ Boboto na bandeko, likambo ya nsambo. Moko, mibale, misato, minei, mitano, motoba, nsambo. [Ndeko Branham abeti na etánda mbala nsambo—N.D.E.] Bomoni, likambo ya nsambo. Bongo, sikawa, bozali kokóma.

³¹⁷ Na sima, likambo oyo elandi, bakisa kolinga, yango ezali bolingo. Yango nde libanga ya motó. Moko na mikolo oyo, kati na lingomba. . .

³¹⁸ Sikawa, bolimbisa ngai, tika yango eyebana na bande, pe bipai nyonso, nazali koteya likambo oyo te lokola malakisi, likambo nalingi koloba sikawa. Kasi nalingi bobele kolakisa bino yango, na lisungi na Nzambe, nini yango ezali mpenza, ete Biblia ya liboso oyo Nzambe akomáka ezali Zodiak na likolo. Ebandi na mongondo. Esuki na Leo, nkosi. Pe ntango nakokóma na Elembo ya Motoba pe ya Nsambo, bokomona ete, ntango Elembo mosusu wana efungwamaki, elembo ya Zodiak na esika wana ezalaki kanser, mbisi oyo ekutani. Pe eleko ya kanser nde tozali kobika na yango sikawa, emonisami. Pe likambo elandi

oyo Elembo efungolaki, Emonisaki Leo nkosi, Boyei ya mibale ya Klisto. Ayaki, mbala ya liboso, na mongondo; Akoya, na sima, Leo, nkosi. Nakomema yango na . . .

319 Sikawa, nayebi te soki nakozua ntango na ntongo oyo. Nakomeka kosala nyonso ekoki, mpo nalakisa bino ete bibuteli oyo ezali kati na ba-piramíde, lolenge moko, ezali Biblia ya mibale Nzambe akomáki. Enok akomaki yango, pe atiaki yango kati na piramide.

320 Pe ya misato, Nzambe abongaka be ntango nyonso na misato, bongo Amikomisaki Ye moko Liloba na Ye.

321 Awa, sikawa, bobosana te, kati na piramide. . . Nakanisi mingi kati na bino, basoda pe bamosusu, bozalaki na Ezipito. Piramide ezalaka na motó likolo na yango te. Soki moke te. Bazali na Li—Libanga ya Scone, pe nyonso mosusu, kasi nde . . .

322 Soki ozali na lokasa ya dollar moko na libenga na yo, tala lokasa ya dollar yango, pe okomona ete, na ngámbo ya mobali, ezali na mpongo ná bendele ya Amerika. Pe ekomami, elembo “ya Etats-Unis.” Na ngambo mosusu, ezali na piramide, ná libanga monene ya motó pe liso ya moto. Na ngámbo yango ekomami: “Elembo monene.” Ee, soki oyo ezali ekólo monene, mpo na nini elembo monene oyo ekoki kozala elembo ya ekólo yango moko te? Nzambe asali ete batatola, ata bakei wapi.

323 Mokolo moko, nazalaki kosolola na monganga moko, azalaki kotungisa ngai makasi, na ntina na kobikisama ya Nzambe. Totelemaki na balabala. Alobaki: “Misie Branham, yo ozali kaka kotia bato na mobulu.” Alobaki: “Moto akobikisama bobele na nkisi ya monganga.”

324 Esalemaki ete nabaluka, natalaki elembo ezalaki na motuka na ye, ezalaki nyoka likolo na likonzi. Nalobaki: “Boye malamumu kolongola elembo wana na motuka na yo, mpo elembo na yo moko ezali kotatola ete Nzambe nde abikisaka babeli.”

325 Monganga ya solo andimaka yango. Baoyo wana, bazali bakosi. Iyo, misie. Nyoka likolo na likonzi! Mose atiaki nyoka likolo na likonzi. Alobaki: “Nazali Yawe oyo abikisaka malali na yo nyonso.” Pe bazalaki kotala nyoka yango, mpo na kobikisama ya Nzambe. Kasi, ata bongo, bazali kotemela yango; nzokande, elembo na bango moko ezali kotelemela bango. Fiuu!

326 Tala, ekólo na biso, bazali kolobaloba pe kotiola makambo yango, kasi mbongo na bango moko, mosolo na bango, ezali kotatola ete elembo ya mokili mobimba ezali Nzambe. Bozali komona liso wana oyo ezali likolo na yango, na lokasa ya dollar moko? Yango nde elembo monene.

327 Yango etiamaka te na likolo ya piramide. Bakokaki kososola te mpo na nini. Libanga ya motó ebwakamaki, Motó, Klisto. Kasi Ekoya, mokolo moko.

328 Sikawa, na kotongama, ezaleli malamumu...Kotongama ya ndako oyo, kotongama ya epimelo oyo, bomoni, ebandaka na libanga ya mobóko; kondima, ezaleli malamumu, boyebi, komipekisa, motema molai, bo-nzambe, boboto na bandeko. Sikawa, esalaka nini? Bongo, ezali kozela Libanga ya motó, oyo ezali bolingo, mpo ete Nzambe azali bolingo. Pe Azali kokonza, pe Azali makasi ya moko na moko na makambo oyo. Ya solo. Iyo, misie.

329 Bobele *awa*, bobele *awa*, bomoni natii, awa na kati, misala nyonso oyo awa na kati, pe awa mwa mbonge moke ebandi koya. Ezali nini? Molimo Mosantu ezali kokita, na nzela ya Klisto, bomoni. Molimo Mosantu! Molimo Mosantu azali likolo na nyonso *oyo*, Azali kosangisa yango esika moko, kotonga (nini?) Lingomba oyo ebongi be, mpo Libanga ya motó ékita likolo na Yango.

330 Eloko nini esalamaki lisusu nini? Emonisamaki na Bileko Nsambo ya Lingomba, pe na batindami nsambo ya Lingomba.

331 Ebandaki *awa* na sima. Lingomba ebandisamaki liboso wapi? Lingomba ya pentekote ebandisamaki liboso wapi? Na Santu Polo, na Efese, monzoto ya Eleko na Lingomba ya Efese, Efese.

332 Eleko na Lingomba ya mibale ezalaki Sumuluna. “Ezaleli malamumu.” Irénéé, moto monene oyo asimbacki Nsango Malamumu ya Polo.

333 Eleko na Lingomba elandaki, ezalaki Pelegamo, oyo ezalaki Martin. Martin azalaki moto monene oyo atelemaki ngwi. Polo, Irénéé, Martin.

334 Na sima, na Twatila, Colomba ayaki. Bobosani te? Yango oyo, eyemamaki *wana*. Colomba. Sima na Colomba...Bileko ya Molili ebandaki wana.

335 Na sima, Salade eyaki, elingi koloba *ebembe*. Luther. Aleluya! Nini na sima? Nini eyaki sima, elandaki Salade, Luther?

336 Na sima, Filadelefi eyaki. “Bo-nzambe.” Wesley, bosantu! Luther alobaki: “Moyengebeni akobika na kondima.” Kobulisama na nzela ya Wesley.

337 Na sima boboto na bandeko eyaki, na nzela ya Laodikia. Pe tondimi Nsango monene ya komonana ya mibale ya Eliya, na ntango ya suka, oyo ekopanzana na mokili mobimba.

338 Ezali yango mpenza, Bileko Nsambo ya Lingomba, bibuteli nsambo. Nzambe azali kotonga Lingomba na Ye, ezali lokola moto moko kati na moto, kati na Ye moko. Nkembo, Nguya na Nzambe, ekokita na nzela *oyo*, kosangisa Yango elongo. Yango wana Bapantekotiste oyo batikaki ba-Lutherien pembeni, pe batikaki ba-Wesleyen ná bamosusu pembeni, bayebi te likambo bazali koloba. Bomoni, bango babikaki na eteni *oyo* ya tempelo.

Yango wana, bato mosusu bakoki komata kino wana, pe kokwea. Kasi ezali na eteni ya baoyo ya solosolo, oyo bakokoba kosala ete ndako yango étongama. “Nakozongisa,” Yawe alobi bongo.

³³⁹ Bomikanisela *Nzete Ya Mwasi-na-libala?* Bomikanisela liteya ya *Nzete Ya Mwasi-na-libala?* Baliaki Yango nye, kasi Akataki bitape na yango. Bakomaki na bitape ya bibongiseli; Akataki yango nyonso. Basalaki lingomba mosusu, bitape ya bibongiseli; Akataki yango nyonso. Kasi motema ya Nzete yango ekobaki kokola. “Na ntango na mpokwa Pole ekozala.” Bomoni? Ezali ntango Klisto akoya, Molimo Mosantu. Yesu akokita pe Akomitia Motó ya Lingomba na ntango wana, pe Akosekwisa Lingomba yango, oyo ezali Nzoto na Ye Moko. Nzoto ezali *kuna* na kati.

³⁴⁰ Pe lolenge Nzambe alingi moko na moko na biso akoka kokola, ezali lolenge moko oyo Amemaki Lingomba na Ye na Ye mpo na kokolisama. Eleko moko na moko ya Lingomba, Ezali kokoma Lingomba moko monene. Bomoni?

³⁴¹ Esengamaki na *baoyo* kuna, makambo oyo esengami na *baoyo* te. Makambo *oyo* esengamaki na bato *oyo* kuna te. Bomoni? Kasi Atongaki Lingomba na Ye lolenge yango moko. Atongaki Li—Lingomba na Ye na lolenge moko Azali kotonga bato na Ye. Bongo Petelo alobi awa, liboso, makambo nsambo: kondima, ezaleli malamumu, (bomoni, ezali komata), boyebi, komipekisa, motema molai, bo—Nzambe, bolingo na bandeko, bakisa boboto na bandeko, pe na sima bolingo na Nzambe. Molimo Mosantu, Klisto na bomoto ya Molimo Mosantu, ayei likolo na yo, na libatisi ya solo ya Molimo Mosantu, pe okangami na elembo ya misala malamumu nyonso oyo kati na yo. Na boye, Nzambe akomi kobika kati na Mongombo, oyo ebengami Ndako, Mongombo na bomoi ya efandelo ya Nzambe na bomoi.

³⁴² Ntango moto azui lolenge ya makambo oyo, boye Molimo Mosantu akoya likolo na ye. Ata ndenge nini, okoki koloba minoko na sika, okoki komékólá makabo nyonso oyo Nzambe azali na yango. Okoki kosala yango. Kasi soki misala malamumu *oyo* ekoti naino kati na yo te, ozali bobele libanda na mobóko ya solo-solo ya kondima. Kasi soki misala malamumu yango ezali kokola na kati, pe obakisi yango likolo na yango, na bongo ozali etaliseli ya bomoi. Ozali ekeko ya bomoi, oyo etambolaka.

³⁴³ Kasi, boyebi, ba—bapagano, bafukamelaka ekeko, nzambe ya makanisi. Pe na lolenge ya makanisi, bandimaka ete nzambe yango ya makanisi ayanolaka bango. Ezali mimesano ya bapagano. Ezali mimesano ya Baroma. Bakúmbamelaka basantu ya ndenge na ndenge pe nyonso mosusu. Pe bazali na Santu Cécile, nzambe ya libota, pe makambo mosusu mingi ya lolenge wana. Bakúmbamelaka yango, pe bandimaka yango mpenza na lolenge ya makanisi. Ezali mpenza e—etaliseli ya Nzambe ya solo ya bomoi.

344 Kasi ntango biso, na lolenge ya makanisi te, ntango tofukamaka liboso na Nzambe ya bomoi, ezaleli malamau ya bomoi, boyebi ya bomoi, motema molai ya bomoi, bo-Nzambe ya bomoi, Nguya ya bomoi longwa na Nzambe na bomoi, ekomisaka moto na bomoi elilingi ya bomoi na epimelo ya Nzambe. Ye akosala nini? Makambo moko Yesu asalaki; kotambola lolenge moko Ye atambolaki, kosala makambo moko Ye asalaki. Mpamba te, ezali likambo ya makanisi te. Ezali na bosolo oyo ezali komonana.

345 Bomoni likambo nalingi koloba? Bomoni lolenge nini misala malamau oyo, bisaleli ya kotonga oyo, ezali kokokana na batindami ya Lingomba, ná bileko ya Lingomba? Bongo, moko na mikolo oyo, tokozua maloba oyo moko na moko, mpo na koyekola yango mpenza, pe kolakisa ete ezali kotatola yango. Nyonso yango ezali kotambola elongo. Na ntembe te. Bomoni? Hólalá! Ezali mpenza malamau bongo, bomoni, komona oyo—oyo yango ezali kosala.

346 Bongo, yango nde Ndako oyo Nzambe afandaka na kati; ezali te ndako oyo ezali na ngonga monene likolo na yango, ná linóngei ya molai. Bomoni? “Kasi Osili kobongisela Ngai Nzoto,” Nzoto oyo Nzambe akoki kofanda na kati, Nzambe akoki kotambola na kati, Nzambe akoki komona, Nzambe akoki koloba na kati, Nzambe akoki kosalela. Amen! Esalelo ya bomoi ya Nzambe, Nzambe azali kotambola na makolo mibale, kati na yo. Nkembo! “Matambe na bayengebeni ekambamaka na Nzambe,” Nzambe azali kotambola kati na yo. “Mpo ete, bino bozali mikanda mikomami, mitangami na bato nyonso.” Pe soki Bomoi oyo ezali kati na Klisto ezali kati na bino, bokobika Bomoi oyo Klisto abikaki.

347 Lokola nalobaka ntango nyonso. Soki okamati mai na nzete ya pêche, pe otii yango na kati ya nzete ya pomme, ndenge bazongisaka makila, nzete ya pomme ekobota mbuma ya pêche. Ya solo. Na ntembe te. Ata bitape ezali na lolenge nini, ezali likambo ya mai ya nzete ya pomme kati na yango, bomoni, to lolenge nini ya nzete. Bomoni? Ezali kozua bomoi na yango uta na nzete ya pomme, soki olongoli yango nyonso, pe opesi yango ma—mai ya nzete mosusu, pe olongoli mai ya nzete ya pêche mpo na kotia yango na nzete ya pomme. Eloko nini ekosalema? Ekobota lisusu mbuma ya pêche te. Bomoni? Te, misie. Ekosalema te. Soki bomoi ya nzete ya pêche nde ekoti kati na nzete ya pomme, ekobota lisusu pomme te. Ekobota mbuma ya pêche, bomoni, bomoni, mpo bomoi wana nde ezali kati na yango.

348 Ee, soki ozui biso baoyo, tozali bobele bato pamba, bilémá, omoni, pe tozali na ntina te, mpo ete biso nyonso tosila kokufa na masumu pe bikweli. Bisu nyonso tozali na lolenge wana. Bongo biso, biso moko, tokoki kofukamela, komipesa na lolenge ete Nzambe ákamata esalelo na Ye ya kozongisa makila, Nkombo

na Yesu Klisto, mpo ete “Nkombo mosusu ezali te awa na nse, mpo bato babikisama na yango,” pe ákotisa Bomoí ya Klisto kati na biso. Bongo nde tokozua kondima ya lolenge *oyo*, kondima ezalaki na Klisto. Pe kondima ya Klisto etongamaki te likolo na Bafalisai, to Basadukai to na malako na bango ya kosukola mbeki, mbilika pe nzungu. Etongamaki likolo na Liloba na Nzambe, amen, ya solo mpenza, na lolenge ete Klisto azalaki Liloba, Liloba akómaki mosuni. Bongo, ntango tokoki kozongisama makila na Nguya na Ye, pe kokufa na lolenge na biso ya kokanisa, pe kondima na biso ekómi kondima ya solosolo, aleluia, na bongo nde Bomoí na Klisto ekokotisama kati na biso. Tokómi bikelamu na bomoi ya Nzambe, efandelo epai wapi Molimo Mosantu akoki kotinda na nzela yango, mapamboli na Ye ya kongenga, pe tokómi na epimelo na Klisto.

³⁴⁹ Yesu alobaki: “Ekomami te ete? Bozali kokweisa Ngai, mpo Nalobi: ‘Nazali Mwana na Nzambe.’ Ekomami te, ete ‘Bozali banzambe.’ Mibeko na bino moko elobi yango te?” Lokola Mose, lokola Eliya, lokola basakoli oyo babikali mpenza pene na Nzambe, kino Nzambe Ye moko amikotisaki kati na bango. Pe balobaki, bango moko te, kasi Nzambe. “Bomitungisa te soko bokoloba nini, mpo ete bino bokoloba te. Ezali Tata oyo afandi kati na bino; Ye nde akoloba.” Maloba na ye ezali ya ye moko te, mpo, bomoi na ye, asili kokufá.

³⁵⁰ Soki moto akufi, balongolaka makila na ye, mpo na kokausa ye. Kokoso ezali ete, mingi kati na bango bakausami ata moke te. Soki olongoli makila na moto, esili mpo na ye. Bongo, likambo bobele moko bosengeli kosala, ezali kozongisa makila mosusu kati na ye; akozonga na bomoi. Bolongolaki makila na ye.

³⁵¹ Sikawa, soki totiamaki Makila na Yesu Klisto na kati, bomoni, ekopesa kondima ya Yesu Klisto, ezaleli malamú ya Yesu Klisto, boyebi ya Yesu Klisto, komipekisa ya Yesu Klisto, motema molai ya Yesu Klisto, bo-Nzambe ya Yesu Klisto, boboto na bandeko ya Yesu Klisto, pe bolingo na Nzambe, yango ezali Yesu Klisto. Ye azali Motó pe azali kokonza yo. Pe makolo na yo ezali mobóko, kondima. Amen! Ekonzami na Motó, esengeli . . . ? . . . Yango mpenza. Wana nde moto oyo abongi be ya Nzambe, ntango azali na bizaleli malamú oyo.

³⁵² Bongo, Nzambe azali kotalisa Lingomba na Ye lokola Mwasi na libala, mwasi. Nzambe azali kotalisa Lingomba na Ye lokola Mwasi na libala. Pe lolenge Amemaka moto mpo na kozala mwana na Ye, mpo na kokota kati na Mwasi na libala yango, Amemaki pe bongo Mwasi na libala na bileko yango, [Ndeko Branham abeti na étánda mbala nsambo—N.D.E.] kino Amemi Lingomba yango mobimba *awa* na kati.

³⁵³ Lokolo na ngai eningani. Mpo na nini? Mpo motó na ngai elobi bongo. Kasi, ekoki koningana lokola loboko na ngai te, mpo ezali lokolo na ngai. Luther akokaki kosala makambo biso

tozali kosala te, Ba-metodiste pe lokola, mpo bazalaki eloko mosusu. Bomoni? Lokolo eningani mpo motó elobi bongo. Kasi motó ekoloba ata moke te: “Sikawa, yo lokolo, okómi loboko. Yo litoi, okómi liso.” Bomoni?

³⁵⁴ Kasi, na eleko moko na moko, Nzambe atiaki makambo oyo na Lingomba na Ye, Atalisaki yango na komonisa ete moto moko na moko azali na yango, azali na makoki yango. Pe *Oyo* ezali, ntango ekómi na suka, ezali Lingomba na Nzambe oyo ekokende na Konetolama. Pe *oyo* ezali, ekómaki na suka, ezali mosali na Nzambe, kati na Lingomba na Nzambe, oyo ekokende na Konetolama. Nkembo! Bomoni likambo nalingi koloba? Yango mpenza. Yango nde likambo na mobimba.

³⁵⁵ Moto moko ayaki *awa*, Polo, atiaki mobóko. Irénéé abandaki kosopa *oyo* likolo na yango. Oyo alandi asopaki *oyo*. Oyo mosusu asopaki *oyo*. Oyo alandi, *oyo kuna*, pe *oyo kuna*, pe *oyo kuna*, pe bongo na bongo kino ekómi na eleko ya suka. Kasi ezali nini? Ezali Molimo yango moko.

³⁵⁶ Molimo moko oyo afandi kati na ngai, alobi: “Maboko, simba sanduku oyo.” Molimo yango moko alobi: “Makolo, bwaka litambe moko.” Bomoni likambo nalingi koloba?

³⁵⁷ Na bongo, epimelo mobimba ya bomoto na yo ekambami pe ekonkami na makambo oyo, kasi ekoki kokonzama mobimba te soki naino ezui makoki oyo nyonso te.

³⁵⁸ Bosila koyoka likambo oyo? Sikawa, botika nayebisa bino yango. Pe bofanda mpenza. . . Boyoka na bokebi nyonso. Bomoni? Bayebaka makasi ya moniololo na eteni na yango ya pete koleka. Ya solo. Eleki eteni na yango ya pete koleka na makasi te.

³⁵⁹ Ata biteni *oyo* etongami makasi ndenge nini, *oyo* pe etongami; soki ezali na eteni ya pete, wana nde esika ekokatana. Pe eleki eteni na yango ya pete na makasi te. [Ndeko Branham azali kosalela liyemi na ye oyo ezali na étánda—N.D.E.] Sikawa, soki ozali na, olobi ozali na *oyo*, *oyo*, *oyo*, ozangi *oyo*, wana nde esika ekokatana. Soki ozali na *oyo*, kasi ozangi *oyo kuna*, ekokatana bobele wana. Ozali na *oyo*, kasi ozangi *oyo kuna*, ekokatana. *Oyo*, kasi ozangi *oyo*, ekokatana. *Oyo*, kasi ozangi *oyo*, ekokatana. Bomoni? Pe soki ozangi. . . Okoki kozala na *oyo* te kozanga kozala na *oyo*.

³⁶⁰ Bongo, soki omipesi mobimba na yo moko, bongo Molimo Mosantu akomisopa kati na yo, na bizaleli malamú oyo, na bongo okozala mongombo na bomoi. Bongo, bato bakotala pe bakoloba: “Tala moto oyo atondi na ezaleli malamú, boyebi (andimaka Liloba), komipekisa, motema molai, bonzambe, boboto epai na bandeko, atondi na bolingo ya Molimo Mosantu. Bomoni, ye wana, azali kotambola.” Ezali nini? Epimelo oyo bazangi kondima bakoki kotala pe koloba: “Moklisto ye wana. Mobali ye wana, to mwasi, oyo bayebi makambo bazali koloba. Naino

bomoná moto na boboto, bopolo, bonzambe koleka ye te.” Otiame elembo. Elembo emonisamaka na ngambo mibale. Ata ozali kokende to kozonga, elembo emonanaka motindo moko. Yango mpenza. Bomoni? Soki mobali to mwasi azali na *oyo*, na bongo Libanga ya motó ekokita pe ekotia bango elembo kati na Bokonzi na Nzambe, oyo ezali Molimo Mosantu.

³⁶¹ Bongo, Liloba, ekouta *Awa*, Ekomimonisa na nzela na moko na moko na bikelamu oyo, bomoni, pe ekokómisa Ekelamu oyo mobimba Mongombo ya Nzambe na bomoi, ndakisa ya bomoi ya Boklisto oyo ezali kotambola. Oyo Klisto azalaki, bato oyo bazali bongo, mpo ete Bomoi na Ye ezali awa na kati. Bazali kati na Klisto. Bomoi na bango ekufi pe ebombami kati na Klisto, na nzela ya Nzambe, pe batiami elembo kuna na kati na Molimo Mosantu. Bakolinti ya Liboso 12. Ya solo. Bomoni? Ozali komimona lokola mokufi, na bongo nde obotami na kondima. Na sima, ezaleli mamalu ná makambo mosusu oyo ekobakisamela yo, kino ókozala oyo abongi be, elilingi ya bomoi ya Nzambe. Kitoko mingi, boye te? [Losambo balobi: “Amen.”—N.D.E.]

³⁶² Na sima Nzambe, na nzela yango, ayeisi pe Bileko Nsambo ya Lingomba, mpo na kotalisa bibuteli nsambo oyo Apesaki, mpo na kotonga moto na Ye na elilingi na Ye, Atongaki Lingomba mobimba na elilingi na Ye. Pe na lisekwa, Nzoto oyo mobimba ekosekwa mpo na kobika elongo na Ye libela, mpo ezali Mwasi na libala. Bomoni? Boye, ekosalema na eleko moko na moko, na bileko nyonso oyo ekoya.

³⁶³ Pe ekosengama mingi koleka, bobosana te. Bobosani te oyo Polo alobaki awa na Baebele 11? Nátangela bino likambo moko awa liboso tosilisa, bozela moke. Bongo, bino. . . Esalaka ete moto namiyoka ndéngé mosusu ntango na. . . ntango nyonso, ntango natangaka yango. Nakozua Baebele 11, pe nakobanda na nzela ya 32.

Lisusu nini, *naloba lisusu nini? Nazali na ntango te mpo na koloba makambo ya Jedeon, . . . ya Barak, pe . . . Samson, . . . pe Jefté, . . . David, . . . pe Samuel, . . . na basakoli.*

Baoyo bakitisi makonzi mpo na kondima, basalaki na boyengebeni, bazui elaka, bazipi monoko na bankosi,

Bazimisi nguya na móto, bakimi mopotu na mopanga, pe bakembisami kati na bolembu, bazui makasi kati na kokima, bakimisi. . . bibe na bapaya.

Basi bazuaki bakufi na bango mpo na lisekwa; . . . bamosusu balekaki na minyoko, banyokwamaki, baboyaki kokangwa ete bazua lisekwa lileki malamamu.

³⁶⁴ Na nse *awa*. Bomoni? [Ndeko Branham azali kosalela liyemi na ye oyo ezali na etánda—N.D.E.] Malamu.

Bamosusu na bango bamekamaki . . . basekakamaki mabe . . . babetamaki fimbo, iyo, na koleka wana . . . bakangamaki . . . batiamaki na bolóko.

Babwakelami mabanga, bakatamaki biteni mibale na mosumani, babomani na mipanga; batamboli na mposo na mpate pe na mposo na ntaba, bazangi, pe banyokolami, pe basalelami makambo mabe.

(Mokili ebongi na bango te.) . . .

365 Bomoni, ezali kati na parenthèse, botala na Biblia na bino.

. . . bazalaki kotelengana na kati na bisobe pe na bangomba pe na madusu pe na mabulu ya mabele.

. . . baoyo nionso, atako litatoli epesamaki mpo na bango na nzela ya kondima na bango, . . .

366 *Awa!* [Ndeko Branham azali kosalela dessin na ye oyo ezali na etánda—N.D.E.]

. . . litatoli epesamaki mpo na bango na nzela na kondima, bazuaki kokokisama na elaka te, (Bomoni?)

Nzambe abombeli biso eloko eleki malamumu ete bango bakoka bobele esika moko na biso.

367 Bososoli? Bato oyo bakufa, kati *awa*, bazali kotalela pe kozela biso. Boye, Lingomba *oyo* esengeli kokóma na kobonga be, mpo lisekwa esalema. Pe baoyo bazali na nse, milimo oyo ezali na nse na etumbelo, bazali kozela Lingomba oyo ekóma na kobonga be na Yango, na ntango wana nde Klisto akoya.

368 Pe Lingomba oyo, bomoni, ezali kokóma moke koleka, bato moke. [Ndeko Branham azali kosalela liyemi na ye na etánda—N.D.E.] Ezali mpenza na nsonge koleka wana, kasi bobele mpo na kozua esika ya kokoma wana, bomoni. Ekomi na nsonge lokola ntonga. Kino, Lingomba, na bato moke, esengeli kokóma na esika ya kozala na mosala ndenge moko na *oyo* etikaki, mpo, ntango Libanga ya motó ekozonga . . .

369 Ezali na libenga moke lokola *oyo*, esika ekomifandisa malamumu, likolo ya piramíde nyonso. Ezali bobele ekoti oyo etiamaka likolo na yango te. Ezali lokola nkingo moke, pe esengeli kotiamaka likolo na yango, mpo elekisaka mai.

Pe ntango ekoya, Lingomba oyo ekosangisama na yango.

370 Nyonso oyo, mabanga mosusu ya piramíde, ekotiamaka malamumu mpenza kino okokoka kolekisa jiléte kati na yango te, ezali na ba-kilos koleka, etiami kuna na kati. Lolenge bamatisaki yango, bayebi te. Kasi etongamaki.

371 Pe *awa* na likolo, ntango Motó ya piramíde ekotiamaka, piramíde Yango moko, Nzoto ya Klisto ekosangisama. Ekozala bobele bindimeli to malakisi te, to eloko mosusu oyo tokoya na yango. Ekosengela kozala mpenza malabu be lokola Klisto, kino, ntango Akoya, Ye ná mosala yango ekokokana mpenza

makasi. Bomoni? Na sima nde Konetolama ekosalema, kozonga na Mboka.

³⁷² Botala esika tozali kobika sikawa, na Laodikia, epai lingomba ezalaki eleko ya lingomba ya mabe koleka nyonso. Na Biblia, tomoni ete, ezalaki eleko ya lingomba moko oyo Nzambe azalaki libanda na lingomba, kobeta na ekuke, koluka kozonga na ndako na Ye moko. Bindimeli ná bibongiseli ebwakaki Ye libanda ya lingomba na Ye moko. “Tala, Natelemi na ekuke pe Nazali kobeta. Soki moto azali na mposa pe alingi kofungola ekuke, Nakokota, pe Nakolia elambo elongo na ye.” Bomoni? Yango oyo, na eleko ya lingomba *oyo*. Bazalaki kobimisa Ye libanda malembe-malembe, kino *awa*, babwaki Ye libanda na mobimba. Bazali na bango na mposa na Ye ata moke te.

³⁷³ Sikawa, bomoni lelo epai tozali kokende. Ata suka ya Eleko ya Lingomba ya Laodikia ekómi na lolenge ya libanda, kino yango ná Bokatoliko, oyo epanzaki yango *awa*, bakomi kosangana na bomoko lokola lingomba moko monene. Kosangana ya mangomba, ezali ndenge moko na Bokatoliko.

³⁷⁴ Bokeseni ezali bobele moko, soki bakoki kolonga yango, ezali likambo ya elambo. Yango nde likambo moko na ba-diocèse, oyo—oyo—oyo epekisaka Ba-katoliko ná Ba-misioni kosangana, ezali molongo ya elambo. Lingomba Katoliko elobaka: “Ezali nzoto.” Pe lingomba Misioni elobaka: “Ezali kotalisa nzoto.” Ba-katoliko basalelaka yango misa. Misa ezali, ete, baliaka elambo, kolikia ete balimbisami. Ba-misioni baliaka yango na kondima, kotonda Nzambe, na elambo, ete balimbisami. Ba-misioni balobaka: “Tolimbisami.” Ba-katoliko balobaka: “Tozali kolikia ete tolimbisami.” Misa ná elambo. Babengaka yango misa; biso tobengaka yango elambo. Misa ezali kolikia ete ezali bongo. Elambo ezali koyeba ete ezali bongo, pe kotonda Ye mpo na yango. Bomoni? Yango nde likambo moko oyo bakoki koyokana te. Bakoyokana.

³⁷⁵ Oh, ezali komonana malamumpenza. Bakosangana, mpo na kokonza. . . Eko—ekokonza yango nyonso. . . Ee, Biblia elobaki: “Banyama oyo bapesaki nguya na bango na mwasi ya ndumba,” bomoni, basanganaki elongo. Bomoni? Bobele likambo Biblia elobaki bakosala, bazali kosala yango sikawa. Ezali kosalema, bobele na póso oyo. Ezali te ete nazali kotelemela Ba-katoliko, to Ba-misioni.

³⁷⁶ Bino Ba-metodiste ná Ba-batiste, pe mingi na bino Bapantekotiste, ntango mangomba na bino ekotaki na lisangana ya mangomba oyo, ntango batongaki ndako monene ya bibembe kuna na New York, ya lisangana wana ya mangomba, ezali ndenge moko na Kosangana-ya-Bikolo pe nyonso mosusu. Bazali koluka kosangisa Bato na misioni nyonso elongo.

³⁷⁷ Sikawa, Ba-katoliko bazali maye na likambo yango, pe bakomema Pápa Yoane ntuku mibale na misato, to ntuku mibale

na mibale, to nani. Na bopolo pe na komikitisa, azali komeka komema kondima ya Ba-misioni nyonso ná kondima ya Bakatoliko na kondima se moko, yango mpenza nde Biblia elobaki ete bakosala. Ezali yango. Pe Ba-misioni bazali kokweya na motambo, komela ndobo, nsinga ná mondolu.

³⁷⁸ Mpo na nini? Mpo na nini? Mpo bazali na makambo *oyo* te. *Boyebi*: “Liloba ezali solo.” *Motema molai*: “Baoyo batiaka mitema na Yawe.” Bomoni likambo nalingi koloba?

³⁷⁹ Ezali lokola eveke ya Ba-methodiste alobaki mokolo mosusu, ntango balekisaki yango. Pe moto nyonso ayebi ete, ndenge, eloko epesaki pemela yango, bazalaki koluka bato basambela na lingomba, to na eteyelo. Pe balingaki . . . Nakanisi ezalaki buku ya mabondeli ya ba-Presbiterien, to eloko mosusu, kasi baboti bafundaki e—e—eteyelo yango mpo bandimaki te mabondeli yango esalema na eteyelo. Bongo eveke yango ya Ba-methodiste azalaki mobange na bwanya mingi, atelemaki pe alobaki: “Ezali mabe.” Alobaki: “Etemeli mobeko ya ekólo.” Ayokaki mopepe koya. Alobaki: “Lokola na lingomba na biso Ba-methodiste,” alobaki, “na lingomba na biso Ba-methodiste,” alobaki, “bato na biso mingi balobelaka ntango nyonso libaku ya Hollywood, kasi ata bongo bato ntuku libwa na mitano likolo na mokama bakendeke kotala yango.”

³⁸⁰ Likambo yango nini? Batikaki eloko *oyo* pembeni. Ezali mpenza bongo. Batikaki yango pembeni.

³⁸¹ Mokolo mosusu awa, na esika *oyo*, nazalaki kosolola na—na—na mokambi ya moko na mangomba minene ya Ba-methodiste ya Falls City, moko na mangomba ya molimo ya Ba-methodiste ya Falls City. Kolakisa, eleko ya Ba-methodiste *oyo* ezali pene na eleko ya biso, kuna, Ba-pantekotiste. Pe alobaki: “Na St. Louis, Missouri, bayekolaki likambo moko, eleki sanza misato to minei, pe bazuaki eyano.” Ntango mosusu moto yango azali awa na ntongo *oyo*. Ee, azali motongi *oyo* azali kotonga awa, kobongisela biso esika *oyo*. Azalaka na lingomba Methodiste ya Main Street, epai Ndeko Lum azalaki mokengeli na bango. Na bongo tomoni ete, kati na yango, nakanisi ezalaki pene na Ba-methodiste ntuku nsambo likolo na mokama na koyekola yango, na bolukiluki ya St. Louis, emonisaki ete pene na Ba-methodiste ntuku nsambo likolo na mokama bamelaka makaya, pe ntuku motoba na mwambe likolo na mokama kati na bango bamelaka masanga ya kolanguisa. Methodiste! Pe likambo ya kokamwa ezalaki ete, ntango mbano ya boyekoli yango epesamaki, kati na mibali pe basi; basi bazalaki ntuku nsambo, ntuku nsambo na ndambo likolo na mokama, bongo mibali bazalaki pene na ntuku mitano likolo na mokama. Basi bazalaki komela makaya ná masanga bazalaki mingi koleka mibali. Basi ntuku nsambo, ntuku nsambo na ndambo likolo na mokama, basi bazalaki mingi koleka mibali.

³⁸² Sikawa, ekozala boni soki tozui malakisi ya Biblia likolo ya bilamba mokuse, kokata suki, pe makambo ya ndenge wana, bomoni, wapi bonzambe, basi oyo balobaka bazali na bonzambe pe bosantu? Masano ya kalati pe nyonso mosusu, bato ya songisongi, bato ya bilobaloba, oyo bakokaka kobatela minoko na bango te. Minoko ya bilobaloba pe songisongi, pe bafandaka esika moko te. Boni na mibali? Masano ya kalati, masano ya golfe, batambolaka pene bolumbu, balataka bilamba mike ya mabe, ná basi pembeni na bango. Ezali kokamwa!

³⁸³ Bomoni likambo ya soni oyo basali motei wana, oyo ateyaka na bolóko, na ntongo ya lelo? Iyo, misie. Nandimi te ete moto yango asalaki likambo mabe. Esalaki nini? Ezali Ndeko. . . Nabosani. . . [Moto moko alobi: “Dan Gilbert.”—N.D.E.] Iyo. Dan Gilbert, ateyaka na bolóko. Ntango moto yango akotaki na pwasa, pe abomaki Dan, esili koleka ba-sanza, pe mwasi na ye akomi pene ya kobota, sikawa. Na ntembe te, Dan akufi, bakoki kozongisa bebé yango makila te sikawa. Mwasi yango alobaki ete Dan akamataki ye na makasi, pe ezali ye. . . “Ezali bebé ya Dan.” Likambo yango. . . Nandimi yango te ndenge nandimaka te ete—ete e—eyanganga azalaka na nsala ya ebenga. Te, misie. Nandimi ezali lokuta. Nandimi ete Dan Gilbert azalaki moto na Nzambe. Pe nandimi ete ezali ebongiseli ya moyini.

³⁸⁴ Lokola likambo bazalaki koloba likolo na mabondeli. Metodiste wana ya mobange—episkopo metodiste wana azalaki na bwanya ekoki mpo na kososola yango. Soki azalaki, soki elekelaki ye, yango epemelamaki bobele na eloko mosusu. Ya solo.

³⁸⁵ Lokola bokabwani ya mindele na bato moindo kuna na Súdi, likambo moko. Nakanisi bato basengeli kozala na bonsomi. Nakanisi ekólo oyo etelemi likolo na bonsomi. Nazali kopamela Misie Kennedy te ndenge atindaki basoda kuna. Ata bongo na—nazali “moto na mopelengano” te, nazali pe Démocrate te. Nazali Républicain te. Nazali Moklisto. Boye ngai. . . Kasi nandimaka yango te. Nandimaka pe te ete bato moindo basengeli koteka bokulutu na bango mpo na likambo ya boye. Ezalaki—ezalaki ngambo ya ba-Républicain. Makila ya Abraham Lincoln ekangolaki bango, mpo azalaki na bonzambe. Nakanisi basengelaki, ata bongo, kokangama na ngambo na bango, soki basengelaki mpenza kopona.

³⁸⁶ Kasi nakoyebisa bino likambo moko, elenge mobali wana akendeki kuna bobele mpo na biteyelo na bango te. Elenge mobali yango azali mwana mboka. Azali mo-Amerika. Oyo ezali bonsomi mpo na bato nyonso. Loposo ya moto esengeli kobongola eloko moko te. Bisó nyonso. . . “Nzambe,” elobami, “uta na moto moko, asalaki makila nyonso, bikólo nyonso.” Bisó nyonso tozali se moko. Kasi, elenge mobali yango, azalaki soda. Azali soda ya kala. Abundaki mpo na makambo ya sembo.

Azalaki na litomba ya kokende na eteyelo. Ya solo. Kasi azalaki na biteyelo ya kokende kotanga mingi.

³⁸⁷ Wana nde likambo ezali. Sima na likambo yango, ezali likambo ya bibongiseli ya mikolo oyo nde ezali kopemela makambo yango. Mpo na nini? Bazali kolongola kopona ya bato moindo na ba-Républicain pe kopesa yango na ba-Démocrate, pe na nzela yango, bazali koteka makoki na bango ya bokulutu. Ya solo mpenza. Molimo Mosantu azali awa te. . .

³⁸⁸ “Tika ye oyo azali na bwanya.” “Tika ye oyo azali na boyebi.” Yango mpenza. Ezali lokola lingomba oyo, eleko oyo mpenza, ezali komiteka. Bokoki komona te likambo ekosalema?

³⁸⁹ Likambo ezali te soki etiami na bande. Yango oyo. Ah-ha. Iyo. Likambo ezali nini? Mama na ngai azaláká koloba: “Zongisela Satana biloko na ye.”

³⁹⁰ Botala moto moko oyo asalaki likambo se moko ya bwanya, kuna, ezalaki Castro. Iyo, misie. Akendeki kuna. Ba-capitaliste bazuaki bilanga nyonso ya kokó pe nyonso mosusu oyo. . . yango epimamaka na wolo lokola na Etats-Unis. Asalaki nini? Asombaki mikanda na yango nyonso. Alukaki misolo na lolenge nyonso. Na sima, asalaki nini? Amekolaki mbongo, pe abongolaki yango. Akotisaki yango na mosala. Yango nde likambo se moko ekólo oyo ekoki kosala.

³⁹¹ Boyokaki nsango ya zulunale *Nzela ya Bomo* na ntongo eleki? Ee, boyebi, ezali lokola koteka mikanda ya mosolo mpo na wolo. Mikanda ya mosolo nyonso esila kosombama. Pe bakonzi ya mboka ya lelo bazali kosalela mbongo nini? Mbongo ya mpako bato bakofuta sima ya mbula ntuku minei. Ekomi na suka. Ezali na zulunale *Nzela ya Bomo*, uta na Washington D.C., ekendaka na ekólo mobimba. Bazali kosalela mbongo ya mpako, pe bazali koluka kosomba mbongo ya bapaya. Ee, ata bongo, bazali kokabola yango. Bozali komona te? Ezali mpenza yango ba—yango nde bakosala. Bomoni? Ezali nini? Sikawa, soki nkita ya ekólo oyo ekweyi, eloko se moko bakoki kosala, ezali kokweya. Eloko se moko bakoki kosala ezali bobele kokweya.

³⁹² Likambo malamumu se moko ya kosala ezali yango, kosala mbongo mosusu. Kasi bakosala yango te, na bokonzi oyo ya lelo. Wolo ya mokili ezali na maboko ya lingomba Katoliko ya Roma. Pe eloko bakosala, ezali koteka yango nyonso, “Bato na bozui,” ná bamosusu, “ya mokili,” ndenge Biblia elobaki. Bakosala nini, liboso nkita ekweya? Kompani ya Makaya Brown pe Williamson, mingi kati na bango bazali Ba-katoliko, ata bongo. Pe bamosusu nyonso oyo, bakosala nini? Bakondima yango, pe bakozua mbongo uta na Roma, pe na sima, bakoteka mpenza makoki na bango ya bokulutu. Roma akosunga bango. Iyo, misie. Bakosungama. Pe bazali kosala na mayele nyonso sikawa, kozua nyonso ekoki, komema yango na bisalelo na ye. Botala likambo nini Misie Kennedy azali kosenga.

³⁹³ Pe soki bomonaki likambo yango, mokolo wana, ntina ya ya kopona bato ezali lisusu te. Ntina ya kopona bato ezali nini? Ntango oyo, bakomaki yango na zulunalé, pe batalisaki yango polele na miso ya bato, pe baboyaki kosembola yango. Ntango batalisaki polele ete ba-masini yango, na ekólo mobimba, esalamaki mpo bapona Misie Kennedy na kopona ya kokosa. Biblia elobi te ete akokota na nzela ya bokosi? Ya solo, na kokosa. Sikawa, nazali kotelemela ngambo ya ba-Démocrate te, pe nazali kotelemela ngambo ya ba-Républicain te, kasi nazali bobele kotalisa makambo uta na Biblia. Ntina ya kopona bato ezali nini? Bayebi moto nani akozala wana.

³⁹⁴ Boni kati na bino balandaki émisíó ya televisio oyo elekaki kati na basi mibale? Moko alobaki: “Ngai nakopona Misie. . .” Bongo, mwasi ya Misioni alobaki: “Ngai nakopona Misie Kennedy.”

Balobaki na ye: “Mpo na nini?”

³⁹⁵ Alobaki: “Mpo nakanisi azali mayele koleka Misie Nixon. Akozala mokonzi ya mboka ya malamú mingi.”

³⁹⁶ Bongo alobaki: “Mwasi oyo azali Mo-katoliko. ‘Yo okopona nani?’”

³⁹⁷ Alobaki: “Ngai nazali Mo-katoliko, Mo-katoliko ya Roma, Mo-katoliko ya sembo.” Alobaki: “Ngai nakopona Misie Nixon.”

“Mpo na nini?”

³⁹⁸ Alobaki: “Mpo nakanisi Misie Nixon akozala mokonzi ya mboka malamú koleka, mpo amesani mingi na makambo. Ayebi makambo ya kominizme malamú koleka.” Mwasi yango alobaki lokuta.

³⁹⁹ Nazali na *Mi. . . babengaka yango, Misala ya Kondima Na Biso*, buku ya motuya mingi ba-Katoliko bakoki kosomba. Elobami boye na kati: “Soki moto ya Katoliko azali na molongo ya koponama, kowelana ebonga ná moto ya Misioni; soki Mo-katoliko aponi moto ya Misioni, bakolongola ye na lisanga ya lingomba Katoliko.” Ya solo. “Pe soki Ba-katoliko mibale bazali kowelana ebonga moko, bakopona Mokatoliko ya bosembo koleka na ‘lingomba-mama’, pe bakopona ye.”

⁴⁰⁰ Bomoni lolenge nini, bokosi wana, eloko bazali koluka kosala? Bazali kokabola mbongo, mpo na kosomba. Mpo na nini? Bazali komeka kobebisa yango. Pe bazali kosala yango, pe esili kobeba. Ezali nini? Ezali kopimama na wolo. Pe lingomba Katoliko, bakambi na yango, bazali na wolo ya mokili. [Moto moko alobi: “Ba-milliard mokama na ntuku motoba na mwambe ya dollars.”—N.D.E.] Ba-milliard mokama na ntuku motoba na mwambe. Yango wana. Bazali kozongisa yango mbala moko na wolo, pe bokoki kotikala bobele na bandako na bino ná biloko mosusu, kasi bozali bato ya lingomba Katoliko. Ekólo ezali na maboko ya lingomba Katoliko. Bakokamata biloko nyonso,

ndenge wana, na nzela ya misolo na bango. Biblia elobeli yango te? Ezali etaliseli oyo Biblia elobeli biso.

⁴⁰¹ Likambo nazali komeka koloba lelo oyo, bandeko. Bakoloba: “Ekokómisa yango lingomba moko kitoko. Ekosangisa Bamisioni.” Ezali komonana malamumu, na miso ya bomoto, kasi boyebi ya mokili oyo ezali bolema na miso na Nzambe.

⁴⁰² “Bongo Nzambe asepelaki kobikisa bato oyo babungi na nzela ya bo—bolema na esakweli,” na mosala ya Bonzambe oyo Atiaki kati na Lingomba na Ye, mpo na kotonga Lingomba likolo na makoki ya molimo, kasi likolo ya eloko moko ya mokili oyo te.

⁴⁰³ Petelo alobaki: “Pe mpo ete bokimi libebi oyo ezali kati na mokili mpo na mposa mabe ya mbongo, pe mposa mabe ya kosepelisa nzoto, ya bisengo, ya kolia, ya komela, pe mposa mabe oyo tozali na yango. Bokimi yango. Pe sikawa, botongami, mpo na kobika malamumu. Nazali koloba makambo oyo na Lingomba,” elobaki ye. Yango wana. Bosili kotanga yango? Bososoli yango? Boyokaki yango ntango totangaki yango awa na Petelo Mibale? Boyoka likambo alobaki awa, ezali kitoko ndenge ekomami awa boye, pe ndenge a—alobeli yango. Malamumu. Boyoka ye sikawa ndenge alobi. Malamumu.

Petelo, Simona Petelo, moombo pe ntoma na Yesu Klisto, na bango oyo . . . bazuaki likabo ya kondima ya motuya lolenge moko na biso kati na boyengebeni ya Nzambe na biso pe Mobikisi Yesu Klisto.

. . . kimia e—eyikana na bino kati na boyebi ya Nzambe, pe na nzela ya Yesu Klisto Nkolo na biso.

Nguya na—na bonzambe na ye esili kopesa biso biloko nyonso . . .

⁴⁰⁴ Banani bakosangola mokili ná biloko nyonso? [Moto moko alobi: “Basantu.”—N.D.E.] Na ntembe te. “Oyo ekoki. . .” Iyo. Malamumu.

. . . oyo ekoki na bomoi pe na kosambela Nzambe, mpo na boyebi na oyo asili kobianga biso na nkembo na nkembo.

Na yango pe asili kotiela biso elaka monene . . . na motuya mingi, na ntina ete na bilaka yango bozua likabo na bino kati na lolenge ya bo-Nzambe, pe bokima libebi (Boyoka yango.) lizali kati na mokili mpo na mposa mabe.

⁴⁰⁵ Mposa mabe ya mbongo, mposa mabe ya makambo minene, mposa mabe ya lokumu, makambo oyo ekufi mpo na mondimi. Tozali komitungisa na yango te. Hema to ndako ya moke, nakomitungisa mpo na nini; bomoi to kufa, nazinda to nazindisama? Likambo ezali na motuya mpo na ngai ezali, Bokonzi na Nzambe. Ata nazali na ndako na ngai, ata nazali

na libota na ngai, ata nazali na eloko nini, tika ngai nazala na Klisto, elikia na biso ya Nkembo.

⁴⁰⁶ Kolisa ngai, E Nkolo, na kati na likambo *Oyo*. Tika Klisto azala Motó na ngai, oyo azali kosala na nzela na ngai. Likolo ya mobóko na ngai, kondima na ngai oyo ezali kati na Ye, tika ezaleli malamumu, boyebi, komipekisa, motema molai, bonzambe, pe boboto na bandeko, ésala mosala kati na ngai, E Nkolo, yango nde libondeli na ngai. Ezali na ntina te mpo na ngai; bomoi to kufa, kozinda to kozindisama; ebongiseli, ebongiseli te; moninga to moninga te. Tika Yango esala kati na ngai, tika ezaleli malamumu ya Klisto, boyebi na Ye, etiola kati na ngai, mpo nazala na makoki ya koteya bamosusu.

⁴⁰⁷ “Mpamba te Nzambe atiaki kati na Lingomba, bantoma, basakoli, balakisi, bakengeli, pe bapalanganisi nsango malamumu, nyonso mpo na kobongisa pe kotia misala malamumu oyo nyonso kati na yango, mpo na kobonga be ya Boyei ya Mwana na Nzambe.” Moko na moko na mabanga *oyo* ezali esalelo euti na *Oyo* moko. Esalelo *oyo* euti na *Oyo*. Moko na moko na misala malamumu oyo ezali na maboko na Ye, pe ezali kobima uta na Ye, pe kotiola kati na bango. Amen.

⁴⁰⁸ Midi ebeti. Ngonga nyonso ekei wapi? Amen. Bolingaka Ye? [Losambo balobi: “Amen.”—N.D.E.] Bondimi yango? [“Amen.”] Boyoka, bana mike.

⁴⁰⁹ Ndeko mwasi Kidd alobaki na ntongo ya lelo: “Ndeko Bill, nayebe te soki nakomona yo lisusu.” Likambo yango epasolaki ngai motema. Bomoni? Azali kokanisa akómi mobangé, pe ezali bongo. Nabondelaki Nzambe apesa ye ná Ndeko mobali Kidd bomoi molai.

⁴¹⁰ Botika nayebe bino, toyebi te ntango boni tokozala elongo kati na biso. Nayebe te ntango boni nakozala elongo na bino. Ntango mosusu Nzambe akolongola ngai na mokili. Akoki kobenga ngai na esika mosusu ya mosala. Akoki pe kobenga yo na esika moko. Toyebi te. Kasi, to—tozua yango. Totika te ete makambo oyo eleka likolo na biso. Tozua yango.

⁴¹¹ Yango oyo, kati na Biblia. Yango oyo, ezali ndakisa ya makambo nyonso mosusu. Pe soki nakokaki kozala na ngonga ya kosala yango! Bokoki kosala yango na mokolo moko te. Boyebi yango. Kasi, bokoki kosangisa yango nyonso!

⁴¹² Botala, ntango tosilisaki liteya yango kuna, bomonaki likambo Molimo Mosantu asalaki, kuna na etutu, boye te? Bato boni bazalaki awa ntango wana? [Losambo balobi: “Amen.”—N.D.E.] Bomoni? Na ntembe te! Akitaki pe ayamaki yango ndenge moko, Mwanje yango ya Nkolo.

⁴¹³ Bomoni, ezali solo. Bozanga kosimba yango te. Bana, bokangama na yango. Bokangama na yango. Bobosana te,

botonga likolo ya kondima na bino, ezaleli malamumu, boyebi, motema molai!

¹⁴⁴ Sikawa, botala, nakanisi nazalaki na eteni ya lokasa awa, soki nakweisi yango te esika moko ntango nazalaki koteya. Yango oyo awa. Matondi na yo, ndeko. Matondi mingi. Soki bolingi ko—kotala yango, pe komona soki eloko moko ezali awa oyo bokoki kozala na makoki. . . . Ntango mosusu ezali liyemi malamumu koleka oyo ezali wana, bokoki kozua yango mosusu na oyo. Nakotia yango na nsete ya mike awa, mpo bokoka kotala yango malamumu pe—pe boyema yango.

¹⁴⁵ Pe nalingi ete bozua yango pe boyekola yango, pe bókokanisa yango, na sima bosalela yango. Boyekola yango bobele koyekola te, na kokokanisa yango, kasi bosalela yango, ntango bokoyekola yango. Bozua yango na motema mobimba moko na moko. Boloba te: “Ee, nasepelaki koyoka yango.” Ngai pe lokola. Kasi koyoka yango, na sima koyamba yango, ekeseni. Bomoni? Bomoni? Ekeseni. Bomoni?

¹⁴⁶ Ezali na makoki nsambo mpo na kosala epimelo na Nzambe. Ezali na Bileko na Lingomba Nsambo, oyo Nzambe alekisi Lingomba mpo na makoki yango. Pe Azalaki na batindami nsambo mpo na kosala yango. Ezali nsambo, nsambo, nsambo. Bomoni? Nsambo ezali—ezali motango ya Nzambe ya kosukisa, pe misato, ezali motango ebongi be ya Nzambe. Bongo, ezali na misato, pe nsambo mbala misato. Bongo, na kolandana ya matématike, na nzela ya molimo, na nzela ya Liloba, na nzela ya litatoli ya Molimo Mosantu, nyonso wana esilisi likambo mobimba. Toyekola yango.

¹⁴⁷ Tobakisa makambo oyo na kondima na biso, boye, mpo tokoka kokoma na epimelo mobimba ya Klisto; kosangisama na bolingo ya bo-Nzambe, kobanga Nzambe, limemia na mitema na biso moko na mosusu, limemia ya solo mpenza kati na biso, boboto na bandeko mibali pe basi, makambo ya pamba-pamba ata moke te, eloko mosusu te, bobele bomoi ya peto ya Molimo Mosantu. Bomoni? Kobika elongo, kozala Moklisto. Kotambola na kondima. Tika ezaleli malamumu ya Nzambe etiola kati na yo; tika boyebi ya Nzambe, mpo na kososola mabe ná malamumu. Ntango moyini alakisi yo likambo oyo elongobani mpenza te na Makomi, kende mosika na yango. Ya solo.

¹⁴⁸ Nakoki kokanisa ete bantoma basalaki ata moke te makambo lokola biso. Bazalaki kokende zongazonga, bazalaki koloba mingi mpenza te, kino bakokóma na eteyelo. Bazalaki kokota, pe kosala makambo basengelaki kosala, na sima bazalaki kobima. Iyo, misie. Bazalaki na nguya. Bazalaki na ezaleli malamumu. Bazalaki kowelana na bato te. Bayebaki esika batelemaki. Esili. Bayebaki nani bandimelaki. Bakobaki kotambola kati na Molimo. Kosala bobele. . . .

419 Ndenge nalobaki na mpokwa eleki. Koningisa motó mwa moke, ezali yango Nzambe asengelaki kosala, na sima, eloko moko te ekokaki kotelemisa bango. Bazalaki kotia ntembe te, mpo na koyekola, koyimayima pe komitungisa lokola biso, soki basengelaki kosala likambo *oyo* to *oyo*. Bazalaki kokende liboso pe kosala yango ata ndenge nini. Koningisa moto ya Nzambe ezalaki kokata likambo, mbala moko. Mpo na nini? Ndenge nini bakokaki koyeba ezalaki Nzambe koningisa motó? Bazalaki na misala malamunyo nyo na kati, makoki nyonso oyo. Pe koningisa motó moke ya liboso ya Nzambe, bazalaki kokokanisa yango na nyonso *oyo*, pe na Liloba na Ye. Bayebaki ezalaki Liloba na Nzambe, pe bazalaki kokende. Bazalaki na ntina ya komitungisa na eloko mosusu te. Ntango Nzambe alobaki, bakendeki. Tolobaka. . .

420 Nzambe alobaka na biso, pe tolobaka: “Ee, tokobanda. Tokotala soki tokokoka kobika Bomoi yango.” Mbala moko, moto moko akotungisa yo. Ee, na ntembe te, ezali moyini.

421 Bosengelaki komona ye ndenge amekaki kopekisa ngai kozala na liyangani oyo, na ntongo ya lelo. Bosengeli kobikela yango mbala moko. Oh, mawa! Nasengeli kobunda ntango nyonso nalobaka kosala liyangani. Pe soki nakobondela mpo na mobeli, pe moto moko azali kobunda na liwa pe abikisama te, bakobenga ngai na telefone mbala ntuku misato, na miniti zomi, soki bakoki kokóma na lombango, mpo na kopeksia ngai kosala yango. “Oh, Ndeko Branham, osengeli kosala likambo *oyo*.” Kasi molimo moko ezali kokufa. Solo. Iyo.

422 Na mpokwa mosusu, babengaki ngai nakende esika moko. Elenge mobali moko, nasololaki na ye awa, bobengaka yango nini, zando-ya-monene, esili koleka mibu mingi. Akómaki molangwi-masanga. Nayebaki elenge mobali yango, azalaki elenge mobali malamunyo, kasi azalaki mosumuki. Bongo mama na ye abengaki ngai. Nakanisi abengaki Doc mbala mibale to misato. Ngai. . . Abengaki, pe babengaki Billy, pe-pe na suka nazuaki nsango yango. Pe ntango nazuaki nsango yango, na bosembo mpenza, naino natungisama makasi ndenge wana te na bomoi na ngai, mpo nakómela elenge yango.

423 Pe ntango nakómaki kuna, elenge mobali yango azalaki lisusu koyeba ngai te. Azalaki wana, alali na nse, ayebi lisusu makambo te, bobele komibeta-beta. Tata na ye azalaki komeka kolendisa ye, pe koloba: “Molingami.” Pe mobali yango azalaki na mibu ntuku mitano, pene na ntuku mitano na moko. Azalaki koloba: “Molingami,” *tala*, “fanda nye.” Pe azalaki komeka kotelema. Maboko na ye ezalaki monene pene na *boye*. Elenge yango azalaki na kanser oyo epanzanaki na nzoto, kino azalaki bobele na kanser ya makasi. Binama nyonso ya nzoto na ye ezalaki na kanser. Ata makila na ye ezalaki na kanser, nzoto mobimba. Pe azalaki wana, komeka kotelema, pe kosala makambo ezangi ntina.

424 Nasimbaki ye na loboko, pe nalobaki: “Woodrow, Woodrow, tala Ndeko Branham.”

425 Papa na ye alobaki: “Oyebi ye te? Ezali Ndeko Bill. Woodrow, tala Ndeko Bill.”

Alobaki: “Aaah. Aaah.” Ndenge wana.

426 Papa na ye atalaki pe alobaki: “Billy, okomi na mwa sima moke.”

Nalobaki: “Na sima ata moke te. Azali awa.” Nabundisamaki.

427 Na bongo, bilenge mibali mosusu, bilenge mibali mingi, basumuki, bazalaki wana, bato ya libota na ye. Nalobaki: “Bomoni, bilenge mibali, bomilengela, mpo bokokóma na esika oyo. Likambo oyo ekokómela bino. Bomoni? Ntango mosusu ekozala—kanser oyo te. Ekoki kozala eloko mosusu, kuna na balabala monene, makila ekosopana kino liwa, to eloko mosusu. Likambo yango ekokomela bino.” Tolobelaki bango.

428 Nazalaki kozela komona eloko nini Molimo akolobela ngai kosala. Nazalaki kozela. Mbala moko, nayokaki koningisa motó yango. “Tia maboko na yo likolo na ye.”

429 Nabalukaki pe nalobaki: “Bino nyonso bogumba mitó.” Bango nyonso bagumbaki mitó, ezalaki wana bilenge mibali to misato.

430 Natiaki maboko na ngai likolo na ye. Nalobaki: “Nkolo Nzambe, tika elenge mobali asosola pe ayeba makambo azali kosala, liboso na ye kosala likambo. Azali kobunda na liwa. Molimo mabe oyo ekangi ye, pe azali kokufa. Amelaki mansanga kino liwa, pe tala ndenge akómi. Nabondeli Yo oyokela ye mawa.” Pe sima na ngai kobondela mpo na ye, na ntongo elandi, afandaki pe azalaki kosolola na papa na ye.

431 Busty Rogers, moto... Babengaki ngai, eumeli te, awa na lopitalo. Nazalaki kuna, mokolo wana sima na koteya kuna na Milltown, epai wapi elenge Geogie Carter abikisamaki. Bino nyonso bobosani yango te. Ndeko Smith azalaki wana, motei ya ba-Methodiste, alobaki: “Soki moto moko asila kobatisama na Nkombo na Yesu Klisto, abima na hema na ngai,” alobaki bongo. Kuna na Totten’s ford, ntango azalaki kosala liyangani yango kuna. Pe, oh, apamelaki ngai na makambo nyonso bokoki kokanisa. Nazongisaki ata liloba te; nakobaki nzela na ngai. Nazalaki na etinda moko. Nkolo alakisaki ngai na emononeli. Ezalaki na mwana na mpate moko kuna na nse, bakangaki ye kuna kati na biliki. Bino nyonso boyebi emononeli yango, bino nyonso. Nakanisi ezali bongo. Bozali komikanisela yango? [Losambo balobi: “Amen.”—N.D.E.] Solo. Malamu. Bongo nakendeki kuna na biliki, koluka yango.

432 Nakendeki na Totten’s ford. Ndeko Wright kuna, ayebi yango. Tokendeki kuna, toyebaki eloko ya kosala te. Nasombaki

eteni moke ya sabuni, ya centime zomi. Nalingaki kokende kuna, kotelema wana pe koteya likolo na ebuteli. Alobaki akokende kuna, na nsonge ya ngomba, mpo na kosomba biloko. Nakendeki elongo na ye. Ezalaki na losambo moko monene ya kala ya ba-Batiste kuna oyo ezalaki polele. Nkolo alobaki na ngai: “Telema wana.”

⁴³³ Nalobaki: “Kitisa ngai awa, Ndeko Wright.” Natelemaki. Akendeki liboso pe azongaki sima.

⁴³⁴ Nakendeki kuna, pe nakokaki kofungola ekuke te. Nalobaki: “Nkolo, soki Ozali kati ya likambo oyo, pe Olingi ngai nakota na losambo oyo, fungolela ngai ekuke.” Nafandaki wana, pe nazalaki kokanisa.

⁴³⁵ Nayokaki moto moko koya; abelemaki pe alobaki na ngai: “Mbote. Nalobi na yo,” alobaki: “olingi kokota na losambo?”

Nalobaki: “Iyo, misie.”

Alobaki: “Nazali na fungola awa.”

⁴³⁶ Nabandaki mayangani. Na póso ya liboso, eloko ata moko te. Na mpokwa ya liboso, nasalaki liyangani, Ndeko Wright ná libota na ye. Mbala moko, na suka ya póso yango, ata esika ya kotelema na lopango yango ezalaki te. Ata bongo, mwana yango ya mpate ayaki naino te. Ndeko Hall abikisamaki na ntango yango, azali sikawa mokengeli kuna, ná bango nyonso. Nakokaki komona te esika mwana ya mpate yango azalaki. Sima na ntango moko, uta na lingomba ya Klisto, na nse ya ngomba, elenge mwasi wana azalaki koningana te, bobele kolala mibu libwa na sanza mwambe. Ye wana. Bino nyonso boyebi lisolo yango. Iyo, misie.

⁴³⁷ Na sima na nzánga wana, ntango Busty Rogers, engambe pe mbinga mobundi ya kala azalaki wana. . . Nakendeki kuna. Pe tala losambo ya Ndeko Smith ezalaki wana, mpo na koseka ngai, kotiola ngai, mpo nazalaki kobatisa na Nkombo na Yesu. Nakotaki kati na mai yango ya potopoto, ya Totten's ford, esika bazalaki na. . . [Eteni oyo ezangi maloba na bande—N.D.E.] . . . kuna molúká moko ezalaki wana, pe ezalaki konguluma na makasi nyonso. Basungi mibale to misato babelemaki elongo na ngai.

⁴³⁸ Nalobaki: “Natelemi awa, sima na nzánga oyo, lokola ntoma ya Makomi Mosantu ya Nzambe.” Nalobaki: “Natangi kati na Biblia awa, esika Petelo alobaki: ‘Bobongola mitema, pe bobatisama moko moko na Nkombo na Yesu Klisto mpo na kolimbisama na masumu na bino.’” Nabalukaki, napesaki Buku yango epai na moko na basungi.

⁴³⁹ Nabelamaki wana, pe nalobaki: “Moto nyonso alingi, oyo abongoli motema mpo na masumu na ye, akoki koya.” Nakotaki na mai. Nalobaki: “Nazali komona Ba-anje bafandi likolo ya etape moko moko sikawa, bazali kotala.” Hólalá! Ntango nasilisi

kobatisa bato mibale to misato, losambo na ye mobimba, basi oyo balataki ba-robe kitoko ya siliki, bakotaki na mai, bazalaki koganga na makasi na bango nyonso. Nabatisaki losambo na ye mobimba na Nkombo na Yesu Klisto. Boyebi yango. Nazali na bililingi na yango. Ezalaki bongo.

⁴⁴⁰ Ezalaki nini? Kobakisa na ezaleli malamumu na bino. Bomoni? Botika yango kimia. Nzambe ayebi lolenge ya kosala yango. Nzambe ayebi lolenge ya kokokisa makambo yango. Tika bango baloba oyo balingi. Ekosala eloko moko te. Bokoba bobele kokende liboso.

⁴⁴¹ Busty Rogers azalaki wana, ntango amonaki yango, alobaki: “Boye, nandimi yango na motema na ngai mobimba.” Pe ye wana akotaki na mai, ná bilamba na ye ya kitoko na nzoto, pe abatisamaki na Nkombo na Yesu Klisto.

⁴⁴² Eleki pene na mibu misato to minei, babengaki ngai awa na lopitalo na New Albany. Azalaki kuna, kobunda na liwa, na kanser, eliaki ye nzoto mobimba. Minganga bapesaki ye mokolo moko ya kobika. Balobaki: “Azali kokufa sikawa.” Alobaki: “Yaka noki mpenza.”

⁴⁴³ Nakotaki na esika yango, ntango nakotaki, natelemaki wana mpo na kobondela. Alobaki: “Billy, monama moko ezali kozunguluka kuna na litumu.”

⁴⁴⁴ Nabalukaki mpo na kotala. Nalobaki: “Busty, ezali kondimana. Okokufa te. Kondimana ya Makila ebikisi yo.”

⁴⁴⁵ Natiaki maboko na ngai likolo na ye, nalobaki: “Nkolo Nzambe, emononeli oyo kuna etalisi polele ete Ozali awa. Kondimana na Yo ezali yango, ete: ‘Na mapipi na Ye, biso tobikisami.’” Natielaki ye maboko, pe ayokaki malamumu wana. Bazongisaki ye na ndako.

⁴⁴⁶ Pene na mibu minei to mitano, pene na mibu minei, azalaki kolobo mbisi na ebale, pe nyonso ezalaki malamumu. Pe esika kanser ezalaki, na kati ya estomac na ye, ekómaki makasi, pe esalaki litutu monene ya makasi. Minganga, bato ya kala ya lopitalo yango, bayebisaki ye bazalaki na nkisi moko ya cobalt, oyo ekoki kobenda yango, mpo épesa nzela na bilei kokita mbala moko. Ezalaki mpasi mpo na ye kolekisa bilei mingi, esengelaki na ye kolia malembe-malembe. Akendeki kuna mpo basala ye yango. Nayebaki te ete azalaki kuna.

⁴⁴⁷ Bongo, ntango bapasolaki ye, esalaki ete misisa na ye ebendana, pe ebwakaki ye. Ebomaki ye nzoto ngambo moko. Pe nyonso akokaki kosala, azalaki bobele kolela ngambo moko. Pe azuaki ekomeli, *boye*, pe azalaki kosala: “aa, aa, aa.” Azalaki komeka kokoma, pe azalaki kolenga ndenge wana, na loboko na ye ya malamumu. Ngambo ya nzoto na ye ya mwasi ekufaki. Bongo asembolaki loboko na ye: “Yesu abikisi, mibu 1900 na ndambo.” Bakokaki kososola yango te.

448 Bongo, mwasi na ye ayebisaki ngai: “Ndeko Branham, nayebi te nini alingi koloba na yango.”

449 Nalobaki: “Madame Rogers, likambo alingi koloba, ezali ete na mibu 1900 na ndambo, abikisamaki pe abatisamaki na Nkombo na Yesu, kuna na nse. Yango nde nde ezali na motuya sikawa. Azali kobanga liwa te.”

450 Nalobaki: “Nkolo Nzambe, batela bomoi na ye. Nasengi yango, na Nkombo na Yesu, ete Obatela bomoi na ye.” Natielaki ye maboko. Paralysis etikaki ye. Kobendana ya misisa esilaki. Pe atelemaki na mbeto na ye. Pe azali sikawa kotambola, pe kopesa litatoli na ye.

451 Bobakisa na kondima na bino, ezaeleli malamumu; bobakisa na ezaleli malamumu na bino, boyebi; na boyebi na bino, komipekisa; na komipekisa na bino, motema molai; na motema molai na bino, bonzambe; na bonzambe na bino, boboto na bandeko; na boboto na bandeko na bino, Molimo Mosantu, pe Klisto akoya. Mpamba te, bobele sima na Ye . . . Molimo Mosantu azali Molimo ya Yesu Klisto kati na Lingomba, mpo na komonisa misala malamumu oyo. Hólalá!

Ekómi midí na miníti zomi na mitano.

Nalingi . . . , nalingi Ye
Mpo Alingaki ngai liboso,

Na nse *awa*, liboso bozalaki eloko pamba.

Aso- . . . (Asalaki nini?) . . . lobiko na ngai
Na Ekulusu.

Ndenge nini nazali *boye*? Mpo Alingaki ngai, liboso.

Nalingi Ye, nalingi Ye
Mpo Alingaki ngai liboso . . . (Ntina yango
wana.)

Pe asombi lobiko na ngai
Na Ekulusu.

452 Nalaki Ye, na ntongo ya lelo, na motema na ngai mobimba, ete, na lisungi na Ye pe na ngolu na Ye, nabondeli ete nakoluka mokolo na mokolo, na kolemba te, kino nakoyoka moko na moko na bizaleli oyo kotiola kati na epimelo na ngai ya kala oyo, mpo nakoka kozala etaliseli ya Klisto ya bomoi. Mpo ete, Akómaki lisumu lokola ngai, mpo nakoka kokóma . . . nakóma boyengebene ya Nzambe, lokola Ye. “Azuaki esika na ngai; Nkolo, tika ngai nazua esika na Ye sikawa.” Mpamba te, yango nde ntina Ye akufaki. Bato boni balingi kopesa elaka yango moko, na ngolu na Nzambe? [Losambo balobi: “Amen.”—N.D.E.] Wana togumbi mitó sikawa, pe totomboli maboko. “Ngai . . .”

453 Ngai nalaki yango, e Nkolo, lingomba oyo balaki yango: “Epimelo mobimba ya Yesu Klisto!”

Mpo Alingaki ngai liboso
Pe asombi lobiko na ngai
Na Ekulusu.



EPIMELO YA MOTO OYO ABONGI BE LIN62-1014M
(The Stature Of A Perfect Man)

Liteya oyo ya Ndeko William Marrion Branham, eteyamaki liboso na Ngelesa, mokolo mwa lomingo na ntongo, mokolo ya 14, sanza ya zomi, na mobu 1962, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED


VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

EPIMELO YA MOTO OYO ABONGI BE

BILEKO NA LINGOMBA

YESU

BATINDAMI



PETELO YA MIBALE 1:1-8

MISALA NA BANTOMA 7:44-49, BAEBELE 10:5, MATAI 5:48

BAEFESE 4:11-15, BAEBELE 11:32-40

Oyo ezali etaliseli ya liyemi oyo Ndeko Branham asalaki na etanda na ye pe azalaki kosalela yango ntango azalaki koteya Nsango oyo.

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org